

Itota nänö da godongainäni Näni Cægainö

Wængonguï Tæiyæ Waëmö Önöwoca poncæcäimpa, ante

¹ Teopido bitö acæbiimpa, ante botö do yewæmöninque, Itota æbänö mä cægacäi, ante, Itota æbänö mä odömonte apænegacäi, ante yewæmontabopa. Mänömainö ante do yewæmönimo inte botö adobo Odoca inömo inte ñöwo godömenque yewæmömo ae. ² Itota do iñömö, İinäni botö imotedö ante nê apænequinäni inänipa, ante cædinque tömënäni inänite apænte æninque da godongacäimpa. İinque tömengä nänö æite goquïönæ iñonte tömënäni tönö godongämæ ongöninque Itota iñömö Wængonguï Tæiyæ Waëmö Önöwoca tönö cædinque tömënäni inänite, Botö dæ gobo ate mïnitö iïmaï cæcæminimpa, ante apænegacäimpa. İinque apænecä ate tömengä ingante Wængonguï do ænte mæicä inque ingä æigacäimpa. İinque mäninganca tömengä nänö cægainö ante do yewæmönimo inte botö iñömö, Bitö Teopidobi godömenque acæbiimpa, ante ñöwo wæætê yewæmömopa.

³ Itota adocä incæ nantate wægaingä inte ñäni ömæmonte ate coadenta ëönæ manimpoönæ inguipoga quëwëninque tömënäni weca mïingä inte wæætê pö wæætê pö cædinque mä pönï cædongäimpa. İinque, Tömengä näwangä mïingä

inte mänömaï cæcampa, ante adinque tömënäni ædö cæte wadö ante pönenguïnäni. Ayæ tömënäni weca a ongöningue tömengä tömënäni inänite, Wængongui Awënë Odeye nempo quëwencæminimpa, ante tömänö ante adodö adodö ante apænecä ëñengadänimpa.

⁴ Tömënäni tönö godongämæ ongöningue Itota iïmaï angantapa.

—Wii wayömö goedäni, Eedotadëë iñömö ee quëwëedäni, angantapa. Botö Mæmpo iñömö, Wacä ingante da pönömo æningue ëwocacæminimpa, ante do apænebo ëñëminitawo. Tömengä, Da pönonguïmo, ante nänö në angaingä ingante ante æte ëwocacæte ante minitö ñowo wänö cöedäni. ⁵ Edæ Wäö wodi iñömö æpænë guidongacäimpa. Wængongui Tæiyæ Waëmö Önöwoca guiquënë minitö baonga wantæ iñö pö guicæcäimpa, ante Itota apænegacäimpa.

Itota öönædë æicampa

⁶ Ayæ Itota tönö godongämæ ponte ongönäni iñömö tömengä ingante änänitapa.

—Itota ëñëmi. Mönö idægocabo mönö quëwengaimæ iñonte wadäni do ö ænäni incæte bitö ñowo wæætë adobæ æningue mönitö Awënë Odeyebi oo bacæ cæbitawo. Edæ, Bitö nempo oo pönï godongämæ quëwencæmönimpa, ante cæbitawo, ante ëñencæte ante wæmönipa.

⁷ Anca äñönäni,

—Iñæmpa minitö ante wæinö bai, Æyedënö baquii, ante, Æpogadö baquii, ante minitö wii ëñenguënëmini iminipa. Mæmpoque në angaingä inte mäninö ante ëñengampa. ⁸ Wæætë Wængongui

Tæiyæ Waëmö Önöwoca pö guiddinque pönö cæcä ate mīnitö wæætē tæi pīnænte ēwocamīni edæ bacæmīnīmpa. Īnīnque, Botö æbänö cægaboī, ante nē adīmīni inte mānīnō botö cægainö ante mīnitö tāno Eedotadēē īñömö quēwente apænedinque ayæ Oodeabæ mǎo apænedinque ayæ Tāmadiabæ mǎo apænedinque godōmenque tōmāmæ mǎo apænemīni ēñencædānīmpa, ante Itota angacāīmpa.

⁹ Mānōmāinö ante apænecä ēñente a ongōñönāni Itota māniñömö ongonte æi boguīmancodē ingæ æicä æmō agadānīmpa. ¹⁰ Öönædē æite ingæ gocä æmō ayönāni edæ onguīñæna nāāmænta weocoo mongæna tōmēnāni weca a ongōninque edæ, ¹¹ tōmēnāni īnānite apænedinque,

—Gadideabæ quēwēmīni inte onguīñæmīni ēñēedāni. Quīnante æmōnga a cōmīnīi. Edæ Itota mīnitö tōnō ongōninque öönædē æicä amīnitawo. Edæ öönædē æicä mīni adī baī adocä Itota īincayæ ate ocæ ēmænte poncæcāīmpa, ante apænedatapa.

Codaa nänö cæquēnēnö wacä cæccæcāīmpa, ante cædāni

¹² Oodeoidi nāni guēmanguīönæ cōwē nāni goganca māningancaque ī ĩnīnque wīī gobæ ī ĩnīnque tōmēnāni Odibowænquidi nāni anquidi ongōninque ocæ ēmænte wææ Eedotadēē pōnānitapa. ¹³ Tōmēnāni ēmōwo Pegodo tōnō Wäö, Tantiago tōnō Æntade, Pedipe tōnō Tōmato, Batodōmēē tōnō Māateo, Adepeo wengä Tantiago, wacä, Mōnō ömæ ingæīmpa, ante nē ānongä Timōnō, Tantiago wengä Codaa. Mānōmāi ēmōnāni inte pö guiddinque tōmēnāni nāni wānoncōnē æmōngapaa

æi guiidänitapa. ¹⁴ Ayæ iinäni tönö wadäni Wængongui ingante godongämæ apænecæte ante cöwë pö pö cægadänimpa. Onquiyænäni adobaï Itota badä Mäadiya tönö ayæ Itota biwïidi tönö cöwë ponte apænedönänimpa.

¹⁵ Mäniñedë Itota ingante näni tee empote quëwënäni tiento bæinte ganca inäni inte ongöñönäni Pegodo tæcæguedë ængæ gantite apænecantapa. ¹⁶ “Iñänäni ëñëedäni. Nöwocä Codaa wodi Itota wodi ingante në æncædäni inänite në godö odömongä ingantawo. Edæ tömengä ingante ante Wængongui Tæiyæ Waëmö Önöwoca wëenëñedë apænecä ëñëinque awënë Dabii wodi nänö yewæmongainö bai cöwë iinque baquinö angüënë. ¹⁷ Edæ Itota mönitö imönite apænte æninque Codaa ingante adobaï apænte ængacäimpa. Iinque mönö cabo mönö në cæquënënö ante Codaa wodi adocä incæ mönö tönö godongämæ cæcä ingacäimpa. ¹⁸ Tömengä wiwa cæte tiguitamö nänö ænintamö incæ adodö godongä ænänitapa. Tömënäni wæætë tiguitamö æninque, Waodänido bacäimpa, ante ömæ godonte ænänitapa. Tömengä iñömö guidömëmæ wæænte ömengö tæi æbæ godente æmæwo wængantapa. ¹⁹ Mänömaï wængä ëñëinque Eedotadëë quëwënäni tömänäni, ‘Wepæ onguipo ba awädö,’ ante tömënäni näni tededö Atedämæ pemönänitapa. ²⁰ Edæ Ämotamini näni Angaintaa iïmaï ante dobæyedë yewæmongatimpa.

‘Tömengä oncö æmæwo önonconque bacäimpa.

Wacä mänincönë cöwë quëwënämaï incæcäimpa.’

Ante näni Ämotamïni Angainta bai do batimpa.
 Ayæ,
 “Tömengä nē aacä bate nänö cæquēnēnō incæ wacä
 badinque cæcæcäimpa,
 ante yewæmonte ongompa,”

²¹ Ante apænedinque Pegodo godömenque
 iïmaï ante apænecantapa. “Mänömaï iï ininque
 Codaa wodi nē nänö cæquēnēnō incæ edæ
 wacä cæcæcäimpa, ante ñöwo mönō apænte
 angæimpa. Awēnē Itota imæca mönō tönō
 guëa cægongäñedē wadäni godongämæ nē
 cægöninäni inänite adinque mönō iïmainö ante
 apænte ængæimpa. ²² Wäö wodi nänö guidöñedē
 cægöninque ñöwoönæ Itota nänö æite goönæ
 ganca æcänö æcänö mönō tönō godongämæ
 cægöninäni inänii, ante adinque mönō adocanque
 ingante apænte ængæimpa. Apænte æmō ate
 tömengä, Itota dobæ ñäni ömæmongantapa, ante
 nē againgä inte wæætē mönō tönō godongämæ
 apænecä incæcäimpa.” ²³ Ante Pegodo angä eñente
 cædinque tömēnäni wæætē, Æcänö æcänö nē
 agaïnäni inänii, ante adinque mēnaa inate apænte
 ænänitapa. Adocanque Ootee, Badatabato näni
 änongä inte tömengä mæmæ beyæ, Yoto, ante
 näni pemongaingä iñongante tömēnäni tömengä
 ingante apænte æninque edæ wacä ingante
 Mäatiya ingante apænte ænte gönönänitapa.
²⁴ Mänömaï apænte æninque Wængonguï ingante
 apænedänitapa. “Awēnē eñēmi. Mönitö æbänö
 pönēmönii, ante tömää eñēmi inte bitö iïna inate
 adinque æcänö ingante do apænte ængabiï, ante
 odömömi amönii. ²⁵ Edæ Codaa wodi tömengä
 nänö pante wænguinque oda cæcantapa. Ininque

bitö ñöwo wacä ingante da godömi godinque Codaa wodi nänö cæquënönö ante cæcæcäimpa, ante ämii, ante wæmönipa.”

²⁶ Ante Wængonguï ingante apænedinque tömënäni, Æcänö inaa, ante eñencæte ante cædinque dicamö æninque, Wo godö wo godö cæyömö to ta wææ acæi, ante cæte ayönäni Mäatiya nänö cæ to ta wæænca adinque, Mönö imonte Itota da godongä nē godimö önompo tipæmpoga go adocanque iñömonte tömengä mönö cabo badinque godongämæ cæcæcäimpa, ante cægadänimpa.

2

Wængonguï Tæiyæ Waëmö Önöwoca pongampa

¹ Tömëmö incadepo ba ate Pentecotee ææmænoca nani äönæ iñonte tömënäni nani cabo adoyömö ponte godongämæ ongönänitapa.

² Ongonte eñeñönäni woboyæ nanguï pæmænte ä bai iñontobæ öönæde pö eñeñönäni oncönë nani ongoncönë tömancönë wææ guiite bai woboyæ nanguï pæmænte ä bai eñenänitapa.

³ Ayæ waodäniya incæ gonga bai onguënë onguënë bæco adänitapa.

⁴ Ayönäni Wængonguï Tæiyæ Waëmö Önöwoca incæ tömänäniya pö guicä ewocadänitapa. Pö guiidinque Wængonguï Önöwoca pönö cæcä beyænque tömënäni wadäni nani tededö bai wadäni nani tededö bai mä apænedänitapa.

⁵ Mäniñedë oodeoidi Wængonguï ingante guiñente quëwënäni inte edæ wabæca wabæca tömämæ quëwëninque ñöwo Eedotadëe ponte quëwënönänimpa.

⁶ Iinäni iñömö woboyæ

nangui pæmænte bai ä eñente wædinque ponte
 eñeñonäni Itota ingante nē pönänäni iñömö ñowo
 pönäni näni tededö bai tededäni eñenänitapa.
 Adocanque nänö tededö bai wacä nänö tededö bai
 tededäni eñenique tömənäni, Æbänö cæte tömämö
 tededö bai tededäni eñēmōnii, ante wædänitapa.
 7 Tömənäni nämäneque apænedinque,

—Iñæmpa Gadideabæ quëwëninäni que inte
 iinäni mänömaï tededäni awædö. 8 Iñinque
 ædö cæte mönō eñagaïömæ mönō tededö bai
 tededäni eñēmōö, ante ancai guiñente wædänitapa.
 9 Edæ iñömö nē ongömö iñomonte pancadäniya
 Padatiabæ quëwente pöñömö wadäni guiquënë
 Mëediabæ, Edämæ, Mëetopotämiabæ, Oodeabæ,
 Capadotiabæ, Pontobæ, Atiabæ quëwente
 pönäni inänipa. 10 Wadäni guiquënë Pidiguiabæ,
 Pampidiabæ, Equitobæ quëwente pönäni inänipa.
 Wadäni guiquënë dibiabæidi inäni inte Tidëne
 iñömö quëwente pönänipa. Wadäni guiquënë
 Odömä iñömö quëwëninque eñacæ ante ponte
 owodänipa. 11 Odömä iñömö nē quëwëninäni
 iñömö pancadäniya oodeoidi eñagainäni iñönäni
 pancadäniya wæætë wadäni incæ oodeoidi
 pönänäni bai adodö pönente oodeoidi bai
 bagainäni inänipa. Ayæ wadäni guiquënë
 codetenteidi tönö adabeidi inte pönäni inänipa.
 Iñinque mönō wabæca wabæca quëwëninque
 wadäni näni tededö bai wadäni näni tededö
 bai nē tedemö imompa. Incæte iinäni guiquënë,
 Wængongui waa pönï cæcä ingampa, ante mönō
 tededö bai mä pönï tededinque apænedäni
 eñēmompa töö.

12 Ante wædinque tömënäni näni cabo nämäneque apænedinque,

—Æbänö ëñëmöö, ante wæmönipa töö.

13 Ante wæyönäni pancadäniya babæ apænedinque,

—Biinömæ miimæ tömo pönï bedinque dowænäni inte tededänipa, ante badete togadänimpa.

Pegodo tömënäni inänite apænecampa

14 Mänömaï tedeyönäni Pegodo iñömö önompo tipæmpoga go adocanque inäni tönö ængæ gantid-
inque nanguï tedecä ëñengadänimpa. “Oodeoidi
ëñëedäni. Ayæ wamïni guiquënë Eedotadëë iñömö
ñöwo ponte owomïni inte minitö oodeoidi tönö
tömämïni ëamonca ongonte ëñëedäni. Botö, Æbänö
i, ante edonque apænebo ëñencæminimpa,” angan-
tapa.

15 “Gäwadecæ impa diyæ ti nämæ bete dowænte
baquïnänii. Iñæmpa nænque ayaönäa ææñongä
ædö cæte mïni änö bai bete dowænte baquïnänii.

16 Wæætë Wængonguï beyæ në apænegaingä
Oedo wodi do nänö angainö bai ñöwo cædänipa,
ante apænebo ëñëedäni. Oedo wodi iñömö
iimainö ante yewæmongacäimpa.

17 ‘Wængonguï iïmaï angampa, angacäimpa.

Iinque bayedë botö Önöwoca ingante tömänäniya
ämo pö guicä ewocacædänimpa.

Mäniñedë onquiyænäni incæ onguiñænäni incæ
minitö wënäni inönäni inte botö beyæ
apænecædänimpa.

Edëninäni iñömö ate bai mä pönï acædänimpa.

Picænäni guiquënë nö wiimonte bai acædänimpa.

18 Ayæ botö Önöwoca ingante ämo pö guicä
 ewocadinque
 onguiñænäni incæ onquiyænäni incæ
 botö beyænque nē cædäni inönäni inte botö beyæ
 apæ necædänimpa.

19 Edæ mini ææmō ate pönenguinque ante botö
 öönædē mā cæbo acæminimpa.
 Ayæ imæca adobaī pönö cæbo ate wepæ
 gonga tēmā nanguī mongæ adinque
 eñencæminimpa.

20 Edæ nænque täno wentamö bayö apäicä wepæ
 emö ba acæimpa.

Ayæ ate tömengä nänö ponguiönæ iñonte
 Wængonguī Awënë incæ tæi piñængä inongä inte
 ñäo apäite baī emöninque poncæcäimpa.

21 Ìninque botö emöwo ante nē aa pedäni iñömö
 tömänäni botö æmo beyænque quëwencædänimpa.
 Ante Wængonguī Awënë cæcæcäimpa, ante Oedo
 wodi yewæmongacäimpa.”

22 Ante apænedinque Pegodo godömenque
 iimaī ante apæ necantapa. “Idægoidi, apænebo
 eñëedäni. Itota Näatadeta nē quëwengaingä
 näwangä botö nē da pönongä ingampa, ante
 pönencæminimpa, ante mā cædinque Wængonguī
 Itota tönö godongämæ tæi piñænte nanguī cæcä
 ate Itota minitö weca bamönengæ cædinque nanguī
 cægacäimpa. Ìninque mänömaī cæcä nē agaimini
 inte minitö, Näwangä Itota ingante Wængonguī
 da pönongä ponte cæcampa, ante do eñëminipa.

23 Wængonguī nämä pönëninque, Codito ingante
 tömënäni nempo pædæ godoncæboimpa, ante do
 angaingä inte, Minitö tömengä ingante æninque

mänömaï cæcæminimpa, ante do eñengacäimpa. Ìninqe mīnitō iñōmō Itota ingante bæi ongonte æninqe eñente cædāmaï ināni nempo pædæ godōninqe, Mīnitō tōmengā ingante awāa timpodinque wææ tīwate wænōedāni, ante āmīni wænōnānitapa. Mänömaï önōnecaque tedete beyæ mīnitō tōmēmīni edæ nē wænōmīni bai bamīnīpa tōō. ²⁴ Mīnitō mänömaï wadāni tōnō cædinque wænōmīni beyæ Itota iñōmō mōnō wænguēnēmāmo teēmē mongænte caate wædinque wængacäimpa. Ayæ pæ opate öñöñongante Wængonguï wæætē, Idæwaa, ante wi ænote bai cædinque angā ate Itota ñāni ömæmonte ta pongantapa. ²⁵ Adocä Codito beyæ ante apænedinque awēnē Dabii wodi iīmaï ante yewæmongacäimpa.

‘Botō, Mōnō Awēnē cōwē botō weca mæ on-gongampa, ante atabopa.

Ìninqe tōmengā botō tōmēmæ inō tōō æmænte on-gongā Ìninqe botō ïmote ædō cæte bæ tadāni wæquīmoo.

²⁶ Mänömaï beyæ botō, Watapæ bacäimpa, ante mīmōnē pōnēmo inte botō önōneca ämotamīni ante bai nanguï tobopa.

Botō ñāni ömæmonguinque nē wæwocabo ïmopa, ante pōnēmo inte botō guññēñate wædāmaï inte baō eñate quēwencæboimpa.

²⁷ Wængonguï eñēmi. Botō waodāni nāni wænte ongōñōmō öñöñōmote bitō emō cæte godāmaï incæbiimpa.

Bitō ïmite nē cæbo inte botō tōmēmi cædō ante cōwē cæbo iñōmote bitō ædæmō wææ aabi ate

botö baö ñömäädämaï incæboimpa, ante edæ
botö do ëñëmopa.

²⁸ Taadö botö quëwenguinö ante bitö do odömömi
agaboimpa.

Bitö weca æidinqe bitö awinca adinqe watapæ
tocæboimpa,
ante awënë Dabii wodi ämotamini ante bai
apænegacäimpa.”

²⁹ Ante apænedinqe Pegodo godömenque
apænecantapa. “Iñänäni ñöwo edonque apænebo
ëñenguënë quëwëmini. Mönö mæmæ Dabii
wodi do wængacäimpa. Tömengä mäo do daga
wengadänimpa. Edæ tömengä wodido nāni
wengaiñömö ñöwo ganca a ongö aminipa.

³⁰ Incæte tömengä ingante Wængongui, Dabii
ëñëmi, angacäimpa. Bitö pæināni wææ
pæyönāni adocanque ingante botö bitö awënë
contaimpa pönö cönömo contadinqe tömengä
iñömö në Awënë bacæcäimpa, ante apæneca
ëñëninque awënë Dabii wodi Wængongui beyæ
në apænegaingä inongä inte edæ, Wængongui
tömengä nānö änö bai cöwë cæcæcäimpa, ante
do ëñengacäimpa. ³¹ Ayæ, Æbänö cæquingä, ante
do ëñengaingä inte tömengä, Mönö Codito iñömö
woadäni nāni wænte ongöñömö öñöñongante
Wængongui ëmö cæte godämaï inte wææ aacä
beyænque tömengä baö incæ ñömäädämaï
ingäimpa, ante apænegacäimpa. Mänömainö ante
apænedinqe awënë Dabii wodi, Mönö Codito
ñāni ömæmoncæcäimpa, ante do apænegacäimpa.
³² Itota ingante Wængongui, Nāni ömæmöe, angä
ñāni ömæmongantapa. Ininqe mäninö tömengä

nānō ñāni ömæmongainō ante nē adimōni inte mōnitō tömämōni edæ, Nāwangä impa, ante nē apænemōni imōnipa.”

³³ “İninqe Wængonguï angä beyænque Itota inque ingä öönæde æidinque Wængonguï tömëmæ inō tæ contate ongongampa. Ayæ Mæmpo Wængonguï, Botö Önöwoca ingante æncædānimpa, ante nānō nē angaingä ingante do godongä æninqe Itota wæætē mōnitō imōnite ñöwo da pönongä ænte ewocamōnipa. İninqe mīnitō guiquënë gonga bæco ate wæmīnitawo. Wadāni nāni tede bai tedemōni eñente wæmīnitawo. Edæ Wængonguï Önöwoca pönö cæcä beyænque gonga bæco amīnipa. Wængonguï Önöwoca pönö cæcä beyænque wadāni nāni tede bai tedemōni eñēmīnipa. ³⁴ Itota öönæde inque ingä æicä bai awënë Dabii wodi wīi adobai æigacäimpa. Incæte tömengä godömenque apænedinque iīmai ante yewæmongacäimpa.

‘Awënë Wængonguï incæ botö Awënë ingante apænedinque,

Nē Awënë iīmi eñēmi. Botö tömëmæ inō tæ contayōmi,

³⁵ botö bitö imite nē piinte cædāni inānite bæ tabo ate bitö tömēnāni inānite pīnā gāwate bai cæcæbiimpa,’ ante Awënë Wængonguï angacäimpa,” ante Dabii wodi yewæmongacäimpa.

³⁶ Ante apænedinque Pegodo godömenque iīmai angantapa. “Mānōmai beyæ mīni idægocabo tömämīni, İīmaiñö ante nāwangä pōni impa, ante eñencæmīnimpa. Māningä Itota ingante mīnitō

ñænquedimæ gönonte wænömïni në wæningä ingante ante apænedinque Wængongui incæ, Itota në Awënë inongä ingampa, ante ayæ, Nē Codito inongä ingampa, ante edæ do cægacäimpa.”

³⁷ Ante Pegodo apænecä ëñëninque tömënäni, Æ, wënæ wënæ cæte awædö, ante ancai guiñente wædinque Pegodoidi inänite,

—İñänäni, æbänö cæquënëmöni imönii.

³⁸ Äñönänite Pegodo wæætë,

—İmaï cæedäni. Minitö wënæ wënæ mïni cædinö ante Wængongui pönö ñimpo cæcæcäimpa, ante cædinque, Æmæwo wënæ wënæ cætabopa, ante Itota Codito ëmowo ante apænedinque æpænë guiedäni. Mänömaï cæmïni adinque Wængongui tömengä Önöwoca ingante da pönongä ænte ëwocacæmïnimpa. ³⁹ Edæ mïnitö imïnite aa pecä incæ mïni wënäni inänite aa pecä incæ gobæ quëwënäni inänite aa pecä incæ ayæ ate quëwënäni inänite aa pecä incæ mönö Awënë Wængongui nänö në aa pedäni inänite apænedinque, Botö änö bai cöwë cæcæboimpa, angampa.

⁴⁰ Ante apænedinque Pegodo godömenque nanguï äninque, Æñenguënë quëwënänii, ante wantæpiyæ apænecantapa.

—Ñöwodäni iñömö nämanque näni cæinënö ante idiquibæ näni cæi bai mïnitö adobai cædämaï inte nöingä cæte waa quëwëedäni.

⁴¹ Ante Pegodo ancaa angä ëñëninque pancadäniya Ao äninque æpænë do guidänitapa. İninque edæ mäniönæ todee müido ganca inäni mänimpodäni wede pönëninque do pönengainäni tönö adocabodäni bagadänimpa. ⁴² İinäni iñömö

adocabodāni badīnāni inte cōwē ñimpo cædāmaī
 īnīnque godongāmæ pō pō cæyōnānite Itota nānō
 da godongaināni apænedāni ēñēnōnānimpa. Ayæ
 nāni pōnencabo īnōnāni inte wacā ingā wacā ingā
 watapæ apænedīnque pāo pā ænte godongāmæ
 cænīnque Wængonguī ingante cōwē apænete
 quēwēnōnānimpa.

*Nāni pōnencabo godongāmæ waa cæte
 quēwēnānipa*

⁴³ Īnīnque edæ tōmānāni guīñente wædīnque ee
 quēwēnōnānimpa. Ayæ Itota nānō da godongaināni
 īñōmō, Tōmānāni pōnencædānimpa, ante cædīnque
 Wængonguī Tæiyæ Waēmō Ōnōwoca tōnō cædīnque
 tōmēnāni nāni pōnēnīnque ante mā cædīnque
 bamōnengæ nangūī cædōnānimpa. ⁴⁴ Nē pōnēnāni
 tōmānāni adoyōmō pō pō cædīnque tōmēnāni
 nāni mānīncoo incæ, Tōmāmō quī impa, ante
 nē pōnēnīnque, Wacā ingā wacā ingā mōnō
 godongāmæ godonguīnque māmōmpa, ante
 cædōnānimpa. ⁴⁵ Māincoo tōnō ōmæ nāni ēadīncoo
 incæ godonte æ godonte æ cædīnque wadāni
 nē ōmaadāni inte wædāni īnānite pancæ pancæ
 godōnānimpa. ⁴⁶ Ī īnīnque īīmō īñō īīmō īñō
 adoyōmō pōnīnque Wængonguī oncō ñæñæncōnē
 yabæcōnē nē guīī guīī cædāni inte mīmōno nō
 pōnēnīnque tōmēnāni oncōnē adobaī pāo pā ænte
 watapæ todīnque godongāmæ cæñōnānimpa.
⁴⁷ Tōmēnāni edæ Wængonguī ingante, Waa pōnī
 nē cæbi īmīpa, ante ancaa āñōnāni wadāni edæ
 tōmēnāni īnānite waa adōnānimpa. Ayæ mōnō
 Awēnē pōnō cæcā ate tōmēnāni edæ, Itota
 Codito ængā beyænque mōnō quēwengæimpa,

ante pönëninque iimö iñö wacabomö iimö iñö
wacabomö nē pönënäni badinque edæ tæiyænäni
bagadänimpa.

3

Cömäwaingä ingante äna waa bawacampa

¹ Iincayæ ate nænque ædæ wæicä ate oodeoidi
näni cöwë Wængongui ingante apænedöñedë
Pegodo tönö Wäö iñömö Wængongui oncönë
ñænæncö yabæcönë guicæte ante ædatapa.

² Æite ayöna wadäni pöninque cömäwaingä ëñate
nē pædingä ingante næænte mämönäni pongä
adatapa. Iingä cömäwaingä iñömö nē pö guidäni
inänite, Pönömi æmoe pönömi æmoe, ancæcäimpa,
ante cædinque tömënäni tömengä ingante iimö
iñö iimö iñö næænte pö næænte pö cædinque
edæ Wængongui oncö ñænæncö boyæ yabædemö,
Wainemö, näni änemö yabæque cö cædönänimpa.

³ Iinque ñöwo Pegodo tönö Wäö Wængongui
oncö ñænæncönë yabæcönë pö guicæ cæda
adinque tömengä tömëna inate, Pönömina æmoeda,
angantapa. ⁴ Angä ëñëninque Wäö tönö tömengä
ingante cöwä adinque Pegodoque apæncantapa.

—Mönatö imönote ææmö ae.

⁵ Angä ëñëninque cömäwaingä, Botö imote
wabänö pönöna ænguimo, ante pönëninque ææmö
ayongä ⁶ Pegodo iñömö,

—Quinö mämopa pönömo ænguimii. Edæ oodo
incæ tigitamö incæ ömæpobo imopa. Wæætë
tæiyæ waëmö botö ewocadö ante bitö imite pönö
apænebo ate bitö æe. Näatadeta quëwengaingä

Itota Codito ëmöwo beyænque bitö dao dao goe, angacäimpa.

⁷ Äninque Pegodo cömäwaingä tömëmæ inö pædæ wææmpo bæi ongonte töö æmängä ate cömäwadingä önöwa tönö önoncaiwa tæi piñæwacä.

⁸ Ate iñontobæ ængæ gantite dao dao gocantapa. Ayæ Wäö tönö Pegodo miñæ Wængongui oncö ñænæncönë yabæcönë godongämæ go guidineque dao dao go togæi togæi godinque Wængongui ingante waa ate apænedinque, Wængongui, bitö cöwë waa pönï inömi inte pönö cæbi æmopa, ante nanguï apænecantapa. ⁹ Wængongui mänömaï waa cæcampa, ante nanguï pönï tededinque dao dao gocä adinque edæ tömänäni, ¹⁰ Æ, iingä iñömö, Pönömi æmoe pönömi æmoe, ante Wængongui oncö ñænæncö boyæ yabædemö, Wäinemö, mönö änemö gäänë mönö në äncöningä adocä ingampa. Ante adinque, Quinö bai cæte waa bacäi, ante ancai guiñente wægadänimpa.

Tadömöö yabætaa ongonte Pegodo apænecampa

¹¹ Mänii cömäwaingä iningä incæ Pegodo tönö Wäö inate winimä winimä cæcä adinque wadäni tömänäni guiñente wædinque Tadömöö yabætaa näni äñömö pogodo ponte tömënäni weca guidänitapa. ¹² Guidäni adinque Pegodo, “Mini idægocabo ëñeedäni. Mönatö imönate quinate waa aminii. Mänömaï waa bawacä adinque edæ quinate guiñente wæminii. Mönatö edæ, Tömengä dao dao gocæcäimpa, ante cædinque tæiyæ waëmöna imönapa diyæ tæi piñænte cæquimönaa.

¹³ Abadäo wodi Itæca wodi Acobo wodi tömënäni,

Mönö Wængongui inongä ingampa, ante nāni nē angaingä inte Wængonguinque cæcä ate waa bawacampa. Mönö wæmæidi Wængongui incæ, Itota botö imote nē cædongä ñäö bai emõñongante tömengä ingante waa acædänimpa, ante mänömaï cæcampa. Adocä Itota ingante mīnitö iñömö, Wæñongæimpa, äñinque pædæ godömīnitapa. Ayæ Pidato, Ñimpo cæbo gocæcäimpa, ante apænte angä ate mīnitö wæætē Pidato weca ongöñinque adocä ingante ante Baa ämīnitapa. ¹⁴ Ñinque nē Tæiyæ Waemö inongä inte nö cæyongante mīnitö Baa äñinque wæætē nē wænöningä ingante ante äñinque, Ñingä ingante ñimpo cæbi pongæ, ämīnitapa töö. ¹⁵ Ñinque mönö quëwenguimämo nē pönongä ingante Baa äñinque mīnitö nē wænönimīni imīnipa. Incæte Wængongui tömengä ingante, Ñāni ömæmoe, angä ñāni ömæmongantapa. Ñinque tömengä ñāni ömæmongä nē adimöni inte mönitö, Æbänö cægacäimpa, ante adodö ante nē apænemöni imönipa. ¹⁶ Adocä Itota emöwo ante apænemöna eñente pönëñinque mäningä cömawadingä mīni nē adingä iñömö ñöwo tæi piñæwacampa. Edæ Itota pönö cæcä beyæ mänii onguiñængä nē pönengä badinque Itota emöwo beyænque ædæmö waa bawate tæi piñængä bacä aminipa,” ante Pegodo apæñecantapa.

¹⁷ Ayæ godömenque apæñedinque Pegodo, “Ñöwo botö tönīñamīni eñeedāni. Mīnitö awenëidi eñenāmaï nāni cæi bai cædinque mīnitö iñömö adobai, Æbänö nö cæquii, ante eñenāmaï inte cæmīnitapa, ante awædö. ¹⁸ Incæte mīnitö mänömaï eñenāmaï cædinque Wængongui beyæ

nē apænegaïnäni tōmänäni näni apænegaï bai do iinque cæminipa. Tömēnāni, Mönö Codito caate wæte wæncæcäimpa, ante näni angainö bai mīnitō cædi beyæ ñōwo iinque batimpa. ¹⁹ Iinque mīnitō wēnæ wēnæ mīni cædinō ante wæwente pōnente ñimpo cædinque wentamō mīni mongænō mīni ñä mēnongaquinque Wængonguï gāmænō pōedāni. ²⁰ Mönö Awēnē weca mīni wampo pōnenguinque pōedāni. Ayæ Wængonguï, Mīnitō Codito poncæcäimpa, ante do nānō angaingä inongä inte Itota mīnitō weca poncæcäimpa, ante tōmengä gāmænō pōedāni.”

²¹ “Incæte edæ, Tōmancoo do ingaï bai adobaï bacoocæimpa, ante Wængonguï badoncæcäimpa, ante tæiyæ waēmō ingaināni Wængonguï beyæ doyedē apænegadānimpa. Wængonguï mänōmaï nānō badompoga Itota iñömō mänimpoga öönæde quēwencæcäimpa anguēnē. ²² Edæ Möitee wodi, ‘Botō wænte gobo ate mīnitō Awēnē Wængonguï wæatē mīnitō beyæ cædinque mīni cabo iñōmīnite adocanque ingante apænte Ao ante æncæcäimpa. Tōmengä ingante äninque, Möitee wodi botō beyæ nē apænecä ingaingä bai bitō adobaï edæ botō beyæ nē apænebi bacæbiimpa, ancæcäimpa. Wængonguï mönö Codito ingante mänōmaï angä iinque tōmengä wæatē nē apænecä bagacäimpa. Iinque mīnitō iñömō tōmengä quiēmē ante apæneyongä ēamonca ongonde tōmänō ante eñencæminimpa. ²³ Iinque edæ mäningä Wængonguï beyæ nē apænecä ingante æcānō eñēnāmaï ina iñömō, tōmengä guidēnāni weca quēwēnāmaï edæ wæncæcäimpa,’ ante Möitee wodi

apænegacäimpa,” ante Pegodo apænecantapa.

²⁴ Ayæ apænedinque Pegodo, “Æpodänidö Wængongui beyæ nê apænegainäni inäni. Edæ tömënäni Tämöedo tönö ayæ pönäni tönö tömänäni adoyömö apænedinque Codito ñowoönæ nänö cädö ante apænegadänimpa. ²⁵ Ìninqe mìnitö guiquënë Wængongui beyæ nê apænegainäni wëmïni inömïni inte tömënäni nani angainö ante nê ænguimïni iminipa. Ayæ edæ Wængongui, Botö pönö cæbo ate Ao ämïni Ìninqe mönö godongämæ waa cæcäimpa, ante nänö angainö ante mìnitö edæ mïni quëwenguinque ëñente quëwencæminimpa. Abadäo wodi ingante apænedinque Wængongui, ‘Abadäo ëñemi. Mìnitö mïni quëwencabo tönö wadäni tömämæ quëwënäni nani cabo nani cabo tönö tömämïni ìñöminite bitö Pæingä pönö waadete cæcä beyænque waa quëwëninque tocæminimpa,’ ante apænegacäimpa. ²⁶ Wængongui, Botö Wengä pönö aa pecä ëñëninque mìnitö wæætë wënæ wënæ cæte mïni gogainö ocæ ëmænte wadæ pöninque wæætë waa quëwenguinö cægöninque waa tocæminimpa. Ante cædinque tömengä täno mìnitö beyæ ante tömengä ingante nê cædongä mönö Codito ingante da pönongä pongacäimpa,” Ante Pegodo ìninqe apænegacäimpa.

4

Pegodo tönö Wäö awënëidi weca gongænte apænedapa

¹ Pegodo tönö Wäö tömänäni inänite tæcæ apæneyöna wadäni tömëna weca mäo godongämæ pönänitapa. Ìnäni ìñömö nê, Wængongui qui, ante

godōnāni tōnō Tadoteoidi tōnō Wængonguī oncō ñænæncō ante nē wææ wānōnāni awēnē tōnō mǎnināni pongadānimpa. ² Itota ñāni ōmæmongā bai mōnō adobai ñāni ōmæmongæimpa, ante Pegodo tōnō Wāo apænedapa, ante do wædōnāni inte tōmēnāni ñōwo pīinte māmō pōnānitapa.

³ Pōninque tōmēnāni iñāna inate bæi ongōnānitapa. Ayæ wēmō ba iinque baānæ ate nāna taquinque tōmēna inate tee mōnedāni guuidatapa. ⁴ Incæte tōmēna āna nē eñēnīnāni guiquēnē pancadāniya nanguī ināni incæ nē pōnēnāni bagadānimpa. Iinque onguīñænāni nāni nē pōnencabo iñōmō wodo tinco miido ganca ināni mǎnimpodāni bai bagadānimpa.

⁵ Baānæ ate oodeoidi awēnēidi tōnō tōmēnāni inānite nē aadāni nāni Picæncabo tōnō nē odōmōnāni tōnō Eedotadēē iñōmō godongāmæ ponte ongōnānitapa. ⁶ Wængonguī quī, ante nē godongā ñænængā pōni Ānato ponte a ongōñongā tōmengā guuidēnāni Caiapato Wāo Adecantodo tōnō wadāni tōmengā guuidēnāni incæ tōmengā weca godongāmæ pō guuidānitapa. ⁷ Pō guuidinque edæ Wāo tōnō Pegodo inate tæcæguedē māmō gōnōnāni gongæñōna ānānitapa.

—Minatō æcānō tōnō tæi pīñænte cæmīna ate cōmāwadingā waa bawacantawo. Edæ æcānō emōwo apænete cæmīnai.

⁸ Ante āñōnāni Pegodo iñōmō Wængonguī Tæiyæ Waēmō Ōnōwoca tōnō apænedinque,

—Awēnēidi imīni eñēedāni, nē aamīni mīni Picæncabo eñēedāni. ⁹ Cōmāwaingā æbānō cæte waa bawacāi, āmīnitawo. Edæ cōmāwaingā ingante mōna waa cædi beyænque mīnitō ñōwoōnæ

pönö apænte ämīni awædö. ¹⁰ Īnīnque mīnitö tönö idægoidi wadāni tönö botö tōmāmīni ĩmīnite adoyōmō apænebo ēñencæmīnimpa. Itota Codito Nāatadeta quēwēningā ingante awæ ñænquedīmæ cæte mīni nē wænōningā ingante Wængonguī angā do ñāni ömæmongacāimpa. Tōmengā adocā Itota emōwo beyænque cōmāwaingā ĩningā tæi piñængā badinque mīnitö weca a ongongā apa ānewēmīnii. ¹¹ Edæ wainca nē mænōnāni nāni wido cædinca incæ wacā, Tæcæ manca pōni tæi manguimpa, ante cōnongampa. Itota ĩñōmō māninca bai ææmōnga pōni ongongampa.

¹² Īnīnque Itota, Quēwencæmīnimpa, ante mōnō ĩmonte ængā bai wacā ædö cæte adobai ænguingā. Itota emōwo beyænque quēwencæmīnimpa, ante pönö cægāingā ĩte Wængonguī wæætē, Wawo adobai ĩ, ante dicæ pönö cæcantawogaa. Īñæmpa inguipoga tōmāmæ ĩñōmō edæ æcāmenque incæ adobai nē tæi piñænte emōnongā ĩñōmō edæ dæ angampa, ante apænedatapa.

¹³ Ayæ Pegodo tönö Wäö önōnaque ĩna ĩte nanguī adāmai ĩna incæte edæ guññēnāmai edonque apænedapa, ante adinque tōmēnāni, Æbānō cæte edæ do ēñēnatawoo, ante wædinque, Itota miñæ nē godina ĩte do ēñēnapa. Nāwangā impa, ante wædānitapa. ¹⁴ Edæ cōmāwadingā ĩningā tōmēnāni weca a ongongā adinque tōmēnāni ædö cæte wadö ante tedequinānii. ¹⁵ Īnīnque tōmēna ĩnate, Mōnitö godongāmæ Apænte Äincabo weca ongōnāmai godōmenque goeda, ānāni goda ĩnīnque, Tōmēna ĩnate æbānō cæquīi, ante pōnēninque godongāmæ tedecōnānitapa. ¹⁶ Īimai

ante apænedänitapa.

—Mänina inate quino cæquimöö. Ìnæmpa tömëna tæi piñænte bamönengæ cædatapa, ante Eedotadëe quëwënäni, Näwangä impa, ante tömänäni do ëñënanipa. Ìninqe, Waa cædämaï inatapa, ante mönö ædö cæte anguii. ¹⁷ Incæte mäninö näni apænedö ante wadäni wii godömenque ëñencædänimpa, ante wææ cædinque mönö tömëna inate wææ angæimpa. Mänii ëmöwo ante minatö mina wæquinque apænemina. Wacä æcämenque ingante apænedämaï imæweda, ante mönö wææ angæimpa, ante nämäneque tededänitapa.

¹⁸ Ayæ iinque tedinque Wäö tönö Pegodo inate añete mämönäni pöna adinque tömëna inate wæætë, Ëñenguënë quëwëmïnaa, änänitapa. Edæ mina panguinque ante Itota ëmöwo ante apænemina. Ìncayæ ate tömengä ëmöwo ante apænedinque edæ adopoque incæ odömönämaï imæweda. ¹⁹ Ante añönänite Pegodo tönö Wäö wæætë,

—Ìnæmpa æcänö ingante ëñente cæquimöna, ante pönëminii. Minitö änö ëñëninque wæætë Wængongui nänö änö ëñënämaï inte cämöna adinque Wængongui edæ, Nö cämïna abopa, anguingää. ²⁰ Edæ möna adinö ante möna ëñënö ante ædö cæte apænedämaï inguimönaa.

²¹ Ante apæneda ëñente wædinque awënëidi wæætë, Mini panguinque, ante ancaa apænedänitapa. Incæte wadäni, Cömälingä ingante Wængongui waa pönï cæcantapa, ante watapæ apænedäni ate wædinque awënëidi wæætë Wäö tönö Pegodo inate pancæte ante

cædinäni inte, Ìñæmpa waodäni püinäni ïninqe mönö æbänö cæte panguimöö, ante guiñente wædinque pänämaï inte ñimpo cædäni godatapa. ²² Edæ waa nē bawadingä ïñömö do coadenta wadepo ayæ godömenque tömengä nänö eñadi ïñonte Wængonguï bamönengæ cæcä waa bacä adinque tömänäni ædö cæte wadö ante pönenguinänii.

Wede pönente tæi piñænte cæcæmönimpa, ante Wængonguï ingante apænedänipa

²³ Mänii ñimpo cædäni godinque Pegodo tönö Wäö ïñömö tömäna tönö godongämæ pönänäni weca ponte apænedinque, Wængonguï qui, ante nē godönäni ñænænäni tönö nē aadäni näni Picæncabo ïñömö mönatö imönate iïmaï änäni wætamönapa, ante tömänö ante adodö ante apænedä. ²⁴ Eñëninque tömënäni näni pönencabo adoyömö pönëninque Wængonguï ingante adotedæ tedete apænegadänimpa. “Awënë Wængonguï eñëmi. Tæiyæ Awënë ïnömi inte bitö öönæ owocoo tömancoo inguipoga tömämæ gäwapæntibæ tömämæ badöninque öönæde owodäni yæipodë quëwënäni gäwapäa owodäni æyömömë quëwënäni tömänäni ïnänite bitö adobique badongabiimpa. ²⁵ Ìninqe mönitö mæmæ Dabii wodi ingante apænedinque bitö, Dabii eñëmi, Bitö botö imote nē cædömi ïñömite botö Tæiyæ Waëmö Önöwoca apænecä eñëninque bitö wæætë iïmaï ante apænecæbiimpa.

‘Wadäni nē eñënämaï ïnäni incæ quinante ænguï badinque wido cæcæte ante cædänii.

Waodäni näni cabo waodäni näni cabo incæ
idiquibæ ante quinate pönänitawo.

²⁶ Inguipoga awënë odeyeidi, Wido cæcæimpa,
ante tæi gongænte ongönänpa.

Pancabaa awënëidi adobaï, Æbänö cæquimöö, ante
godongämæ pönëninque

mönö Awënë ingante ayæ tömengä nänö nē
öni pæcadongä Codito ingante piinte
änewänänpa töö,' ante apænebi ëñëninque
mæmæ Dabii wodi wæætē bitö beyæ
apænegacäimpa.”

²⁷ Ante Wængonguï ingante apænedinque
ñowodäni näni pönencabo godömenque
apænedänitapa. “Wængonguï ëñëmi. Tömëmi
Wengä bitö Tæiyæ Waëmö inongä iñongante
bitö, Botö imote nē cæbi bacæbiimpa, ante öni
pæcagabiimpa. Näwangä impa. Incæte bitö imite nē
cædongä iñongante Itota bitö nē öni pæcadongä
ingante edæ Edode tönö Pontio Pidato tönö
idægoidi tönö wadäni tönö piinte adoyömö ponte
möni quëwëñömö incæ ongöninque bitö imite nē
cædongä ingante, Æbänö cæte wido cæquiï, ante
do cædänitapa. ²⁸ Edæ bitö tæi piñæmi inömi inte
nämä pönëninque edæ, Iïmaï baquinö angüenē,
ante do angabiimpa. Tömënanï guiquenē bitö
angainö baï wæætē cædinque piinte pö gongænte
cædänitapa. ²⁹ Nöwo iñömö bitö imite nē cæmöni
iñömönite ñowodäni pönö piinte änäni ate wædinque
bitö wæætē pönö cæbi ate mönitö tæi piñëninque
bitö änö ante guiñënämaï apænecæmönimpa.
³⁰ Ayæ nē wënæ wënæ inäni inänite bitö önompoca
pönö gampobi ate waa bacædänimpa, ämönipa.
Ayæ bitö Wengä Itota Tæiyæ Waëmö iñongante

mönitö tömengä ëmowo apænedinque, Wadäni pönencädänimpa, ante mä cædinque bamönengæ cæmöni adinque tömënäni guiñente wæcädänimpa ämönipa,” ante Wængongui ingante apænedänitapa.

³¹ Ìnque apænedäni ate tömënäni näni godämæ ongöñömö incæ iñontobæ ocæ ocæ cætapa. Cæyö tömänäni inänite Wængongui Tæiyæ Waëmö Önöwoca pö guicä æninque ædæmö ewocadinque tömënäni Wængongui nänö änö ante guiñenedämaï inte edonque apænegadänimpa.

Tömämö mönö quincöo impa, ante cædänipa

³² Ayæ tömänäni näni pönencabo incæ tömënäni näni ewocadö adodö ewocate bai inäni inte mimönë adodö ante pönëninque tömënäni ëadincoo incæ, Botö qui impa, ante änämaï inäni inte, Tömämö mönö qui impa, ante pæ gompodämaï inönänimpa. ³³ Ayæ Itota nänö da godongainäni iñömö tæi piñænte apænedinque, Itota Codito ñäni ömæmongantapa, ante cöwë näni apænedi bai apænedönänimpa. Edæ Wængongui tömënäni inänite waadete pönö cæcä ate watapæ quëwënönänimpa. ³⁴ Ayæ tömënäni näni cabo incæ æcämenque ömæpocä i iñömö edæ dæ angantapa. Edæ ömæ näni ëadi incæ godonte æninque oncö mænonte näni ëadi incæ godonte æninque tömënäni näni godonte æninta ænte pöninque ³⁵ Itota nänö da godongainäni weca ænte mämö ñö cædäni æninque tömënäni wæætë ömæpodäni inänite godönäni eyepæ eyepæ ænönänimpa. ³⁶ Ìninque Itota nänö da godongainäni iñönäni adocanque Debiï wodi pæingä Ootee ingacäimpa. Tömengä iñömö, Wadäni wampo

pönente quëwencædänimpa, ante nē ædæmō apænedongä iñongante wadäni tömengä ingante Bedënabee ante pönō pemongadänimpa. Íngä Ootee Bedënabee näni pemöningä iñömō Tipidebæ quëwente pöningä inte edæ, ³⁷ tömengä ömæ ëadī godonte æninque tömengä nänō godonte æninta Itota nänō da godongainäni weca mämō ñō cægacäimpa.

5

Änäniya tönō Tapidæ

¹ Mäniñedē Änäniya näni änogä tömengä nänöogængä Tapidæ tönō tömënäni näni cæi bai cædinque ömæ näna ëadīmæ godonte ænatapa. ² Ayæ nänöogængä ëñëñongä tömëna godonte näna æninta incæ Änäniya iñömō pancataa pæ gompote æninque wæætē pancataa ænte mämō Itota nänō da godongainäni weca ñō cæcantapa. ³ Ñō cæcä adinque Pegodo,

—Änäniya ëñëmi. Tatäna ingante ædæmō entawëmi inte ömæ beyæ bitō æninta pancataa, Botō quī, ante awëmō ñō cædinque edæ pancataa ænte mämō ñō cædinque bitō, Tömanta impa, ante quīmæ änewëë. Iñæmpa, babæ cædīmi inte bitō Wængonguī Tæiyæ Waëmō Önöwoca ingante babæ ämipa töö. ⁴ Edæ bitō ömæ ini incæ bitō quī cöwë intapa. Ayæ ñöwo mäninta æninque, Æbänō cæquī, ante tömëmi nē ämi ïmitapa. Íninque edæ mīmōno pönëninque quīmæ wapiticæ cæbitawo. Bitō mänömaī cædinque waodäni inänite wīi

babæ apænedinque Wængonguï ingante babæ apænebitapa töö.

⁵ Angä eñente wædinque Änäniya iñömö tæ wæente æmæwo wængantapa. Wængä adinque tededäni eñëninque tömänäni guñente wædänitapa.

⁶ Wængä ininque edëninäni ponte wïni caate næente mæo daga wënänitapa. ⁷ Dobæ wængä ate todee ooda go ate tömengä æbänö wængä ante eñënämaï iningä inte tömengä nänöogængä incæ pö guicä. ⁸ Adinque Pegodo tömengä ingante,

—Apænebi eñëmoe. Minatö ömæ godöninque mänimpota æminatawo. Äñongä,

Ao, mänimpota.

⁹ Angä eñëninque Pegodo wæætë,

Minatö iñæmpa edæ guëa pönëninque, Mönö Awënë Önöwoca æbänö panguingää, ante quimæ cæminatawo. Edæ bitö nänöogængä baö inï nê daga wëninäni incæ do dao dao pönäni eñëmii. Edæ bitö baö adobaï ænte gocædänimpa töö.

¹⁰ Tæcæ ante äñongä onquiyængä iñömö tömengä önöwa gäänë tæ wæëninque näñe wængantapa. Wængä ate mänii edëninäni pö guiite ayönäni dobæ wæente a öñongä adinque tömengä baö inï æninque tömengä nänöogængä wodido gäänë mæo daga wënänitapa. ¹¹ Mänömaï näñe wænapa, ante tededäni eñëninque Codito ingante näni nê godongämæ pönencabo tönö wadäni tömänäni ancai guñente wægadänimpa.

Ate eñencædänimpa, ante bamönengæ nanguï cædänipa

¹² Mäniñedë Itota nänö da godongainäni iñömö Wængonguï Önöwoca tönö cædinque, Ate

pönencädänimpa, ante wadāni ayönāni mā cædinque bamönengæ nanguï cædönänimpa. Ayæ adoyömö pönëninque tömänāni Wængonguï oncö Tadömöö yabæcönë nāni ānoncönë pö guii pö guii cædönänimpa. ¹³ Wadāni tömënāni inānite adinque, Nē pönënāni waa quëwënāni inānipa, ante pönënāni incæte guĩñente wædinque godongāmæ pö guiidāmaï gomö adönänimpa. ¹⁴ Pancadāniya guiquënë onguĩñænāni tönö onquiyænāni tönö nanguï ināni mönö Awënë ingante ñowo pönënanitapa. Īināni iñömö do pönënināni tönö adocabodāni bacoo ināni bagadänimpa. ¹⁵ Īinque mänī bamönengæ cædāni adinque wadāni wënæ wënæ ināni inānite ænte pöninque möimoga möincodë ñö cædänitapa. Edæ, Pegodo nænque pämo wodo pänta goyongä tömengä gänëñömö öñöninque adocanque adocanque waa bacædänimpa, ante cædinque Pegodo nānö goquïnö ante ænte māmö ñö cædāni öñönänitapa. ¹⁶ Ayæ adobaï Eedotadëë eyequeï wayömö nāni quëwëñömö wayömö nāni quëwëñömö quëwëninque wadāni wënæ wënæ ināni inānite næænte māmö næænte māmö cönönāni ate tömänāni waa badänitapa. Ayæ wënæ nē wentamö ëwocadāni inte yewænte wæwënāni inānite adobaï ænte māmö pöninque waa badänitapa.

Itota nānö da godongaināni inānite piinte tee mönedänipa

¹⁷ Wængonguï qui, ante nē godongä ñænængä pönī inongä tönö wadāni tömengä tönö godongāmæ cædāni incæ Tadoteoidi inönāni inte, Nāni ömæmönāmaï ingæimpa, ante nē pönënāni

inönänimpa. Īninqe Itota nānō da godongaināni mǎnōmaī waa cǣdāni ate wǣdinqe awēnē tōnō Tadoteoidi iñōmō tōmēnāni inānite piinte agadānimpa. ¹⁸ Īninqe Itota nānō da godongaināni inānite yao ongonte æninqe tōmānāni ayōnāni tee mōnedānitapa. ¹⁹ Tee mōnedāni wǣcōñōnānite Wǣngonguī anquedo woyowotæ ponte odemō wi ænete mantacā tayōnānite apǣnecantapa. ²⁰ “Goedāni. Wǣngonguī oncō ñænæncō yabæcōnē go guiite næ gongæninqe mīnitō mǎniñōmō pōnāni inānite apǣnedinqe, Wǣngonguī pōnō cǣcā beyænque mōnō quēwengæimpa, ante ædæmō apǣnemīni eñencǣdānimpa.” ²¹ Angā eñente cǣdinqe tōmēnāni baōnæ ñāō bayonte Wǣngonguī oncō ñænæncō yabæcōnē do go guidinqe odōmonte apǣnedāni eñēnānitapa.

Mǎnōmaī do go guiite apǣnedānipa, ante eñēnāmaī ināni inte edæ, Wǣngonguī quī, ante nē godongā ñænængā pōni inongā guiquēnē tōmengā tōnō godongāmæ cǣdāni tōnō adoyōmō pō guidānitapa. Pōninqe tōmēnāni idægoidi inānite nē aadāni Picænāni godongāmæ nāni Apǣnte Änoncabo tōmānāni inānite añete pōnānitapa. Īnāni wǣætē tontadoidi awēnēidi inānite āninqe, Mīnitō tee mōneincōnē gote Itota nānō da godongaināni inānite añete māmōmīni poncǣdānimpa. ²² Änāni tee mōneincōnē gote ayōnāni edæ dæ ānāni ante wǣdinqe wǣæ wānōnāni awēnēidi gode ancæ pōninqe, ²³ iīmaī ante apǣnedānitapa.

—Gote ayōmōni oncō ædæmō tee mōnete in-tapa. Ayæ tontadoidi odemō pōni a ongōnāni adinqe mōnitō go wi ænete guiyōmōni edæ dæ

änāni ate wædinque wadæ pömönipa. ²⁴ Ante ted-
edāni eñëninque, Wængongui qui, ante nē godönāni
ñænænāni tönō Wængongui oncō ñænæncō ante
nē wææ wänönāni tæiyæ awënë tönō guiñente
wædinque, Ñöwo quiëmē bai bacæimpa. ²⁵ Ante
wæyönāni wacā do pō guiddinque tōmënāni inānite,
—Aquënë quëwëmini. Mänināni mini tee
mōnedināni incæ Wængongui oncō ñænæncō
yabæcönē go guiite a ongöninque mäninñömō
pönāni inānite odömōnte apænedāni eñënāni
ataqueedāni.

²⁶ Ante apænecā eñente wædinque wææ
wänönāni awënë tōmengä nänō wææ wänoncabo
tönō Itota nänō da godongaināni inānite æncæ
godinque, Godongämæ ongönāni incæ piinte
tacadāni wæcæ wæ, äninque pänāmaï inte ee ænte
pönānitapa. ²⁷ Ænte pöninque nē aadāni Picænāni
godongämæ nāni Apænte Änoncabo weca ænte
mämō gönönāni gongæñönānite, Wængongui qui,
ante nē godongä ñænængä pönī inongä inñömō
tōmënāni inānite angantapa.

²⁸ —Mäningä Itota emöwo apænedinque
wadāni inānite odömönāmaï imæwedāni, ante
ancaa antamönipa töö. Incæte minitō mänine
mini odömōnte anewënō ante Eedotadëe tōmäo
odömōnte apæneminipa. Ayæ godōmenque
tedewëninque minitō, Mäningä nē wængaingä
ingante awënëidi nē wënæ wënæ cædināni inānipa,
ante mōnitō imōnitedō ante anewëminipa töö.

²⁹ Ante nē ñænængä püñongä Pegodoidi wæætë,
—Mōnitō quiquënë waomini iminite
eñënāmaï inte Wængongui ingante eñente
cæquënemōni imönipa. ³⁰ Minitō Itota ingante

ñænquedimæ timpote wænömïni wængä ate mönö wæmæidi Wængongui incæ angä ñäni ömæmongantapa. ³¹ Ayæ në ñäni ömæmönigä ingante apænedinque Wængongui, Bitö, Quëwencæðänimpa, ante në Æmi bacæbiimpa, angacäimpa. Në Æmi iñömite idægoidi tömänäni, Idæwaa wënæ wënæ cæte quëwente awædö, ante botö gämænö poncæðänimpa, ante cæcæbiimpa. Bitö æmi beyænque botö tömënäni inänite pönö waadete ñimpo cæcæboimpa. Ante cædinque edæ Itota nänö Awënë baquinque Wængongui æmonga ænte mæicä æidinque Wængongui tömëmæ inö tæ contate ongongampa. ³² Itota ingante Wængongui ænte mæicä æigacäimpa, ante në adimöni inte mönitö mäninö ante në apænemöni imönipa. Ayæ në eñëmö cæmö iñömonte Wængongui tömengä Tæiyæ Waëmö Önöwoca ingante da pönongä ænte ewocamompa. Tömengä Önöwoca adobaï mönitö tönö godongämæ në apænecä ingampa, ante Pegodoidi apænedänitapa.

³³ Mänömaï apænedäni eñëninque awënëidi ængui badinque tömënäni inänite edæ wænoncæ cæðänitapa. ³⁴ Mäniñedë adocanque Paditeocä incæ tömengä emöwo Gämadiedo tömënäni nani wææ angainö ante në eñengä iñongante tömänäni tömengä ingante waa adönänimpa. Ìinque tömënäni nani Apænte Äincabo wænoncæ cæyönäni mäningä iñömö tömënäni nani në waadecä inongä inte ængæ gantidinque, Itota nänö da godongainäni inänite oncodo mantamïni wantæ ongoncæðänimpa. ³⁵ Angä dæ godäni ïinque Gämadiedo wæætë awënëidi inänite

apænecantapa.

—Idægoidi eñeedäni. Mäninäni inänite æbänö cæquii, ante ædæmö pönente ate edæ ee cæedäni. ³⁶ Edæ doyedë wacä Teodo adobaingä ængæ gantidinqe, Botö në nangui cæbo imopa, ante añongante edæ tömengä miñæ coatodo tiento ganca inäni godänitapa, ante pönëedäni. Tömengä ingante wadäni mao wænönäni wængä ate tömengä emiñæninäni wæætë näwæ godäni ate edæ dæ batimpa. ³⁷ Ayæ ate edæ awënë, Minitö emöwo ponte yewæmoncæminimpa, ante nänö aniñedë wacä Gadideabæ quëwëningä Oodaa adobaï awënë ingante wido cæcæte ante ængæ gantiyongä nangui inäni tömengä miñæ goyönäni tömengä ingante wænönäni wængä ate näwæ adobaï gogadänimpa. ³⁸ Ìninqe, Mänömaï batimpa, ante pönente cæedäni. Nöwo iñömö iinäni adobaï ængæ gantidäni adinqe minitö tömënäni inänite ee ate gomö aedäni amopa. Tömënäni waodänique inte cædäni bai ædö cæte cæquinänii. Edæ dæ bacæimpa. ³⁹ Wæætë Wængongui angä eñente cædäni bai minitö ædö cæte Baa ante wido cæquimīnii. Edæ minitö mänömaï cædinque Wængongui ingante pūmīni inte wæbaimīnīpa.

Ante wææ angä eñente wædinque Ao ante tömengä nänö änö bai cædänitapa. ⁴⁰ Itota nänö da godongainäni inänite aa pedäni pönäni ate awënëidi, Pædäni, änäni eñëninque në wææ wänönäni æmontaimenca tæi tæi pänänitapa. Ayæ awënëidi godömenque, Itota emöwo ante apænedämaï imæwedäni, ante äninque Itota nänö da godongainäni inänite ñimpo cædäni godänitapa.

41 Nē Apænte näni Äincabo weca ongonte tao godinque tömēnāni wæætē, Wængonguī mōnō imonte adinque, Botō Wēñængä émōwo beyæ wadāni wēnæ wēnæ änāni ate mīnitō eyepæ inte caate wæcæmīnimpa, ante do cæcampa, ante pōnēninque edæ nanguī togadānimpa. 42 Īninque Wængonguī oncō ñænæncō yabæcōnē incæ waodāni oncōnē incæ tömēnāni ñimpo cædāmaī inte cōwē go guī go guī cædinque cōwē odōmonte apænedinque, Itota tömengä näwangä mōnō Codito ingampa, ante watapæ apænedāni ēñengadānimpa.

6

Ticete ganca ināni nē nēnempodāni badānipa

1 Itota ingante nē tee empote quēwēnāni māññedē nanguī ināni badāni ate pancadāniya guidiego tededō nē tededāni iñōmō ebedeo tededō nē tededāni inānite pīnte āninque, Mīnitō mīni cabo owæmpoīnāni inānite iimō iñō iimō iñō cænguī eyepæ godōninque mōni cabo owæmpoīnāni inānite pōnōnāmaī imīnipa tōō, ante änāni. 2 Itota nānō nē da godongaināni iñōmō dote ganca ināni iñōnānite wadāni, Dote inānipa, ante pemonte baī apænedōnānimpa. Īnāni iñōmō guidiegoidi mānōmaīnō ante wædānipa, ante ēñente wædinque wadāni Itota ingante nē tee empote quēwēnāni inānite añete godongāmæ pōnāni ate tömēnāni inānite,

—Wængonguī nānō apænedō ante nē apænequēnēmōni inte mōnitō ædō cæte mōni cæquēnēnō ante ñimpo cædinque cænguinque ante godonguīmōnii. 3 Īninque botō tōññamīni

ēñēdāni. Mīni pōnencabo nāmā cōwā adinque, Æcānō æcānō Wængonguī Ōnōwoca tōnō āawocaque bai ēwocate nō cædāni inānii, ante adinque mīnitō tiæte ganca ināni mānimpodāni inānite apænte æedāni. Apænte æmīni adinque mōnitō tōmēnāni inānite, Cænguī nē godōmīni bacæmīnimpa, āmōni ēñente cæcædānimpa. ⁴ Mōnitō wæætē Wængonguī ingante cōwē apænedinque Wængonguī nānō apænedō ante godōmenque odōmonte apænedinque mānīnonque cæte quēwencæmōnimpa.

⁵ Mānōmaīnō ante ēñēninque tōmēnāni nanguī ināni inōnāni inte tōmānāni Ao ante edæ, Īināni mānōmaī inānipa, ante adinque iūmaī ēmōnāni inānite apænte ængadānimpa. Adocanque Etebā nē wede pōnengā inte Wængonguī Tæiyæ Waēmō Ōnōwoca tōnō āawocaque bai ēwocacā inongāimpa. Tōmengā tōnō Pedipe, Podocodo tōnō Nīicānodo, Timōnō tōnō Padōmēna, ayæ Antioquiya iñōmō nē quēwēningā Nīicodato. Īingā iñōmō oodeoidi nāni pōnēnō bai pōnengā inte do oodeo bai bacā inongāimpa. Mānimpodāni inānite apænte ænānitapa. ⁶ Apænte æninque Itota nānō nē da godongaināni weca ænte māmō gōnōnāni ongōñōnānite iināni iñōmō, Mīnitō nē godōmīni bacæmīnimpa, ante cædinque tōmēnāni inānite gampodinque Wængonguī ingante apænedānitapa.

⁷ Īininque Wængonguī nānō apænedō ante gode ā gode ā cædinque māo apænedāni ēñēnōnānimpa. Īininque Eedotadēē iñōmō Codito miñæ nāni tee empote quēwencabo tæiyænāni yebænte bagadānimpa. Wængonguī quī, ante nē godōnāni

incæ adobaï nanguï inäni wede pönëninque ëñente bagadänimpa.

Etebä ingante bæi ongönänipa

⁸ Etebä inñömö Wængonguï waadete pönö cæcä ate tæi piñænte ewocadongä inte bamönengæ nanguï cædongäimpa. Ayæ, Cæbo ate pönencædänimpa, ante mä cæcä adinque godongämæ ongönäni pancadäniya, Æbänö cæcää, ante wædänitapa. ⁹ Wadäni guiquënë Etebä tönö guëa wæætedö wæætë ancæte ante cædänitapa. Inäni inñömö oodeoidi inönäni incæ pancadäniya Tidënebæ quëwëninäni inñönäni pancadäniya Adecantodia inñömö quëwëninäni inñönäni pancadäniya Tiditiabæ quëwëninäni inñönäni pancadäniya Atiabæ quëwëninäni inönänimpa. Tömënanäni doyedë wadäni inänite në cægäinäni inönäni inte ñöwo abæ tawænte godinäni inönäni inte godongämæ pöninque adocabodäni bai badinäni inönänimpa. Tömënanäni odömöincö ante, Möni në Abæ Tawænte Gocabo Odömöincö impa, ante pemönönänimpa. Ininque tömënanäni pancadäniya Etebä ingante wæætedö wæætë ante cæyönäni, ¹⁰ tömengä në nö ëñënogä inte Wængonguï Önöwoca tönö godongämæ apæncä ëñëninque tömënanäni, Æ mönö wæætë ædö cæte wææ anguï, ante wædänitapa.

¹¹ Ininque në wæætedö wæætë änäni adodäni incæ wadäni inänite godö awëmö änänitapa. Minitö babæ ante i incæte, Möitee wodi ingante ante Etebä godö wënæ wënæ apæncä ëñentamönipa, ante önonque äedäni. Ayæ Wængonguï ingante adobaï tömengä godö wënæ wënæ ante babæ

apæ necä eñentamönipa töö, ante incæ äedäni, ante nē abæ tawænte godināni änānitapa. Mänömainö änāni Ao ante tömēnāni nāni angainö bai cædinque Etebä ingante ante babæ ante pīinānitapa. ¹² Mänömainö ante babæ ante pīināni eñēninque wadāni önönānique incæ nē aadāni nāni Picæncabo incæ nē odömönāni incæ tömänāni ænguī badānitapa. Mänömai ænguī badinque tömēnāni Etebä wodi ingante bæi ongonte nē Apænte nāni Äincabo weca ænte mǎo gönönāni ongongantapa. ¹³ Pancadāniya Etebä ingante ante babæ apænedinque iīmai änānitapa. Iingä iñömö ñimpo cædāmai inte cōwē Wængonguī oncö tæiyæ waēmö oncö iñonte wiwa tedewēninque tömengä godömenque Möitee wodi nānō wææ angainö ante godö wiwa ante babæ apæ necä eñentamönipa. ¹⁴ Iñömö oncö ante apænedinque adocä Etebä iñömö, Itota Näatadeta nē quēwēningä iī oncö bæ tadete wido cæcæcäimpa, ante anewengampa. Ayæ adocä Itota iñömö, Iīmai cæedāni, ante Möitee wodi nānō wææ angainö ante Ao änāmai inte edæ, Wadö ante cæquēnēmīni iiminipa, ante odömongampa, ante iingä Etebä iñömö adobai anewengä eñentamönipa töö, ante babæ apænegadānimpa.

¹⁵ Mänömai babæ apænedāni eñēninque nē Apænte nāni Äincabo incæ Etebä ingante cōwä ayönāni tömengä awinca Wængonguī anquedo nānō emönö bai emongä agadānimpa.

7

Etebä nämä wææ apæ necampa

1 Īninqe, Wængonguī qui, ante nē godongā ñænængā pōni inongā iñōmō Etebā ingante āninqe, Bitō ĩmitedō nāni ānīnō nāwangā intawoo.

2 Āñongante Etebā wæætē iīmaī ante nāmā wææ apænedinqe. “Botō wæmpoidi ēñēedāni. Botō tōniñamīni ēñēedāni. Mōnō wæmæ Abadāo wodi Mēetopotāmiabæ ayæ quēwēninqe Cadāna iñōmō ayæ quēwencæ godāmaī iñongante Wængonguī nē ñāo apāite bai ēmōnongā inte Abadāo weca ponte a ongongā agacāimpa. 3 Ayæ Abadāo ingante apænedinqe Wængonguī, ‘Bitō guidēnāni inānite ēmō cæte bitō ōmæ ēmō cæte godinqe wabæca botō odōmonguīmæca æmæwo wadæ goe,’ angacāimpa. 4 Angā ēñente cædinque Abadāo wodi māniōmæ Cadeabæ ēmō cæte wadæ godinqe Cadāna nāni quēwēñōmō ganca pōninqe quēwengacāimpa. Ayæ tōmengā wæmpo wodi wængā ate Wængonguī tōmengā ingante angā ēñēninqe Abadāo iīmæca mōnō ñōwo quēwēmæ ponte quēwengacāimpa.”

5 “Incæte Wængonguī, Tōmēmi ōmæ, ante Abadāo wodi ingante cabo incæ ōmæ pōnōnāmaī ingacāimpa. Wæætē Abadāo wodi wēñængā mæmpo ināmaī iñongante Wængonguī, iīmæ incæ bitō ænguīmæ iñonte bitō pæināni adobæ tōmāo quēwencædānimpā, ante odōmongacāimpa. 6 Ayæ godōmenque apænedinqe Wængonguī, Bitō pæināni iñōmō wabæca gote mānimæ quēwēnāni weca quēwēñōnānite iīnāni wæætē bitō pæināni inānite edæ ō ænte bai cædinque, Mōnitō beyænque cæedāni, ante nanguī ānāni wæcædānimpā. Ayæ tōmēnāni nempo wantæpiyæ coatodo tiento wadepo ganca mānimpoga quēwēñōnānite adodāni

wënæ wënæ cædäni beyæ caate wæcædänimpa.
 7 Ante Wængongui godömenque apænedinque,
 ‘Bitö pæinäni inänite nê ö ænte wënæ wënæ cædäni
 inänite botö wæætê apænte äninque pancæboimpa.
 Ayæ iincayæ ate bitö pæinäni mänïömæ tömënäni
 näni caate wædiömæ emö cæte wadæ pöninque
 iimæca wæætê pöninque botö Wængonguimo
 iñömote botö beyæ cæquïnäni inänipa.’ 8 Äninque
 Wængongui, Mönö godongämæ cæcæimpa, ante
 pönö cæbo ate minitö wæætê Ao ante eñente
 cæcæminimpa. Mänömaï ante cædinque minitö
 onguiñæminique eö togænte caate wædinque
 eñencæminimpa. Angä eñëninque Abadäo wodi
 wëñængä Itæca eñacä ate tömengä nänö eñadi
 adoque Wængongui itædê go ate tömengä ingante
 eö togængacäimpa. Itæca wodi pæte wææ Aacobo
 wæmpo bagacäimpa. Aacobo wodi pæte wææ dote
 ganca inäni tapæicä wææ mönö wæmæidi wodi
 baquinque pægädänimpa.”

9 Ante apænedinque Etebä godömenque,
 “Mäninäni mönö wæmæidi ingainäni iñömö
 tömënäni biwi Ootee ingante ante adinque piinte
 wædinque tigitamö beyænque pædæ godönäni
 ö æninque Equitobæ ænte mäodäni gogacäimpa.
 Equitobæ pöninque tömënäni godonte æncæte ante
 cædinque Ootee wodi ingante mänïñömö quëwengä
 nempo pædæ godönäni awënë beyænque cæte
 quëwengantapa. Mänömaï quëwengä incæte
 tömengä tönö godongämæ Wængongui cöwê
 cægacäimpa. 10 Ìninque Ootee wodi ingante
 nangui wiwa cædäni wæyongante Wængongui cöwê
 wææ aacä quëwengacäimpa. Ayæ Wængongui

pönō apæ necā eñēninque nē eñēnte bayongante Equitobæ tæiyæ awēnē Padaönō incæ tōmengā ingante waa adinque, Botō tæiyæ awēnē imo bai bitō wodo adobai badinque Equitobæ wædænque awēnē bacæbiimpa. Ayæ adobai botō awēnē onconcoo bitō aacæbiimpa, angacäimpa.”

¹¹ Ante apæ necā eñēñönāni Etebā godōmenque, “Māniñedē Equitobæ tōmāo Cānaāmæ tōmāo to aminte bayonte tepæmpo gæwænte wædönānimpa. Mönō wæmæidi cænguī æncæte ante cædinque ænāmaī inönānimpa. ¹² Īninque, Equitobæ cænguī ayæ mæ õñompa, ante tededāni eñēninque wæmpocā Aacobo wodi mönō mæmæidi nē baquināni inānite āninque, Botō wēmīni, Equitobæ godinque cænguī ænte pōedāni, angā mā gogadānimpa. ¹³ Gote pōninque ayæ wæætē mempoga gote a ongönāni adinque Ootee wodi incæ tōmengā mēmōidi inānite, Botō mīnitō biwīmo eñagaimō imopa, angā wægadānimpa. Ayæ, Ootee guidēnāni do pönānipa, ante tededāni eñēninque awēnē Padaönō ingante gode ānāni edonque eñengacäimpa. ¹⁴ Ayæ ate Ootee wodi tōmengā wæmpo Aacobo wodi nāni pæincabo tetenta i tinco ganca mānimpodāni añecā gogadānimpa. ¹⁵ Aacobo wodi mānōmaī Equitobæ gote quēwēninque wængacäimpa. Ayæ tōmengā pæināni wææ mönō wæmæidi ingaināni inte adobai māniñömō gote quēwente wængadānimpa. ¹⁶ Abadāo wodi wēēnēñedē, Mōnitō wodido, ante Caāmōdo wēnāni nāni ānimpota mānimpota godonte æninque Tiquemō iñömō omæ godonte ænongäimpa. Ante do againāni inte mönō wæmæidi ñowo Aacobo wodi bayetoca ingai Cānaāmæ ænte pōninque, ayæ

iincayæ ate wææ tōmengä wēnāni bayetoca ingai Abadäo wodi nānō ængaimæ tōmēnāni wodido ingaiñōmō māmō daga wengadānimpa.”

¹⁷ Ante apænedinque Etebä godōmenque apænecantapa. “Abadäo wodi ingante Wængonguī wēenēñedē nānō, Botō wantæpiyæ ate bitō pæināni inānite adodō ænte māmōmo poncädānimpa, ante nānō angaiñedē wodo iinque bayonte tōmēnāni Equitobæ quēwēninque nanguī bacoo yebænte bagadānimpa. ¹⁸ Māniñedē wacā onguiñængä ñōwocā incæ, Ootee wodi æcānō ingacāi, ante ēñēnāmaī inongä inte Equitobæ awēnē bagacāimpa. ¹⁹ Tōmengä iñōmō mōnō guidēnāni wodi inānite wapiticæ ante wēnæ wēnæ cægacāimpa. Tōmengä, Minitō wēñænāni tæcæ ēñadāni inānite wido cædāni, ante piingä ēñente wædinque mōnō wæmæidi wodi incæ tæcæ ēñadāni inānite yabæque wido yabæque wido cædāni wængadānimpa.”

²⁰ “Tōmēnāni mānōmaī nāni cægaiñedē incæ Mōitee wodi ēñate pægacāimpa. Tōmengä waēmō wēñæ iñongante Wængonguī waa acampa, ante pōnēninque mēa go adoque apāicā go ate tōmengä ingante mæmpo oncōnē pæ gompote pæpogada pæcantapa. ²¹ Ayæ, Wænōnāni wæncæ wæ, ante guñente cædinque tōmēna tōmengä ingante yabæque gāwapæ yædopæ wo cæda ongōñongante awēnē Padaönō wengä onquiyængä adinque, Botō wē, ante cædinque Mōitee ingante ænte pæpogacā pægacāimpa. ²² Mānōmaī cæcā beyæ equitoidi nāni ēñengainō ante tōmānō ante odōmōnāni ēñente pædinque Mōitee wodi nē angä baquinque nanguī cæcā baquinque tæi piñænongä inte pægacāimpa.”

23 Ante Etebä godömenque apænedinque, “Ayæ æmæwo pædinque coadenta wadepo nänö eñagaiñedē Möitee wodi, Idægoidi botö tönïñadäni inänite eñacæ gobote, ante eñacæ gocantapa. 24 Gote eñayongä, Equito onguïñængä incæ botö guidengä ingante wiwa cæcä caate wæcampa, ante adinque Möitee wodi tömengä guidengä ingante wææ cæcæte ante cædinque tiyænö tiyæ cædinque Equito onguïñængä ingante wæñongä wængacäimpa. 25 Edæ, Wængonguï botö imote äinique, Bitö idægoidi inänite ö ænte mäobi wadæ gocædänimpa, ante do angä eñentabopa, ante do eñëningä inte Möitee wodi, Idægoidi adobaï ante eñente pönencædänimpa, ante pönente cæyongä tömënäni wæætë mäninö ante eñënämaï ingadänimpa. 26 Mänömaï iïinique Möitee wodi iimö ate ponte ayongä idægoda wæætedö wæætë cæda adinque, ‘Iñäna, mïna guidencaya incæ wacä ingante quimæ wënæ wënæ cæte quëwëmïnaa.’ 27 Ante, Guëa waa waadete quëwencædaimpa, ante cæyongä adocanque tömengä guidengä ingante në wënæ wënæ cædingä guiquënë Möitee wodi ingante bæ tadinque angantapa. ‘Iñæmpa, Bitö mönitö awënë inömi imipa, ante, Në apænte ämi imipa, ante æcänö bitö imite në änaï. 28 Edæ Equito ingante iimö bitö wænömi bai ñowoönæ adobaï botö imote wænoncæte ante pönëmi awædö.’ 29 Angä eñente wædinque Möitee wæætë wodii winongacäimpa. Wodii winonte wabæca Mäadiämæ gote wadäni ömæ quëwëninque wëñæna mënaa wæmpocä bagacäimpa.”

30 Ante apænedinque Etebä godömenque

awënëidi inänite iimaï ante apænecantapa.

“Ayæ wæætë coadenta wadepo go ate Möitee wodi önömæca cægöningue onquiyabo Tinaiquidi gämænö gote dadi emænte ayongä ocãñequiwæ gonga bæcoyömö Wængongui anquedo ponte a ongongä agacäimpa. ³¹ Ate wædingue Möitee wodi, Quinö bai inte bæco ante botö wiimonte bai aboo, ante acæte ante pönömenque pöñongante mönö Awënë tömengä ingante iimaï ante apænecäimpa. ³² ‘Bitö wæmæidi Wængonguimo inömo inte botö Abadäo wodi Itæca wodi Aacobo wodi Wængonguimo inömo imopa.’ Ante apænecä ëñente wædingue Möitee wodi do do wæate guiñente wædingue, Wiï aïnente awædö, ante cægacäimpa. ³³ Mänömaï cæyongante mönö Awënë wæætë, ‘Bitö næ gongænte ongöñömö botö adoyömö ongömo beyænque onguipoi tæiyæ waëmö impa, ante pönëningue bitö awæncata gä tadöwæ ämopa. ³⁴ Botö edæ cöwä adingue, Botö quinäni inänite equitoidi æbänö wænæ wænæ cædänii, ante do abopa. Tömënanï caate ö ö wædäni do ëñente wædingue botö, Ñimpo cæbo ate abæ tawænte gocædänimpa, ante wææ pömo imopa. Ñöwo iñömö edæ ægodöe. Botö, Equitobæ gocæbiimpa, ante bitö imite adodö da godömo gocæbiimpa,’ ante Wængongui Möitee wodi ingante angacäimpa.”

³⁵ Ante apænedingue Etebä iimaï ante godömenque apænecantapa. “Adocä Möitee ingante püningue idægoidi doyedë, ‘Iñæmpa, Bitö mönitö awënë inömi imipa, Næ apænte änömi imipa, ante æcänö bitö imite në änaï,’ ante änönänimpa. Ñöwo iñömö Wængongui anquedo ocãñequi iñömö

pöningue tömēnāni nāni nē pīngaingā adocā Möitee ingante, Bitö idægoidi awēnē bacæbiimpa, angacäimpa. Bitö tömēnāni inānite ö æningue ænte māobi abæ tawænte gocædānimpa, ante cædinque Wængonguī bitö imite da godongā gocæbiimpa, ante Wængonguī beyæ apænedinque Wængonguī anquedo angacäimpa. ³⁶ Möitee iñömö, Ate pönencædānimpa, ante mā cædinque ayæ Wængonguī tönö bamönengæ nanguī cædinque idægoidi inānite ænte māocā gogadānimpa. Equitobæ emö cæte wadæ pöningue gāwapæntibæ Opatawæmæ yæwedecapæ pö ongöningue adocā Möitee mantacā imæmäa pongadānimpa. Önömæca ta pöningue coadenta wadepo ganca cægöñnāni tömengä, Ate pönencædānimpa, ante mā cædinque bamönengæ nanguī cægacäimpa,” ante Etebā wodi apænecantapa.

³⁷ Ayæ, “Adocā Möitee, Idægoidi eññedāni. Botö Wængonguī beyæ nē apænebo imo bai wacā edæ mīnitö tönīñacā incæ adobaī edæ Wængonguī beyæ nē apænecā bacæcäimpa. Tömengä ponte apænecā eññeningue mīnitö tömengä ingante ædæmö eññente cæcæminimpa, ante Möitee wodi apænecäcäimpa. ³⁸ Godongämæ nāni Wængonguī ingante apæneincabo tönö Möitee wodi önömæca cægönongäimpa. Mönö mæmæidi tönö cægöñnāni Wængonguī anquedo wēenēñedē Tinaiquidi nē ponte äningä incæ adocā tönö Möitee wodi önömæca cægönongäimpa. Māniñedē mönö imonte ante pönö cædinque Wængonguī, Möitee eññemi, angacäimpa. İncayæ quēwenguīnāni eññente quēwencædānimpa, ante cædinque botö,

Minitö cæte quëwenguimīni, ante apænebo ëñëninque bitö adodö ante yewæmoncæbiimpa, ante apænegacäimpa,” ante Etebä apænecantapa.

³⁹ Ayæ, “Möitee wodi mänömaï cæyongante mönö wæmæidi guiquënë ëñënämaï inäni inte tömengä ingante Baa äninque Equitobæ mönö adodö gocäimpa, ante önöwënenque pönente wægadänimpa. ⁴⁰ Mänömaï nē wædönäni inte tömënäni wæætë Aadöo wodi ingante apænedinque, ‘Aadöo ëñëmi. Mäningä, Equitobæ nē ëmö cæte mönö imonte mämöningä Möitee wodi ædönö gote dæ angää, ante adämaï imönipa cæbii. Wængonguïdi inänipa, ante mönö imonte nē töo æmænte ænte goquïnäni ante bitö badömi æmönie.’ ⁴¹ Äninque mäniñedë, Mönö wængonguï ingampa, ante cædinque tömënäni wagada wë bai badongadänimpa. Ayæ, Mönö wængonguï quï impa, ante cædinque cænïnäni wænöninque baö tömënäni näni badöinca gäänë ænte mämö ñö cædinque önompoca näni badöinca adinque ææmæ bai cæte togadänimpa. ⁴² Mänömaï cædäni ate wædinque Wængonguï näëmæ, Pönë cæmīniyaa, ante pïngacäimpa. Ayæ, Ìinäni öönædë owocooque ante, Wængonguïdi inänipa, ante oda cæcædänimpa, ante cædinque idægoidi inänite ñimpo cædinque dadi ëmæninque aadämaï ingacäimpa. Edæ mäninö tömënäni näni cægainö bai ante pönente yewæmöninque wacä wantæpiyæ ate Wængonguï beyæ iïmaï ante yewæmongacäimpa.

‘Idægoidi ëñëedäni. Önömæca gote coadenta wadepo ganca cægöninque minitö,

Wængonguï quï, ante pönoncæte ante cædinque

cæninäni wænöninge baö tönö maincoo
ænte pö ænte pö cæmīni incæte
dicæ botö imote ante pönëninge pönömīni
æntawogaa.

⁴³ İñæmpa, Mönö wængonguīdi İñönänite ædæ
wæænte apænecæimpa,
ante cædinge mīnitö mīni badöninga adoca Mönoco
mīni ānonca beyæ
æmontaicö oncö næænte godingue wocæ wocæ
cædömīni awædö.

Ayæ waca, Möni wængonguī Adempaö nēmö bai
owocæimpa, ante mīni badöninga næænte
æmonga cö cæ cö cæ cædöminimpa töö.

Ante adingue Wængonguī, Mänömaī cæmīni beyæ
botö mīnitö İmīnite

Babidönia ganca da godöninge godömenque gobæ
da godömo gocæminimpa,

angampa, ante yewæmongatimpa.” Ante
apænedingue Etebä, Mönö wæmæidi İmaī
cægadänimpa, ante godömenque apænecantapa.

⁴⁴ “Wængonguī doyedë Möitee wodi ingante
apænedingue, Mīnitö æmontaicö mænonte
ate botö wææ ante yewæmöninca cö cæte
mancæminimpa. İmaī mænoncæminimpa, ante
odömongä adingue Möitee wodi wæætë mönö
wæmæidi İnänite odömongä ate eñëninge
tömënäni wæætë Wængonguī nänö odömönö bai
mänömaīnonque æmontaicö mængadänimpa.
Mänömaī mænonte ate dica wææ ante Wængonguī
nänö yewæmongainca incæ mänincönë cö
cægadänimpa. Ayæ önömæca wayömö wayömö
gocæte ante æmontaicö capote mongænte mao
wocæ wocæ cægadänimpa. ⁴⁵ Ayæ wadäni

mänïömæ nē quēwēnāni iññōnānite Wængonguī wido cæcā ate mōnō wæmæidi Ootowee wodi miñæ ponte òmæ æninqe Wængonguī oncō æmontaicō nāni ænte mongængaincō māmō wodongadānimpa. Wodōnāni ate Awēnē Dabii wodi nānō ēñate quēwenguimpoga mānincō æmontaicō incæ ayæ a owogatimpa.

⁴⁶ Awēnē Dabii ingante Wængonguī pōnō waa agacāimpa. Ìninqe Dabii wæætē Wængonguī ingante apænedinque, Bitō Aacobo wodi Wængonguī ìnōmi ìmipa, ante adinque botō, Bitō quēwenguīñōmō, ante oncō āmi mænonguīmo, āñongante Wængonguī Baa angacāimpa. ⁴⁷ Wæætē Tadōmōō wodi Wængonguī beyæ nē oncō mænongā ingacāimpa. ⁴⁸ Mānōmaī cægaināni incæte Wængonguī iññōmō edæ æmonga pōnī nē ongongā inte waocā nānō ònompoca mænōnincōnē ædō cæte pōnō Ao ante guiite quēwenguingāā. Mānōmainō ante pōnente wædinque Wængonguī beyæ nē apænegaingā iīmaī ante apænegacāimpa.

⁴⁹ ‘Botō nē Tæiyæ Awēnē ìnōmo iññōmote òñnæ incæ botō Awēnē tæ contaqui bai impa, inguipoga wæætē botō ònōwa podōwate qui bai impa.

Mānōmaī nē ongōmo beyæ mīnitō botō oncō ante ædō cæte mænonguīmīni.

Inguipoga æcōnēnō guidinque guēmanguīmoo, ante Wængonguī angampa.

⁵⁰ Botō iñnæmpa tōmēmo ònompoca tōmāā nē badongaimo ìnōmo ìmopa, ante Wængonguī Awēnē angampa, ante wacā yewæmongacāimpa.”

51 Ante apænedinque Etebä godömenque iimaï ante apænecantapa. “Ñowo eñeedäni. Minitö mimö ömædë imini inte wii pönencædö. Önömoncaque eñëninque wii ædæmö eñëmîni imini awædö. Minitö wæmæidi nāni cægainö ante eñëmînitawo. Iñæmpa tömënāni nāni cægai bai adobai cædinque mînitö Wængongui Tæiyæ Waëmö Önöwoca ingante Baa äninque cöwë wææ äminipa töö. 52 Minitö wæmæidi doyedë Wængongui beyæ nē apænegaināni inānite togænte pāninque adocanque ingante ata cæpodāmaï inte tömānāni inānite togænte pangadānimpa. Edæ nē apænedāni, Nē nō entawēnongā inte ponguingā ingampa, ante apæneyōnānite tömënāni inānite do wænōnāni wængadānimpa. Ñowo iñömö tömënāni nāni, Ponguingā, angaingā incæ do pongā adinque mînitö godö wænömînitapa töö. 53 Edæ, iimaï cæedāni, ante Wængongui wææ angampa, ante Wængongui anquedoidi änāni eñëninque yewæmōnāni ate mînitö nē adōmîni incæ Baa äninque eñënāmaï cöwë cæminipa töö,” ante Etebä iinque apænecantapa.

Etebä ingante wænōnāni wængampa

54 Mānii awēnēidi guiquēnē Etebä nānō apænedö ante eñente wædinque äināni badinque бага wentoquēnē wentoquēnē angate piinānitapa. 55 Etebä iñömö Wængongui Tæiyæ Waëmö Önöwoca ingante ædæmö ewocadinque öönædë inö æmō adinque Wængongui ñāö apāite bai nānō emōnō acantapa. Ayæ nē Waocä eñagaingā inte Itota incæ

Wængongui tömëmæ inö adiyæ ongongä acantapa.
⁵⁶ Adinque,

—Badogaa, öönæde wi ænete bai ba abopa.
 Waocä në eñagangä incæ Wængongui tömëmæ inö
 adiyæ ongongä abopa.

⁵⁷ Ante apænecä eñente wædinque tömënäni
 pïinte Yæ yæ äninque eñenämäi cæcæte ante
 önömonca ñi mämoncate cädänitapa. Godongämæ
 pïinte quingæ tömengä weca pogodo pöningue,
⁵⁸ tömengä ingante bæi ongöningue tömënäni näni
 quëwëñömö yabæque ænte mäo dicaca tæi tacacæ
 cädänitapa. Tömengä æbänö angää, ante ënëninäni
 inte në apænedäni iñömö edæ tacacæ cædinque
 tömënäni wecoo yabæcooque gä tadongate tæcæ
 æmæwo pædingä Taodo näni änogä önöwaca
 inö ñö cädönänimpa. ⁵⁹ Dicaca tacayönäni Etebä
 iñömö Wængongui ingante apænedinque, “Awënë
 Itota, bitö botö önöwoca æncæbiimpa.” ⁶⁰ Ante da
 guicapodique yedæ äninque, “Awënë, tömënäni
 näni wënæ wënæ cädönö ante ee ae,” äninque edæ
 mö ñonte bai wængacäimpa.

8

¹ Etebä wodi ingante wænoncæte ante dicaca
 tacädäni adinque Taodo guiquënë, Waa wænömïni
 wængampa, ante Ao ante ongongacäimpa.

*Në godongämæ pönëinäni inänite Taodo togænte
 pangä*

Mänïönæ incæ mä togænte päningue Eedotadëe
 iñömö Codito ingante näni në godongämæ
 pönencabo inänite godömenque nanguï togænte
 pïinte pangadänimpa. Ate wædinque Itota nänö

nē da godongainānique godāmaī ongōñōnāni wadāni iñōmō nāwæ wodii winōninque Oodeabæ Tāmadiabæ æmænō æmænō gogadānimpa. ² Mānīi Etebā wodi ingante æmæwo wænōnāni wængā ate Wængonguī ingante nē waa adāni incæ Ca ca wædinque māo daga wenānitapa. ³ Taodo guiquēnē, Itota ingante nē pōnēnāni inānite wido cæcæimpa, ante nanguī wēnæ wēnæ cædinque wacōnē pō guīi wacōnē pō guīi cædinque onguīñænāni tōnō onquiyænāni inānite bæi ongonte wēä māo tee mōnegadānimpa.

Tāmadiabæ godinque Pedipe apænecā ēñēnānipa

⁴ Mānīi nē wodii winōnāni iñōmō ædōmē godinque Codito ingantedō ante cōwē watapæ apænedāni ēñēnōnānimpa. ⁵ Īninque Pedipe iñōmō Tāmadia nāni nanguī quēwēñōmō gote apænedinque, Mōnō Codito æbānō do ponte cægacāi, ante apænecā ēñēnānitapa. ⁶ Mānōmainō ante apænedinque tōmengā, Ate pōnencædānimpa, ante mā cæcā adinque nanguī ināni adoyōmō pōnēninque, Mōnō ēñengæimpa, ante cædānitapa. ⁷ Waodāni nanguī ināni wēnæidi wentamō ēwocadāni tōnō quēwēnāni adinque Pedipe angā ēñēninque wēnæidi incæ Yæ āninque dæ tao godāni ate onōnānique badānitapa. Ayæ cōmāināni incæ cabæināni incæ tæiyænāni inānite Pedipe cæcā ate waa badānitapa. ⁸ Ante adinque māniñōmō quēwēnāni wæætē watapæ togadānimpa.

⁹ Wacā idō tōmengā emōwo Timōnō iñōmō tōmengā adoyōmō quēwēninque wēnæ tōnō wantæpiyæ cæcā inongāimpa. Īninque Tāmadiabæ quēwēnāni tōmānāni, Æbānō nanguī cæcāā, ante

guiñente wæyönänite tömengä, Nē idömo inömo inte botö iñömö edæ nanguï cæte beyæ ñæñæmo pöni imo aedäni. ¹⁰ Angä eñëningue awënëidi incæ önönänique incæ tömänäni adoyömö pönëningue, “Wængonguï nänö tæi piñænö bai entawëningue ingä idö iñömö nē Tæi Piñænongä ingampa,” ante pönëwëningue, Nē Ñænængä pöni inongä ingampa, ante pemongadingue tömengä apæneca ate ædæmö eñënönänimpa.

¹¹ Ayæ tömengä wantæpiyæ wënæ tönö wæætë wæætë mä cæcä adingue tömënäni, Tömengä ingante mönö eñengæimpa, ante tee empo tee empo godönänimpa. ¹² Mänömai cæyönänite Pedipe guiquënë, Wængonguï Awënë Odeye nempo mönö quëwengæimpa, ante watapæ apæneca eñënänitapa. Ayæ, Mönö Codito iñömö tömengä emöwo Itota emongampa, ante apænebo eñëedäni. Ante apæneca eñëningue onguiñænäni incæ onquiyænäni incæ wede pönëningue æpænë guiidänitapa. ¹³ Ìningue Timönö incæ adobaï pönëningue æpænë guidingue Pedipe miñæ tee empo tee empo gocantapa. Pedipe, Ate pönencædänimpa, ante mä cædingue tæi piñænte nanguï cæcä ate wædingue Timönö adocä cöwë guiñente wægacäimpa.

¹⁴ Ìningue, Tämadiabæ quëwënäni Wængonguï nänö apænedö ante eñëningue do Ao änänipa, ante Eedotadëe ponte tedeyönänite Itota tömengä nänö da godongainäni incæ do eñënänitapa. Eñëningue Pegodo tönö Wäö inate Tämadiabæ da godönäni godatapa. ¹⁵ Godingue Tämadiabæ pönningue tæcæ mä pönënäni beyæ ante tömëna

Wængonguï ingante iïmaï ante apænedatapa. Wængonguï eññemi. Bitö Tæiyæ Waëmö Önöwoca ingante tömënäniya da pönömi pö guicä ate ewocacædänimpa, ämönapa. ¹⁶ Edæ Awënë Itota emöwo apænedinque tömënäni mä æpænë guiyönänite bitö Tæiyæ Waëmö Önöwoca tömënäniya wææ guidämaï ingantapa cæbii. Nöwo ämi pö guicæcäimpa. ¹⁷ Ante apænedinque Pegodo tönö Wäö tömënäniya pönö gampote apæneyöna Wængonguï Tæiyæ Waëmö Önöwoca pö tömënäni baonga guicantapa.

¹⁸ Mänömaï pönö gampoyöna Wængonguï Tæiyæ Waëmö Önöwoca tömënäniya pö guicä ate wædinque Timönö guiquënë tömënäni godonte æinta pædæ pönöninque, ¹⁹ tömëna ïnate,

—Minatö bai botö adobai në cæbo bacæboimpa ämopa. Pönö cæmina ate botö në cæbo badinque wadäniya pönö gampobo ate Wængonguï Önöwoca adobai pö guicæcäimpa, ämopa.

²⁰ Äñongante Pegodo,

—Bitö mïni godonte æintaque pædæ godöninque, Wængonguï Önöwoca nänö da pönönongä ingante æncæboimpa, ante pönewëmii. Edæ tömëmi tigitamonque nææninque edæ bitö ömæe ewenguinque gobäwe. ²¹ Iñæmpa, Wængonguï Önöwoca nänö da pönönongä ingante æninque godongämæ cæcæboimpa, ämitawoo. Wængonguï ayongä nö pönente cæbipa ænguimii. Edæ mönatö tönö ædö cæte cæquimii. ²² Nöwo edæ mäninö bitö wiwa cædinö ante wæwente pönëninque ñimpo cæe. Ayæ mönitö Awënë ingante apænebi eññëninque

tömengä wabänö pönö waadete cædinque mīmōno bitō pönewēnō ante wadæ cædinque ñimpo cæbaingampa. ²³ Bitō nāmā beyænque ante nē æīnēmi inte bitō mīmōnē guīnæmæ entawente bai quēwēmipa. Ayæ bitō tōmēmi wīwa cædō beyænque ñā cæyænte bai quēwēmipa, ante awædō.

²⁴ Angä eñēninque Timōnō wæætē,

—Æ ämi awædō, äninque Pegodo ingante, Botō mīnatō änō bai wīi bacæboimpa, ante cædinque mīnatō botō beyæ Wængonguī ingante apæneedā, angantapa.

²⁵ Ayæ Wäo tönō Pegodo iñōmō, Itota incæ mönō Codito ingaingä ingampa, ante māñiñōmō quēwēnāni inānite mönō Awēnē nānō änō ante apæneedā eñēnānitapa. Ìnque apænedinque adodō Eedotadēē gocæte ante wadæ gote Tāmadiabæ godinque tōmēna wayōmō wayōmō māo wædænque quēwēnāni weca pō pō cædinque nanguī ināni inānite apænedinque Codito ingantedō ante watapæ apæneedā eñēnānitapa.

Etiopæcæ awēnē ingante Pedipe bee tengampa

²⁶ Mäningä Pedipe ingante anquedo ayæ ate ponte äninque, “Bitō ægodōe, Eedotadēē wæi Gata goquīnō pædæ taoquinque betamonca gocæbiimpa,” angantapa. Māñinō önömæcaque wæidō inompa. ²⁷ Mänōmainō angä eñēninque Pedipe ængæ gantidinque wadæ godinque anquedo nānō äñinonque cægonte ayongä onguīñængä Etiopæcæ quēwēningä pō eyepæ bee tengä acantapa. Ìngä iñōmō Etiopæcæ tæiyæ awēnē onquiyængä Cantate beyæ tōmēnāni godonte æinta nē aacä inongä inte ñæñæ awēnē

inongäimpa. Tömengä ñöwo Wængonguï weca ædæ wææninqe watapæ apænecæte ante Eedotadëe æidingä inte ocæ emænte pöningue Pedipe ingante eyepæ mämö bee tengantapa. ²⁸ Ìngä ññömö cabayo nänö wëä pönoncadea æi tæ contate ocæ emænte pöningue Itaiya wodi Wængonguï beyæ nē apænegaingä nänö yewæmongainta næænte a congantapa.

²⁹ Mänömaï a conte pöñongante Pedipe ingante Wængonguï Önöwoca, “Goe, Ìi cabayo nänö wëä pönoncade eyepæ godinque guëa goe,” angantapa. ³⁰ Angä ëñëningue Pedipe pogodo godinque obo ponte ëñëñongä Etiopebæ awënë ññömö Itaiya wodi nänö Wængonguï beyæ yewæmongainta adinque apænecä ëñëningue,

—Bitö ate apænedö ante ædæmö ëñëmitawo.

³¹ Äñongante,

—Ïñæmpa ëñëmogaa. Botö imote apænedänipa ëñenguïmoo.

Ante apænedinque Pedipe ingante, Bitö botö weca ææ guiite tæ contae, angä ææ guii tæ contacantapa.

³² Mäninta Wængonguï angä ëñente nāni yewæmongainta Etiopebæ awënë nänö aintaa ïïmaï ante yewæmonte ongönönimpa.

“Codotedo ingante wænongäimpa, ante bæi ongonte æninqe töö godonte bai cædinque tömengä ingante adobai wænoncæte ante bæi ongonte ænte godänitapa.

Obegaidi ocaguincoo ëö toyönāni wädämaï pæ wëenecä bai tömengä adobai wädämaï inte pæ wëenecantapa.

³³ Piinte änäni wæyongante nē apænte anguēnēnāni
incæ, Pangæimpa, ante cædinque nōingā
ante änāmaï inānitapa.

Tömengä ingante æmæwo wænōnāni wængaingä
iñongante,

Tömengä nänō pæināni, ante ædō cæte apænequii.”

³⁴ Ante näni yewæmongainö adingā inte
Etiopæbæ awēnē ñōwo Pedipe ingante,

—Apænebi eñemoe. Nē Wængongui beyæ
apænegaingä iñömō æcänō ingante ante nē
apænegacāi. Tömengä nāmā ingante ante
yewæmongantawo. Edæ wacā ingante ante
yewæmongantawo, ante eñencæte ante wæbopa.

³⁵ Ante añongante Pedipe iñömō Etiopæbæ
awēnē nänō adinta adotaa ate apænedinque
ayæ wataa wataa adinque Itota ingantedō ante
watapæ apænecā eñengantapa. ³⁶ Apæneyongä
taadō godinque wapæ ganca pōnatapa. Equitobæ
awēnē mänimæ adinque Pedipe ingante, Waa ae.
Iñömō gāwapæ impa. Æpænē guidāmaï inguïmo,
āmitawoo.

³⁷ Angä eñëninque,

—Bitō mimōno wede pōnēmi ate botō Ao
āmaïmopa, angantapa. Añongante,

—Ao botō, Itota Codito näwangä Wængongui
Wengä inongä ingampa, ante wede pōnēmopa.

³⁸ Äninqe Etiopæbæ awēnē angä cabayo næ
gongæ ate Pedipe tönō guëa æpænē ti wææna
ate Pedipe tömengä ingante æpænē guidongä
guicantapa. ³⁹ Ayæ æpænē guuite ate tömengä tao
gongæñongä Wængongui Awēnē Önōwoca Pedipe
ingante iñæ æænonte ö ængä. Ate æmæwo

adinque Etiopebæ awënë watapæ todinque oncönë goinö gocantapa. ⁴⁰ Pedipe guiquënë Atota iñömö iñontobæ a ongöninque godömenque wadāni nāni quëwëñömö go apænedinque wayömö nāni quëwëñömö go apænedinque Tetadea ganca godinque Codito ingantedö ante watapæ apænecä ëñengadānimpa.

9

Awënë Itota ingante Taodo acampa (Nāni Cægainö 22.6-16, 26.12-18)

¹ Taodo guiquënë mönö Awënë ingante nē tee empote quëwënāni inānite pīinque, Wængongæimpa, ante bæi ongö bæi ongö cædinque cöwë ñimpo cædāmaï ingacäimpa. Nöwo godömenque cæcæte ante Wængongui oncönë gote nē godongä ñænængä pönï inongä ingante apænedinque, ² Awënë ëñëmi, angantapa. Bitö Ao ämi ininque botö Daāmaco nāni quëwëñömö gote ayömo, Onguiñænāni incæ onquiyænāni incæ æcāmenque Itota Taadö ante nē godāni inānii, ante adinque tömënāni inānite bæi ongonte goti winte Eedotadëë ænte pömaïmopa. Ininque bitö, Taodo mänömaï cæcæcäimpa, ante botö beyæ cadota ante yewæmöninque pædæ pönömi æninque botö wæætë Daāmaco iñömö mäo oodeoidi odömöincönë awënëidi weca gote pædæ godömo ænte adinque tömënāni Ao äñönāni mänömaï cæbaïmopa. ³ Äñongä awënë Ao ante yewæmöninque pædæ pönongä æninque Taodo Daāmaco obo gote ayongante iñontobæ öönædë inö näinte bai cædinque tömengä nänö ongöñömö

tömäo guinæ gongæ. ⁴ Adinque Taodo guidömëmæ tæ go wæængantapa. Ayæ wæænte öñöñongante tömengä ingante, “Taodo. Taodo. Quinante botö imote togænte pämi.”

⁵ Angä ëñente wædinque Taodo wæætë, “Awënë, æmömido inömi imii.” Ante ëñëñongä, “Botö Itotabo inömo inte bitö në togænte pänimo mänimotö imopa cæbii. Ìñæmpa wagada päintoca bai bitö nämä ìñæ æwate bai cædinque cowate bai edæ caate bai wæbipa töö.” ⁶ Mänömaï apæncä ëñëninque Taodo ancai guñente do do wæadinque, “Awënë, æbänö cæquimo ämii.” Äñongante mönö Awënë wæætë apæncantapa. “Bitö ængæ gantidinque iinäni näni quëwëñömö goe. Botö, Taodo iïmaï cæcæcäimpa, ante wacä ingante Daämaco ìñömö në quëwengä ingante do apænebo ëñengampa cæbii. Bitö Daämaco ìñömö gote ongöñömi tömengä wæætë bitö imite apæncä ëñente cæcæbiimpa.”

⁷ Taodo tönö godongämæ godäni guiquënë waocä ingante adämaï inäni incæte, Önonque tempa, ante pönëninque ancai guñente wædänitapa. ⁸ Taodo ìñömö onguipoga ayæ a öñongä inte ængæ gantidinque awinca adämaï ingä adinque wadäni tömengä ingante önonpo bæi ongöninque Daämaco ganca ænte mäodäni gocantapa. ⁹ Mänïñömö gote ongöninque tömengä adämaï inongä inte cænämaï bedämaï mëönaa go adoönæque ìñonte wæwengacäimpa.

¹⁰ Ayæ wacä në pönengä Änäniya Daämaco ìñömö quëwengä inte mä pönï wïimonte bai ayongä mönö Awënë, “Änäniya,” angä ëñëninque, “Awënë, botö ëñë cömopa.”

11 Äñongä mönō Awënē wæætē, “Taodo ñōwo Wængonguī ingante apæncampa cæbii. Bitō ængæ gantidique taadō nāni Töinō änönō godinque Codaa oncönē gote äninque, Tadoto nē quëwëningä Taodo iñömō owocantawo, ante acæbiimpa. 12 Wængonguī ingante ñōwo apænedinque ate bai ayongä wacä Änäniya pō guidique, Ñōwo edonque acæbiimpa, ante gampocampa, ante ate bai Taodo wæcantapa cæbii. Tömengä wüimonte bai adinque nänō wædō bai cædinque bitō ñōwo gote cæcæbiimpa.”

13 Angä ëñente wædinque Änäniya wæætē, “Awënē iñæmpa botō, Mäningä Taodo iñömō quïnō bai onguīñængä ingää, ante nanguī tededäni do ëñëmopa. Ayæ, Eedotadëe iñömō tömengä bitō quïnäni inänite wënæ wënæ cæcampa, ante tededäni ëñente wæbopa. 14 Ayæ nē godönäni ñænænäni Ao ante yewæmönäni æninque tömengä iñæmpa nē angä badinque bitō ëmöwo ante nē apænemöni iñömönite bæi ongonte tee mönecæte ante pongampa cæbii.”

15 Ante wæyongante mönō Awënē wæætē Änäniya ingante, “Iingä ingante do apænte æmo apa änewëe. Tömengä ingante, Bitō wabæca gote wadäni inänite botō ëmöwo ante apænedinque ayæ tömënäni awënëidi inänite botō ëmöwo ante apænedinque idægoidi inänite adobai botō ëmöwo apænebi ëñencædänimpa, ante tömengä ingante do antabopa cæbii. Ñōwo tömengä weca gobäwe. 16 Ayæ botō nē æningä inte tömengä æbänō botō ëmöwo beyæ nanguī caate wæquënengä ingää, ante odömömo ate ëñencæcäimpa.”

17 Angä eñëninque Taodo nänö owoyömo go gu-
 idinque Änäniya tömengä ingante gampomöninque,
 –Taodo botö tönĩñabi eñëmi. Bitö taadö pöninque
 Itota ingante abitawo. Tömengä iñömö nē Awënë
 inongä inte botö imote apæ necantapa. Bitö Taodo
 weca godinque cæbi ate tömengä wëenëñedē
 nänö emönö bai adinque Wængongui Tæiyæ
 Waëmö Önöwoca ingante da pönömo æninque
 ewocacæcäimpa, ante mönö Awënë angä eñëninque
 botö bitö weca pontabopa.

18 Ante Änäniya tæcæ apæneyongä Taodo
 tömentagæ nänö emönintagæ tæ wæænte iñontobæ
 edonque acantapa. Ayæ ængæ gantiyongante
 Änäniya tömengä ingante æpænē guidongä
 guicantapa. 19 Ayæ cænguī cæninque tömengä
 baö wæætē tæi piñængä bacantapa. Ayæ Daämaco
 iñömö Itota ingante nē tee empote quëwënäni
 weca godömenque tæönæ quëwengantapa.

Daämaco iñömö Taodo apæ necä eñënäni

20 Mäniñömö quëwëninque Taodo do oodeoidi
 odömöincönē go guī go guī cædinque, Itota
 Codito näwangä Wængongui Wengä ingampa,
 ante apæ necä eñënänitapa. 21 Mänömai apæ necä
 eñëninque tömengä ingante nē eñënäni iñömö
 ancai guñëninque, “Æ. Ìingä adocä Eedotadē
 iñömö Itota emöwo ante nē apæ nedäni inänite nē
 wido cæcä imaingampa. Tömengä adocä nē wido
 cæcä incæ adodäni inänite bæi ongonte æninque,
 Wængongui quī, ante nē godönäni ñænænäni weca
 mäo pædæ godoncæte ante ñöwo iñömö pöninque
 cæcä awædö. Edæ adocä ingänö angüenē.”

²² Ante wædäni incæte Taodo godömenque tæi piñænte entawëninque iïmaï ante apænecantapa. Awënë bacæcäimpa, ante Wængongui nänö nê gao cæcadongä iñömö mönö Codito iñömö edæ Itota adocä inongä ingampa, ante, Näwangä impa, ante nöingä pöni apænecä. Adinque Oodeoidi Daämaco iñömö quëwënäni guiquënë, Ædö cæte wadö angui, ante wægadänimpa.

Oodeoidi wænoncæ cæyönäni Taodo aamö cæte gocampa

²³ İninqe tæönæ go ate oodeoidi godongämæ pönente Ao äninque, Taodo ingante wænongæimpa, ante cædänitapa. ²⁴ Mänömaï ante cæyönäni Taodo mäninö näni äninö do ëñgantapa. Tömënanäni guiquënë, Mönö quëwëñömö wææ cæinmö tacä ate wænömö wæncæcäimpa, ante itädë woyowotæ wææ wänönänitapa. ²⁵ Wææ wänöñönäni tömengä ingante nê tee empote quëwënäni wæætë yabæ wææ cæte iñömö Taodo ingante woyowotæ mäi ayacö moyäa inö otodë pædæ wæænönäni ti wæænte gocantapa.

Taodo Eedotadëe ponte apænecampa

²⁶ Mänömaï godinque Taodo Eedotadëe pöninque, Itota ingante nê tee empote quëwënäni weca gobote, ante pongä. Adinque tömänäni, Näwangä Itota ingante nê pönengä ingantawogaa, ante guiñente awädö, ante pönëninque wææ adänitapa. ²⁷ Bedënabee guiquënë Taodo ingante bæi ongömænte æninque Itota nänö nê da godongainäni weca ænte mämongä pongantapa. Ayæ tömënanäni inänite Bedënabee apænecantapa. Taodo ñöwo taadö godinque

mönö Awënë ingante dobæ acäimpa. Mönö Awënë tömengä ingante do apæncantapa. Daämaco gote quëwëninque Itota ëmowo ante tömengä guiñenämaï apænedingä inte ñowo iñömö pongä apa quëwëminii. ²⁸ Bedënabee mänömaï angä ëñëninque Ao añönäni Taodo Eedotadëe iñömö quëwëninque tao guiite ta tao guiite ta cædinque tömënäni tönö godongämæ cædinque mönö Awënë ëmowo ante guiñenedämaï apæncantapa. ²⁹ Ayæ wadäni oodeoidi incæ guidiego tededö nê tededäni mäniñömö quëwënönänimpa. Ìinäni inänite Pabodo mönö Awënë ëmowo ante nanguï apænedinque wæætedö wææte añongante tömënäni wææte wænoncæte ante cædänitapa. ³⁰ Mänömaï cædänipa, ante ëñente wædinque tömengä nänö tönïñadäni bai badänäni inte pancadäniya Taodo ingante Tetadea ganca mäo ëmöninque, Godömenque Tadoto iñömö wodii winonte goe, ante da godönäni gogacäimpa.

³¹ Ìinique Codito ingante nāni godongämæ pönencabo incæ Oodeabæ Gadideabæ Tämadiabæ tömäo quëwëninque mäniñedë wædämaï inte guëmänänitapa. Ayæ tæi piñænte entawënäni badänitapa. Ayæ Wængonguï Tæiyæ Waëmö Önöwoca ædæmö apæncä ate tömënäni wampo pönënäni badinque yebænte nanguï inäni bagadänimpa. Ayæ mönö Awënë ingante ædö cæte ëñënëmaï cæquï, ante guiñente wægadänimpa.

Ënea ingante Pegodo angä waa bacampa

³² Mänömaï tömënäni nāni pönencabo nanguï yebænte bayönäni Pegodo guiquënë wayömö wayömö wodo tebæ wodo tebæ godinque Dida

iññömō pōninque mōnō Awēnē quīnāni weca ēñacæ pongantapa. ³³ Māniññömō ponte apæneyongā wacā tōmengā ēmōwo Ēnea do ocho wadepo ganca mōimoga cōmāingā inte nē ongōningā ingā.

³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidique tōmēmi mōimo nī capoe.

Āñongā Ēnea iññömō do edæ ængæ ganticā. ³⁵ Adinque Dida quēwēnāni tōnō Tadōō quēwēnāni tōnō wēēnē nāni pōnēwengāinō ante ēmō cædinque Wængonguī Awēnē gāmænō pōnānitapa.

*Dodoca wodi ingante Pegodo angā ñāni
ōmæmongampa*

³⁶ Māniññedē wacā onquiyængā nē pōnengā Tabita iññömō Cope nāni quēwēññömō quēwēnongāimpa. Tōmengā ēmōwo guidiego tededō Dodoca incæ mōnō tededō Cowāñe ēmongā inongāimpa. Tōmengā iññömō nē waa cædongā inte òmæpodāni wæwēnāni inānite nanguī waa cædongā inte Cope iññömō quēwēnongāimpa. ³⁷ Tōmengā māniññedē nangæ badinque æmæwo wængā. Ate tōmengā baō inī æpæ āadēninque wænōmēnæcapaa mæi nō cædānitapa. ³⁸ Cope iññömō quēwēninque Dida wīi gobæ impa, eyequeī impa. Mānōmāi beyæ, Pegodo Dida iññömō ongongampa, ante tededāni ēñente wædinque Itota ingante do tee empote quēwēnāni iññömō onguīñæna mēnaa inate da godōninque, Cope iññömō gote Pegodo ingante, “Quingæ pōe, ante äeda.”

³⁹ Ānāni gote āñete pōññōnate Pegodo godongāmæ pongā adinque tōmengā ingante wænōmēnæcapaa mæidāni guiite acantapa. Owæmpōināni

godongāmæ pōninque doyæncoo tōnō yabæcoo
 Dodoca mīngā quēwengāñedē nānō badongaincoo
 odömōninque Ca ca wædāni. ⁴⁰ Adinque Pegodo
 tōmānāni īnānite angā tao godāni adinque da
 guicapote Wængonguī ingante apænecantapa.
 Ayæ dobæ wænte onguite a oñongā gāmænō dadi
 emænte adinque,

—Tabita, ængæ gantibi āmo.

Ñongā Tabita wodi awinca wi æmōninque Pe-
 godo ingante adinque ængæ gantite contacan-
 tapa. ⁴¹ Ængæ ganti contayongante tōmengā
 ōnompo bæi ongōninque Pegodo tōō æmængā ate
 ædæmō ængæ gantite adiyæ gongængantapa. Ayæ
 owæmpoināni tōnō mōnō Awēnē quīnāni īnānite Pe-
 godo aa pecā pō guīdāni ate mīngā ingā odōmongā
 adānitapa. ⁴² Īninque, Mōnō Awēnē mānōmaī
 cæcantapa, ante Cope īñōmō nāni quēwēñōmō
 tōmāo gote tededāni ēñēninque nangui īnāni mōnō
 Awēnē ingante nē pōnēnāni badānitapa. ⁴³ Pegodo
 māñīñedē æmontai nē amīnengā Timōnō weca
 owodinque Cope īñōmō tæōnæ quēwengacāimpa.

10

Pegodo tōnō Codōnedio

¹ Tetadea nāni quēwēñōmō odōmāno tontadoidi
 Itadiaidi nāni ānoncabo inte quēwengadānimpa.
 Īninque tontadoidi tiēē ganca nāni cabo tiēē ganca
 nāni cabo īñōnānite adocabodāni capitāo tōmengā
 emōwo Codōnedio emongacāimpa. ² Tōmengā
 nāni wencabo nāni owocabo owodinque, Mōnō
 wadō pōnēñōmonte Wængonguī pangā wæcæ
 wæ, āninque Wængonguī nānō ānō ante ēñente

quēwēnōnānimpa. Ayæ pæ gompodāmaī inte Codōnedio, Ōmæpodāni wæwēnāni qui, ante pædæ godō pædæ godō cæcā ænōnānimpa. Ayæ Wængonguī ingante ñimpo cædāmaī cōwē apænedongäimpa. ³ Tömengä iñömō ædæ wæicā ate mā pōni wīimonte bai acantapa.

Edonque wīimonte bai ayongante Wængonguī anquedo tömengä weca pō guiidique, “Codōnedio bitō imi.” ⁴ Angä wædique Codōnedio tömengä ingante cōwä adinque ancai guiñente wædique, “Awēnē, æbānō ante ämii. Ämi eñēmoe.” Äñongante, “Bitō Wængonguī ingante nē apænebi imitawo, ōmæpodāni wæwēnāni inānite nē godōmi imitawo. Mānīnō bitō apænedō ante mānīnō bitō godōnō ante adinque bitō imite waa abopa, Wængonguī angampa, angantapa. ⁵ Ñōwo wadāni inānite ämi Cope iñömō gote Timōnō Pegodo nāni änongä ingante äñete poncædānimpa. ⁶ Adowo emōnongä Timōnō weca Timōnō Pegodo gāwapæntibæ wedeca owocampa. Māningä Timōnō æmontai nē aminēnongä ingampa.”

⁷ Ante apænedingä inte Wængonguī anquedo ingæ gocā adinque Codōnedio wæætē tömengä ingante nē cæda mēnaa inate aa pecā pōnatapa. Ayæ tontadoidi incæ pancadāniya tömengä ingante nē cædāni inōnānimpa. İniquē adocanque tontado incæ Codōnedio ingante nē cæcā incæ Wængonguī ingante nē eñengä inongäimpa. Tömengä ingante Codōnedio adobai aa pecā pongantapa. ⁸ Mānōmaī aa pecā ate tömēnāni godongāmæ pōnāni ate Codōnedio, Wængonguī æbānō angantawoo, ante tömānō ante adodō apænedinque, Ñōwo Cope

iñömö goedāni, angantapa.

⁹ Angä godinque iimö wææñö taadö godinque Cope iñömö obo pöñönāni māniñedē incæ tæcæbæcä incæ Pegodo guiquenē Wængonguī ingante apæñecæte ante oncömanca æicantapa.

¹⁰ Ayæ ate gue ænente wædinque wadāni inānite, Cæinente awædö, añongante cænguī iinque æænönāmaī inte cönönāmaī iñönānite tömengä wiimonte ate bai cæwēnengantapa.

¹¹ Ate bai æmö ayongante öönædē wi ænete bai bayö möincoo bai ñænæncoo pönī iñonte æmænecoo bæi æmænecoo bæi ongönete bai inguipoga pædæ wæænonte bai wææ wäi wocæ acantapa.

¹² Wäi wocæñö nē ocaguī mongænāni incæ, nē ocaguī ömaadāni incæ, nē öömä emænte æidämæ godāni incæ babæidi tömänāni weocoo cæncadencoö inö ongönāni acantapa. ¹³ Ayongante wacä äninque, “Pegodo, ængæ gantidique wænonte cæe.”

¹⁴ Angä eñëninque Pegodo, “Awenē, eñëmi. Öñönānique iñönānite botö, Baacä awædö, äninque cöwē cænāmaī imo apa anewëe.”

¹⁵ Äninque wæætē eñëñongä, “Wængonguī nänö ædæmö mēnongadongä incæ bitö ædö cæte baacä ämii.”

¹⁶ Äninque nē apænedingä iñömö wæætē adodö adodö angä eñëninque Pegodo wæætē, Baacä awædö, ante Baa angantapa. Ayæ mempoga go adopoque wæætedö wæætē adodö äna ate ñænæncoo pönī weocoo incæ öönædē inö wëä æænongä bai acantapa.

¹⁷ İninque, Mänömainö ante wiimonte bai adimo inte botö quinö bai cæquimoo, ante Timönö Pegodo pönëë congan-tapa. Pönëë cöñongä Codönedio nē nänö da

pönönināni guiquēnē, Timönō oncō æyömönō ī, ante diqui diqui minte adinque yabædemō inō næ gongæninque, ¹⁸ Timönō Pegodo nāni ānongā iñömō owocāā, ante eñencæte ante aa pedānitapa.

¹⁹ Pegodo wiimonte bai nānō adinō ante ayæ pönēē cōñongante Wængonguī Önōwoca, “Timönō eñēmi, bitō imite ante onguīñænāni mengāa go adocanque diqui diqui minānipa quēwēmii.

²⁰ Tömēmo āmo pönānipa cæbii. Bitō ængæ gantidinque yæipodē wæidinque tōmēnāni tönō ee goe,” angantapa.

²¹ Angā eñēninque Pegodo yæipodē wæidinque tōmēnāni inānite, Botō mīnitō nē diqui diqui mīnōmo adobo imopa. Mīnitō quīnante pōmīni.

²² Añongante,

—Mōnitō awēnē capitāō Codōnedio incæ angā pōmōnipa. Tōmengā iñömō Wængonguī ayongante nō cæcā inongā inte Wængonguī ingante guīñente quēwengampa. Nē nō cæcā ingampa, ante pönēninque oodeoidi tōmānāni tōmengā ingante waa adānipa. Īninque Wængonguī anquedo tæiyæ waēmō inongā inte wæætē Codōnedio ingante, Bitō wadāni inānite āmi gote Pegodo ingante añete poncædānimpa. Tōmengā iñömō bitō weca pōninque apæncā eñencæbiimpa, angā eñente wæidinque Codōnedio wæætē mōnitō imōnite da pōnongā pōmōni ae.

²³ Ante apænedāni eñēninque Pegodo angā pō guīite tōmengā weca owodānitapa. Īmō ate Pegodo tōmēnāni tönō tao goyongante Cope iñömō quēwente nē pōnēnāni incæ pancadāniya godongāmæ tao wadæ godānitapa.

24 Mänömaï godinque Pegodo iñabæ wæængä Tetadea pongantapa. Codönedio guiquenë, Oo ponguingä, ante pönëninque tömengä guidënanï tönö tömengä æmigoidi inänite do añecä ponte godongämæ ongönänitapa. 25 İninque Pegodo iñömö oncönë pö guiicæ cæyongä Codönedio wæætë oncodo tao bee tëninque, Æ, bitö Wængongui anquedo inömi imipa, ante bai cædinque ædæ wæænte Pegodo önöwa gäänë guidömëmæ ñongængä. 26 Adinque Pegodo wææ äninque,

—İñæmpa bitö waobi imi bai botö adobai waobo inömo imopa. Ængæ gantibi, äninque Pegodo angä ængæ ganticantapa.

27 Ayæ Codönedio tönö guëa tededinque Pegodo oncönë guiite ayongante nanguï inäni godongämæ mä ongönäni. 28 Adinque tömënanï inänite,

—Minitö do ëñëmïnipa. Oodeoidi inömöni inte mönitö Möitee wodi nänö wææ angainö ante Ao ante ëñente cæmönipa. İninque, Oodeo inämaï inäni tönö godongämæ cädämaï incæmïnipa, ante ayæ, Tömënanï weca go guidämaï incæmïnipa, ante mönitö ëñengainö ante cæmönipa, ante mïnitö do ëñëmïnitawoo. Incæte Wængongui wæætë botö imote iïmaï ante odömongantapa. Bitö, Baacä awædö, ante tedete bai waocä ingantedö ante tededinque, Wentamö mongængampa, ante änämaï incæbiïmpa. Ayæ, Önonganque ingampa, ante änämaï incæbiïmpa, ante Wængongui botö imote do odömongä atabopa. 29 Äñete pönäni ate botö, Wængongui mänömainö ante odömongä atabopa, ante pönëninque ee pontabopa. İninque

quinate botö imote aa pemini, ante eñencæte ante wæbopa.

³⁰ Äñongante Codönedio wæætë,

—Do meönaa go meönaa iñonte botö tömëmo oncönë cænämaï inte Wængongui ingante apænetabopa. Botö mänömaï ñöwo bai ædæ wæicä apæneyömo onguiñängä weocoo näämænta pöni mongängä ponte botö weca a ongongä atabopa.

³¹ Ayæ botö imote apænedinque, “Codönedio, bitö Wængongui ingante apænebitawo, angantapa. Mäninö bitö apænedö ante Wængongui do eñengantapa. Ömæpodäni wæwënäni qui, ante bitö godömitawo. Mäninö bitö godönö ante adinque Wængongui cöwë pönengampa cæbii. ³² Nöwo ämi Cope gote Timönö Pegodo näni änogä ingante äñete poncædänimpa. Tömengä wacä Timönö æmontai nē aminengä weca gäwapæntibæ wedeca owocampa.” ³³ Angä eñëninque botö wæætë bitö imite ante, Äñete pödäni, antabopa. Nöwo bitö do pömi waa abopa. İninque ñöwo iñömö Wængongui ayongä tömämöni godongämæ a ongöñömöni bitö, Wængongui Awënë mönitö beyæ ante bitö imite æbänö angää, ante apænebi eñencæte ante ongömönipa, angantapa.

Codönedio oncönë ongöninque Pegodo apænecampa

³⁴ Codönedio mänömaï apænecä eñëninque Pegodo iïmaï ante apænecantapa.

—Wængongui, Adoyömö pöni iminipa, ante tömämö imonte pönö adoyömö pöni cæcampa, ante botö, Näwangä impa, ante ñöwo tæcæ eñëmopa.

³⁵ İninque iïmæca quëwënäni incæ wayömö wabæca

wabæca quëwënäni incæ æcänö Wængonguï ingante guïñente wædinque nö cæte quëwëna ante adinque Wængonguï mäningä ingante Ao ante do ængampa. ³⁶ Mänömaï cæbopa, ante idægoidi inänite apænemïni ëñencæðänimpa, ante Wængonguï mönitö imönite da godongä gote iïmaï ante apænemöni ëñënanipa. Tömämæ quëwëmö iñömonte mönö Tæiyæ Awënë iñömö Itota Codito ingampa. Tömengä waa pöni pönö cæcä beyænque Wængonguï piyænë nänö cægainö ante watapæ möni apænedö impa. ³⁷ Wäö wodi, Æpænë mönö guidongæimpa, ante apænecä ëñënäni ate Itota Codito iñömö Gadideabæ iñömö mä cædinque Oodeabæ tömäo cægonte æbänö cægacäi, ante do ëñëmïnipa. ³⁸ Iïmaï ingatimpa. Wængonguï tömengä Önöwoca ingante angä Itota Näatadeta në quëwengaingä baonga wææ guigacäimpa. Wææ guicä ate Itota tæi piñænte entawëninque wayömö wayömö gote tömäo cægöninque waa cægacäimpa. Edæ Wængonguï tömengä tönö godongämæ quëwente cæcä beyæ Itota iñömö, Wadäni wënæ angä ëñëninque goti winte bai wæwënanipa, ante adinque wënæidi inänite angä tao godänitapa. Ayæ wadäni wënæ wënæ inte wæyönänite tömengä godö cæcä ate edæ waa inäni bagadänimpa.

³⁹ Pabodo mänömainö ante godömenque apænecantapa. “Oodeoidi ömæ cægöninque ayæ Eedotadëë iñömö quëwëninque, Itota Codito æbänö cægacäi, ante në adimöni inte mönitö iñömö mäninö tömänö ante në apænemöni imönipa. Tömengä ingante awæ ñænquedimæ cæte godö wænönäni wængacäimpa. ⁴⁰ Incæte

Itota do wæningä inte meönaa go adoönæque öñongante Wængonguï angä ñäni ömæmonte müngä inte edonque pöni a ongongä agadänimpa. ⁴¹ Wüi tömänäni adänitapa. Pancamöniya atamönipa. Itota ñäni ömæmongä ate tömengä tönö nē godongämæ cænte bedimöni iñömönite Wængonguï, Mänimpodänique Itota müngä ongongä ingampa, ante nē adinäni inte nē apænedäni incädänimpa, ante mönitö imönite apænte ængacäimpa. Mönitö adomönique tömengä ingante atamönipa. ⁴² Ayæ mönitö imönite äninque Wængonguï, Minitö iñömö do eññimäni inte nē apænemäni badinque waodäni inänite mänömainö ante apænedinque iimaï ante apænecæminimpa. Müi quëwänäni inänite do wäninäni inänite Itota Codito iñömö edæ tömänäni inänite edæ nē apænte anguingänö angüenē, ante apænemäni eññencädänimpa, ante Wængonguï mönitö imönite angacäimpa. ⁴³ Ayæ, Mönö Codito poncæcäimpa, ante do eñngainäni inte tömänäni Wængonguï beyæ adoyömö apænegadänimpa. Tömänäni, Codito ingante nē pönänäni wänæ wänæ näni cädö ante adocä Codito emöwo beyænque Wængonguï pönö waadedinque ñimpo cæcä quëwencädänimpa, ante doyedē apænegadänimpa,” ante Pegodo Codönedioidi inänite apæncä eññänitapa.

Oodeoidi inämaï inäni Wængonguï Önöwoca ingante cänäni

⁴⁴ Pegodo mäninö ante tæcæ apæncä eññē cöñönänite Wængonguï Tæiyæ Waemö Önöwoca tömänäni tömänäni baonga wææ guicantapa.

⁴⁵ Pegodo tönö godongämæ pöninäni guiquenē

nē pōnēnāni ināni incæte, Mōnō ēō togænte quēwengæimpa, ante nē ānōnāni ingadānimpa. Īninqe tōmēnāni, Oodeoidi ināmaī ināni inānite Wængonguī Tæiyæ Waēmō Ōnōwoca do wææ guicampa, ante adinqe edæ guiñente wædānitapa. ⁴⁶ Edæ Codōnedioidi Wængonguī Ōnōwoca ingante ēwocadinqe wadāni nāni tede bai wadāni nāni tede bai iñontobæ apænedinqe Wængonguī ingante waa adinqe waa todāni ēñente wædinqe oodeoidi mǎnōmaī guiñente wædānitapa. ⁴⁷ Adinqe Pegodo tōmengā tōnō nē pōnīnāni inānite,

—Tōmēnāni mōnō bai Wængonguī Tæiyæ Waēmō Ōnōwoca do ænīnāni inānite adinqe tōmēnāni, Æpænē guidōmi guiboē, āñōnānite mōnō ædō cæte wææ anguii. ⁴⁸ Āninqe Pegodo angā ēñēninqe tōmēnāni Itota Codito ēmōwo apænedinqe æpænē guidōnāni guidānitapa. Æpænē nē guidēnāni iñōmō ayæ Pegodo ingante, Tæōnæ mōnitō weca quēwencæbiimpa, ānāni Ao ante quēwengacāimpa.

11

Eedotadēē iñōmō nē pōnēnāni inānite Pegodo apænecā

¹ Oodeoidi ināmaī ināni incæ Wængonguī nānō ānō ante do Ao ante ēñēnānīpa, ante wadāni Oodeabæ tōmāo cægonte tededānitapa. Īninqe Itota nānō da gogaināni tōnō wadāni nē pōnēnāni tōnō mǎnīnō ante do ēñēnānitapa. ² Īninqe Pegodo Eedotadēē iñōmō æite quēwēñongante nē pōnēnāni incæ pancadāniya, Mōnō ēō togængæimpa, ante nē

änönäni inte tömengä ingante püinque, ³ iimaï ante änänitapa.

—Quimæ bitö togænämaï inäni weca incæ go guiidinque cæmitapa töö.

⁴ Äñönänite Pegodo, Æbänö cæte i, ante adodö adodö ante apæ necä eññänitapa.

⁵—Botö Cope näni quëwëñömö gote quëwëninque Wængongui ingante apænedinque cæwënente ongöninque wiimonte bai atabopa. Wiimonte bai ayömote wecoo ñænæncoo möincoo bai æmænecoo yao æmænecoo yao oncönete bai öönädë inö pædæ wæænonte bai ayömote botö weca wææ wäi wocæ atabopa. ⁶ Wäi wocæñö botö acæte ante guimö ayömo babæidi bai inäni inte ocagui mongænäni, æmontaique mongænäni, öömä emænäni yæmiñæncoo inö ongönäni bai atabopa. ⁷ Ayæ wacä botimote, “Pegodo, ængæ gantidinque wænonte cæe.” ⁸ Angä eññeninque botö, “Awënë eññemi. Baacä ingä anewëe. Näwaaqingä inämaï iñongante cöwë cænämaï imoi ae.” ⁹ Ante wæyömote öönädë apæ necä botö në eññeningä godömenque äninque, “Wængongui nänö ædæmö mënongadongä ædö cæte baacä ämii.” ¹⁰ Äninque tömengä wæætë wæætë mempoga go adopoque adodö angä ate ñænæncoo bai adodö öönädë ingæ æi atabopa. ¹¹ Mäniñedë Tetadea në quëwengä da pönongä pöninque onguiñænäni mengäa go adocanque botö imote ante diqui mincæte ante botö owocö boyæ tæcæ pöninque næ gongænänitapa. ¹² Ayæ Wængongui Önöwoca incæ botö imote angä eññeninque botö, Wadäni inänipa, ante püinämaï imo inte guiñänämaï tömënäni tönö

ee gotabopa. Ayæ botö tönö iinäni iñömö tei ganca inäni mänimpodäni godongämæ godänitapa. Gote ayömöni, Codönedio oncö impa, ante adinque go guitamönipa, ante Pegodo apænecantapa. ¹³ Ayæ, Go guiite eññömönite Codönedio iñömö, Æbänö cætimpa, ante apænedinque mönitö imönite iimaï ante apænecantapa. Botö oncönë Wængongui anquedo a ongongä atabopa. Ayæ botö imote äninque anquedo iñömö, “Bitö Cope iñömö ämi wadäni gote Timönö Pegodo näni änogä ingante äñete poncädänimpa. ¹⁴ Tömengä pöninque, Mäni quëwencabo æbänö cæte wænämäi quëwenguimäni, ante bitö imite apænecä eñencæbiimpa.” Mänömainö ante Wængongui anquedo apænecä eñente cætabopa, ante Codönedio mönitö imönite apænecä eñentamönipa.

¹⁵ Mäninganca apænedinque Pegodo iimaï angantapa. “Wængongui Tæiyæ Waëmö Önöwoca mä pöninque mönitö imönite nänö guidö bai ñöwo iñömö botö tæcæ apænecæ cæyömo adocä edæ tömënäniya adobai wææ guicantapa. ¹⁶ İninque botö, Mönö Awënë Itota æbänö angacäi, ante adodö ante pönentabopa. ‘Wäö wodi iñömö æpænë guidongacäimpa. Wængongui Tæiyæ Waëmö Önöwoca guiquënë minitö baonga pö guicæcäimpa,’ ante Itota do apænegacäimpa, ante botö önöwënenque pönentabopa. ¹⁷ Ayæ, Mönö Awënë Itota Codito ingante wede pönëmöni ate Wængongui tömengä Tæiyæ Waëmö Önöwoca ingante da pönongä æntamönipa. Nöwo tömënäni adobai wede pönënäni ate Wængongui mönitö imönite nänö da pönongaingä ingante tömënäniya

adobaï da pönongä ænänipa, ante pönentabopa. Mänömaï cæcampa, ante pönëninque botö, Ædö cæte Wængonguï ingante Baa anguïmoo.”

¹⁸ Ante Pegodo, Æbänö cætimpä, ante tömänö ante edonque apæneca ëñëninque tömënäni wæætë, Mönö ædö cæte godömenque pïinte anguï, ante piyænë cæte apænedänitapa.

—Nöwo idæwaa ämönipa. Wadäni oodeoidi inämaï inäni incæ mönö bai, Idæwaa wënæ wënæ cæte awædö, ante guingo imonte wädäni ate Wængonguï pönö waadete cæcä ate quëwënänipa, ante ñöwo tæcæ mä ëñëmönipa, ante todinque Wængonguï ingante edæ watapæ apænegadänimpa.

Antioquiya iñömö Itota ingante näni pönencabo

¹⁹ Mäningä Etebä wodi ingante wænöninque oodeoidi godömenque wadäni në pönënäni inänite wënæ wënæ togænte pänäni wædinque në pönënäni iñömö wodii winöninque näwæ gote Pënitia ganca Tipidebæ ganca Antioquiya ganca godänitapa. Godinque tömënäni, Itota Codito æbänö cægacäi, ante oodeoidique inänite apænedinque wadäni inänite apænedämaï ingadänimpa. ²⁰ Incæte Tipidebæ iñömö quëwënäni tönö Tidënebæ iñömö quëwënäni pancadäniya Antioquiya iñömö godinque guidiegoidi inänite adobaï Itota Codito ingantedö ante watapæ apænedäni ëñënänitapa. ²¹ Ìninque mönö Awënë tömënäni tönö godongämæ cæcä beyænque nanguï inäni tæcæ pönëninque tömengä gämænö pönänitapa.

²² Mänömaï pönënänipa, ante tededäni ëñëninque Eedotadëë iñömö Codito ingante näni

godongāmæ pōnencabo incæ Bedēnabee ingante, Bitō Antioquiya iñōmō godinque ate pōe, ānāni. ²³ Māniñōmō gote pōninque Bedēnabee iñōmō, Antioquiya iñōmō quēwēnāni inānite Wængonguī waadete pōnō cæcampa, ante adinque nanguī todinque tōmānāni inānite, Mīnitō mīmōno wede pōnēninque mōnō Awēnē miñæ cōwē quēwēedāni, ante nanguī angantapa. ²⁴ Bedēnabee iñōmō Wængonguī Tæiyæ Waēmō Ōnōwoca ingante ēwocadinque nē wede pōnengā inongā inte nē waa cæcā inongāimpa. Ininque tōmengā apænecā ēñēninque tōmēnāni nanguī ināni mōnō Awēnē gāmænō pongadānimpa.

²⁵ Bedēnabee wæætē Taodo ingante diqui mincæte ante Tadoto iñōmō gote, ²⁶ adinque tōmengā ingante Antioquiya iñōmō ænte pongantapa. Pōninque adoque wadepo quēwēninque tōmēnāni Codito ingante nē tee empote quēwencabo tōnō cōwē godongāmæ ponte apænedinque nanguī ināni inānite odōmonte apæneda ēñēnānitapa. Ayæ Antioquiya iñōmō quēwēnāni Codito ingante nē tee empote quēwēnāni inānitedō ante apænedinque, Coditoidi inānipa, ante mā pemōninque apænedōnānimpa.

²⁷ Ayæ Wængonguī beyæ nē apænedāni pancadāniya māniñedē Eedotadēē quēwēninque Antioquiya pōnānitapa. ²⁸ Tōmēnāni nāni Wængonguī beyæ apæneincabo incæ adocanque Agabo nāni ānongā iñōmō Wængonguī Ōnōwoca ingante ēwocate apænedinque, Mōnō waocabo quēwēñōmō tōmāmæ cænguī oo dæ ba adinque mōnō gæwænte wæquīmāmo baquīnō anguēnē,

ante angacāimpa. Īninqe ĩncayæ ate Codaodio Awēnē ingāñedē Agabo nō nānō ānīnō bai do batimpa. ²⁹ Ba adinqe Antioquiya nāni pōnencabo godongāmæ pōnēninqe, Mōnō tōniñadāni ĩñōmō Oodeabæ quēwēninqe edæ tepæmpo gæwænte wædānīpa cæmōō. Tōmēnāni beyæ mōnō godonte æinta pædæ godōninqe adocanque eyepæ inte nānō godonganca wacā eyepæ inte nānō godonganca godongæimpa, ante godongāmæ Ao ānānitapa. ³⁰ Āninqe eyepæ pædæ pōnōninqe Bedēnabee tōnō Taodo ĩnate, Ænte māo godinque nē pōnēnāni ĩnānite nē aadāni nē Picænāni nempo pædæ godōmīna æncædānimpa, ante da pōnōnāni ænte gote godōna ængadānimpa.

12

Tantiago wængā ate Pegodo ingante tee mōnedānīpa

¹ Māniñedē Codito ingante nāni godongāmæ pōnencabo ĩñōnānite awēnē odeye Edode ĩñōmō pancadāniya ĩnānite wēnæ wēnæ cæcæte ante angā bæi ongonte ængadānimpa. ² Mānōmāi cædinque tōmengā angā ēñēninqe Wāō tōniñacā Santiago ingante yaēmenca wænōnāni wængacāimpa. ³ Santiago wodi mānōmāi wængā adinqe oodeoidi todāni ate wædinque Edode, Godōmenque cæbo ate nanguī todinque botō ĩmote waa acædānimpa, ante cædinque Pegodo ingante adobāi bæi ongongantapa. Edæ pāō yedæ æmpoquī ōmæmō ĩ nāni ææmæ cæyedē māniñedē tōmengā ingante bæi ongonte ængantapa. ⁴ Mānōmāi æninqe Edode ĩñōmō, Oodeoidi Patowa ææmæ

īinque bedāni ate botō Pegodo ingante ænte tadonte tōmānāni ayōnānite apænte ancæboimpa, ante pōnēninque tōmengā ingante tee mōnecantapa. Tee mōnedinque Edode godōmenque angā ēñēninque tontadoidi mengāa go mengāa nāni cabo pō wææ wānonte goyōnāni wacabo adopodāni pō wææ wānonte godōnānimpa. Mānōmaī wacabo pō wacabo pō cædinque mencabodāniya go mencabodāniya wæætē wæætē ponte wææ wānonte godōnānimpa. ⁵ Īinque Pegodo ayæ tee mōnete ongōnongāimpa. Incæte tōmēnāni Codito ingante godongāmæ nāni pōnencabo Wængonguī ingante tōmengā beyæ cōwē nangui apænegadānimpa.

Pegodo ingante Wængonguī incæ ñimpo cæcā go-campā

⁶ Pegodo ingante tontadoda mēnaa tōnō æmæncaipo æmæncaipo yaēmengō tæī goti wincapodāni wæyongante wada odemō cōwē wānō cōnōnaimpa. Īinque Edode tōmengā nānō apænte anguiōnæ ado woyowotæ Pegodo mānōmaī goti winte wædongā inte mö ñongantapa. ⁷ Īñontobæ Wængonguī Awēnē nānō da pōnōningā anquedo a ongongantapa. Tee mōnete oncōnē ñāō gongæntapa. Pegodo mö ñōñongante Wængonguī nānō da pōnōningā iñōmō æmætæ inō tao cædinque, “Pegodo, ñāni ōmæmonte quingæ ængæ gantibi.” Äñongā daagōmē nāni tæī winī incæ tōmenque ñīmæncæ tæ wæængatimpa. ⁸ Ayæ, “Bitō weocooga pacadeyænta pacadeyænte awæncata wēwabi.” Angā ēñente cæcā adinque Wængonguī

anquedo godōmenque, “Yacoo wīni caadinque botō miñæ pōe.”

⁹ Angä ēñēninque Pegodo, Awii cæmonte awædō. Anquedo dicæ ponte cæcää. Mänōmaï ponte cæcampa, ante botō wīimonte bai aboimpa, ante wawique pönengä incæte anquedo miñæ tee empote tao gocantapa. ¹⁰ Mänōmaï tao godinque guicōnē nē wänōna ongōñōna wodo tebæ tao godinque yabæcōnē tamongademō nē wänōna ongōñōna wodo tebæ tao godinque yaēmewæ odemō tōmēnāni quēwēñōmō ante nāni tao goquīnemō ganca pōnatapa. Mänīnemō ganca ponte ongōñōna yaēmewæ odemō incæ tōmenque æ ænete bayō tao godinque taadō adodouque cægōna ate anquedo iñōmō ingæ gocā ate Pegodo guiquēnē adocanque a ongongantapa.

¹¹ Adoboque a ongōmopa, ante wædinque tōmengä wæætē nāmā pönengä badinque, “Æ. Nāwangä incæ do tate ēñēmopa. Edode nempo wæwēninque botō oodeoidi nāni pīinō wæquēnēmo īmo adinque Wængonguī angä ēñēninque tōmengä anquedo ponte botō īmote gä pe æmpote ö ængä ate aamō cæbopa, ante tæcæ pōnēmopa.”

¹² Ante pōnente wædinque Pegodo wadæ godinque Wäō Mäadoco nāni ānongä tōmengä badä Mäadiya oncō boyæ ponte næ gongængantapa. Mänincōnē wadāni nē pōnēnāni incæ do pōninque Wængonguī ingante godongāmæ apænee cōnōnānimpā. ¹³ Pegodo iñōmō yabædemō ongonte aa peyongä baquecā nē éacā ingante nē cæcā inte tōmengä emōwo Adoda iñōmō ēñencæte ante pongantapa. ¹⁴ Ponte ēñēñongä Pegodo incæ aa pecā ēñēninque watapæ tote wædinque tōmengä

wii pönëninque odemö wi ænedämaï pogodo gote edæ wadæ guiidinqe, Pegodo incæ oncodo a ongongä tamëñedäni. ¹⁵ Ante apæ necä ëñëninque tömënäni wæætë,

—Adoque antedö amïni.

Ante wæyönäni tömengä, Näwangä impa, ante ancaa angä ëñëninque tömënäni,

—Wa. Pegodo ingante në aacä anquedo ïmaingampa.

¹⁶ Ante tedeyönäni Pegodo iñömö ayæ aa pete ongönongäimpa. Ayæ ponte wi ænete ayönäni Pegodo ingante adinqe ancai guiñente wädänitapa. ¹⁷ Tömengä wæætë, Apocænë ïedäni, ante önompocaque compo cæcä adinqe pæ wëëneyönäni tömënäni ïnänite apæ necantapa. Botö tee mönete wæyömote Wængonguï æbänö pönö cæcä ate tate pömoo, ante tömänö ante adodö ante apænedinqe,

—Botö apænebo mïni ëñënö ante mïnitö wæætë wacä Tantiago ingante apænedinqe wädäni mönö tönïñadäni ïnänite apænemïni ëñencädänimpa.

Äninque Pegodo wayömö wadæ gocantapa.

¹⁸ ïimö wæñö ñäö bayonte tontadoidi guiquënë, Pegodo ædönö gote dæ angää, ante nanguï Yæ yæ ante cädänitapa. ¹⁹ Mänömaï cætimpä, ante apænedäni ëñente wædinque Edode angä diqui diqui miñönäni Pegodo ayæ dæ angantapa. ïninque në wææ wänöninäni ïnänite Edode, Æbänö cætïi, ante ancaa angä wædinque tömënäni, Mönö ædö cæte anguïi, ante wæyönänite tömengä wädäni ïnänite angä capo wænönäni wængadänimpa.

Edode tömë Oodeabæ wadæ tao godinque Tetadea gote quëwengacäimpa.

Edode wængampa

²⁰ Tido iñömö quëwënäni tönö Tidöo iñömö quëwënäni inänite awënë Edode wodi mäniñedë ënogate ænguï bacä adinque tömënäni wæætë godongämæ pönente Ao äninque Edode weca apæ necæ pönänitapa. Tömënäni, Mönö iñömö awënë odeye Edode ömæ quëwënäni pönönäni æninque mäninonque cænte quëwëmompa, ante wædönäni inte tömengä ingante, Bitö piinämaï inte piyænë cæbi quëwëmönie, ante ancæte ante pönänitapa. Pöninque tömënäni Edode oncönë owodäni inänite në aacä Bodato ingante waa cædinque tömengä ingante änäni Ao ante tömengä wæætë Awënë Edode ingante tömënäni beyæ apæ necä ëñengacäimpa. ²¹ Edode iñömö, iñönæ ba ate botö ponte apæ necæboimpa, ante tömengä nänö äniönæ iinque ba ate tömengä awënë weocoo waëmoncoo wëñate pöninque awënë nänö apænte ante containpaa tæ contadinque tömänäni ayönäni tömënäni inänite apæ necantapa. ²² Apæ necä ëñëninque tömänäni Yæ yæ äninque, “Wiï waocanque tedecä ëñëmompa. Wængonguïdi näni tedepämo bai tedecä ëñëmompa.” ²³ Ante Yæ äñönäni Edode wodi wæætë, Näwä Wængonguinque në waa cæcampa, ante anguënengä incæte änämaï pæ wëenecä adinque tömengä ingante Wængonguï anquedo wæætë godö cæcä ate ayago cæ æmæwo wængacäimpa.

24 Incæte Wængonguï nänö angainö ante mäniñedē wayömö mäo wayömö mäo apænedäni eñëninque nanguï inäni mönö Awënë ingante nē wede pönënäni badänitapa.

25 Bedënabee tönö Taodo iñömö Eedotadëë iñömö godinque tömëna nana cæquënënö tömänö iinque cædinque wadæ godinque Wäö Mäadoco näni änogä ingante tömëna tönö æninque adodö godänitapa.

13

Wængonguï angä eñente Bedënabee tönö Taodo godapa

1 Antioquiya iñömö Itota Codito ingante näni godongämæ pönencabo inönäni iñömö pancadäniya Wængonguï beyæ nē apænedäni iñönäni pancadäniya guiquënë nē odömonte apænedäni inönänimpa. Bedënabee tönö wacä Timönö Nëegodo näni änogä inönainpa. Tidënebæ nē quëwëningä Dotio inongäimpa. Pancabaa awënë Edode tönö godongämæ nē pædingä Mänäënë tönö Taodo inönainpa. Mänimpodäni ingadänimpa. 2 İninque tömänäni godongämæ mönö Awënë ingante, Tæiyæ Waëmö imipa, ante watapæ apænecæte ante cænämaï apæneyönänite Wængonguï Tæiyæ Waëmö Önöwoca incæ iïmaï angacäimpa. “Bedënabee tönö Taodo mïnitö tönö nē cæda iñönate ämïni botö beyænque cædinque nänënë godinque botö äninö ante cæcædaimpa,” angacäimpa.

³ Īnque ĩnque cænāmaī inte apænedinque tōmēnāni Bedēnabee tōnō Taodo ĩnate gampocadinque Wængonguī ingante apænedinque ānāni ate wadæ gogadaimpa.

Wāā tēiwænē Tipidebæ gote apæneda ēñēnāni

⁴ Bedēnabee tōnō Taodo ĩñōmō Wængonguī Tæiyæ Waēmō Ōnōwoca mănōmaī angā godīna inte Tedeotia ĩñōmō wæi wipodē ñænæmpodē go guiidinque wogaa godinque wāā tēiwænē Tipidebæ nāni āmæ godatapa. ⁵ Tadamīna nāni quēwēñōmō pōninque oodeoidi odōmōincōnē wacōnē go guī wacōnē go guī cædinque Wængonguī nānō apænedō ante nōingā apæneda ēñengadānimpa. Ayæ Wāō tōmēna mīñæ godinque tōmēna beyæ nē cæcā ĩnongāimpa.

⁶ Mănōmaī wāā tēiwænē tæcæguedē wodo tebæ cægōninque yæcado godinque Papo nāni quēwēñōmō ganca pōnānitapa. Pōninque tōmēnāni wacā idō tōmengā ēmōwo Baditota ingante māmō bee tēnānitapa. Tōmengā ĩñōmō oodeocā ĩnongā inte, Wængonguī beyæ nē apænebo ĩmopa, āninque nē babæ ānongā ĩnongāimpa. ⁷ Tōmengā wāā tēimæ awēnē Tedeguio Pabodo nāni ānongā tōnō godongāmæ nē cædongā ĩnongāimpa. Awēnē Tedeguio guiquēnē nē ocai encadongā inte Wængonguī nānō ānō ante ēñēinente wædinque Bedēnabee tōnō Taodo ĩnate āñete māmongā pōnatapa. ⁸ Tōmēna ponte apæneyōnate idō Baditota guiquēnē guidiego tededō Edīma nāni ānongā ĩnongā inte edæ, Awēnē nē pōnengā badāmaī incæcāimpa, ante wææ cæcæte ante pīinte cæcantapa. ⁹ Īnque Taodo Pabodo nāni ānongā ĩñōmō Wængonguī Tæiyæ Waēmō Ōnōwocaque

ewocadinque idō ingante gomō adinque, ¹⁰ tōmengā ingante angantapa.

—Bitō iñōmō wēnæ awēnē nānōmōmi bai imidō anguēnē. Iñæmpa, Wadāni quiēmē nō impa, ante oda cæcædānimpā, ante bitō piinte pōnēwēnonque entawēninque bitō nē babæ cædōmi imipa tōō. Wængonguī nānō tōinō ponguīnō ante idiquibæ bacæimpā, ante bitō æpogamē incæ cæbii. ¹¹ Nōwo iñōmō Wængonguī Awēnē nē piñængā inongā inte bitō imite pancæcāimpā. Tōmengā pōnō gampomongā ate bitō babetamōmi badinque nænque ñāō tamōnō wantæpiyæ tōmengā nānō ānimpoga adāmaī incæbiimpā.

Åñongā boguīmā bai do wææ iinque wēmō emōninque Edīma Baditota nāni ānongā gampo gampo cædinque, Æcānō botō imote tōō æmænte māoda goquīmoo, ante diqui diqui mingantapa. ¹² Mānōmaī bacā adinque wāā tēimæ awēnē wæætē Wængonguī Awēnē ingantedō ante iñāna nāna odōmonte apænedō ante pōnente guiñente wædinque nē pōnengā bagacāimpā.

Pitidiabæ Antioquiya godinque cædapa

¹³ Pabodoidi iñōmō Papo iñōmō wadæ godinque wipodē ñænæmpodē wogaa taodinque Pampidiabæ pōninque Pedegue iñōmō ti wææñōnāni Wāō wæætē adodō Eedotadēē gocæte ante tōmēna inate emō cæte wadæ gogacāimpā.

¹⁴ Tōmēna wæætē Pedegue wadæ godinque Pitidiabæ pōninque Antioquiya nāni quēwēñōmō pōnatapa. Ayæ tōmēnāni guēmanguīōnæ iinque bayō oodeoidi odōmōincōnē pō guiite tæ contadatapa.

¹⁵ Tæ contate a cōñōna Mōitee wodi nānō

yewæmongainta adinque Wængongui beyæ nē apænegaināni nāni yewæmongainta ate apænedānitapa. Ayæ māniñömō awēnēidi iñömō tōmēnāni weca ongongā adocanque ingante apænedinque,

—Bitō ñōwo pōna inate māo āninque iīmaī apænecæbiimpa, Iñāna, mōni tōniñamīna eñēmīna. Iñömō ongōnāni wampo pōnēninque tæi gongænte ongoncædānimpa, ante cædinque minatō ædæmō apænemīna eñenguñānii, ante āmi apænebaīnapa.

¹⁶ Änāni eñente māo angā eñēninque Pabodo iñömō ængæ gantidinque önompoca compo compo cædinque tōmēnāni inānite apænecantapa.

—Mīnitō, pancamīniya idægoidi iñömīnite pancamīniya wamīni incæ, Nāwā Wængongui inongā ingampa, ante nē guñente wæmīni iñömīnite botō tōmāmīni imīnite apænebo eñēedāni. ¹⁷ Idægoidi, mīnitō imīnite tāno apænebo eñēedāni. Mönō idægocabo Wængongui incæ mönō mæmæidi inānite apænte ængā ate wadāni nēmæ Equitobæ iñömō quēwēñōnānite tōmengā pōnō cæcā ate tōmēnāni tæiyænāni yebængadānimpa. Ayæ Wængongui tæi piñænogā inte ingæ æmæninque tōö æmænte māocā wææ gogadānimpa. ¹⁸ Godinque tōmēnāni coadenta wædepo mānimpoga önömæca cægōninque æbāmē wænæ wænæ cæte quēwēnāni ate wæcā incæte tōmengā pānāmaī inte ata cæpote ænte māocā gogadānimpa. ¹⁹ Ayæ wadāni Cānaāmæ quēwēnāni önompō æmæmpoque go mencabodāniya iñōnānite wido cædinque Wængongui, Tōmēnāni ömæ inī mīnitō ömæ wæætē bacæimpa, ante mönō

wæmæidi inänite pönongä ængadänimpa. ²⁰ Edæ coatodo tiento tincoenta wadepo mänimpoga wabæca quëwënäni ate mäniñedë ate Wængonguï, Minitö ömæ, äninque mönö wæmæidi inänite pönongä æninque quëwengadänimpa.

Ante apænedinque Pabodo, Idægoidi dodäni æbänö cægadäni, ante godömenque apænecantapa. “Mänimæca ponte wantæpiyæ quëwënäni ate pancadäniya në apænte änäni iñönänite Wængonguï angä ate adodäni awënëidi bai badinque wayedë wacä adocanque wayedë wacä adocanque wayedë wacä adocanque aagadänimpa. Tämöedo Wængonguï beyæ në apænegä nänö ponte apæneganca mäninäni aagadänimpa. ²¹ İncayæ ate mönitö dodäni iñömö Wængonguï ingante apænedinque, Bitö adocanque ingante ämi ate tömengä tæiyæ awënë bacæcäimpa, ante ancaa änäni eñente wædinque tömengä wæætë Beencaminö wodi pæingä incæ Titæ wengä Taodo ingante angä bagacäimpa. Tæiyæ awënë badinque tömengä coadenta wadepo mänimpoga iñonte aagacäimpa. ²² Ayæ ate Wængonguï wæætë, Idæwaa, ante Taodo wodi ingante wido cædinque Dabii wodi ingante wæætë angä tæiyæ awënë bagacäimpa. Adocä Dabii ingantedö ante apænedinque Wængonguï, Botö waa pöni entawëmo bai Yæte wengä Dabii iñömö adobai entawengä abopa. Tömengä iñömö botö änö bai edæ tömänö cæqingä ingampa, ante apænegacäimpa.”

²³ “Wængonguï doyedë, Codito ængä beyænque idægoidi quëwencädänimpa, ante do nänö angainö bai ñöwo cædinque adocä Dabii pæingä Itota

Codito ingante da pönongä pongacäimpa. ²⁴ Itota ayæ pönāmaï iñongä Wäö wodi idægoidi tömänāni inānite apænedinque, Minitö, Idæwaa wënæ wënæ cæte awædö, ante Wængonguï gämænö wadæ pöninge æpænë guiedäni, ante apænecä eñengadänimpa. ²⁵ Ayæ adocä Wäö incæ, ‘Botö æbodö imoo, ante pönëmini. Minitö pönënö bai wii imopa. Botö do pönimo iñömote mini nē pönëngä iñömö ayæ poncæcäimpa. Tömengä ingante adinque botö waëmö imopa diyæ tömengä awæncata godö ñi cæquimoo.’ Ante Wäö tömengä nänö cæquënënö wodo iinque cæyedë apænegacäimpa.”

²⁶ Ante apænedinque Pabodo godömenque apænecantapa. “Iñänāni, pancaminiya Abadö wodi pæimini iñömöni pancaminiya wamini incæ Wængonguï ingante guñëmöni iñömöni edæ botö tömämöni iminite apænebo eñëedäni. Mäninö, Codito ængä beyænque quëwencæminimpa, ante Wængonguï tömämö beyæ pönö apænegacäimpa. ²⁷ Eedotadëë quëwënāni tönö tömënāni awënëidi iñömö, Itota æcänö ingää, ante pönënāmaï ingadänimpa. Ìinque guëmanguïönæ iñö guëmanguïönæ iñö Wængonguï beyæ nē apænegaināni nāni yewæmongainta cöwë adāni incæte tömënāni, Itota nänö wænguinque wënæ wënæ cæcä ingampa töö, ante babæ ante apænte änewëninque edæ dodäni nāni yewæmonte angainö bai iinque cädänitapa. ²⁸ Tömënāni, Itota nänö wænguinque æbänö wentamö mongængää, ante cöwä ayönāni edæ dæ ampa. Ante wædinque awënë Pidato ingante apænedinque tömënāni,

Itota ingante ämi wænönāni wængäe, ante ancaa änāni eñēninque Pidato Ao angä wænönāni wængacäimpa. ²⁹ İninque Itota ingante awäa timpote wænöninque tömēnāni dodāni tömengä ingante ante nāni yewæmonte angainō bai tömänö ante iinque cädānitapa. Mänömaï cädāni ate wængä ate tömēnāni änāni ate tömengä miñæ godināni wæætē tömengä nänö ongöwäa pædæ æmpodique önompo o togæmpote wæi önöwa o togæwadinque pædæ wæænöninque edæ ænte mao daga wengadānimpa.”

³⁰ “Incæte Wængongui guiquēnē do wæningä ingante, Nāni ömæmöe, angä ñāni ömæmonte quëwengampa. ³¹ Nāni ömæmöninque tömengä tæönæ iñonte pö pö cædinque a ongöñongante edæ tömengä tönö wëenēnedē Gadideabæ quëwëninque Eedotadēe iñömö nē pongaināni iñömö edæ tömengä ingante wæætē adānitapa. İninque tömēnāni iñömö nē adināni inte waodāni inānite, Itota näwangä ñāni ömæmonte müingä quëwengampa, ante nē apænedāni inānipa.”

³² Ante apænedinque Pabodo, “Dodāni inānite Wængongui, Minitö beyæ botö cöwë pönö cæcæboimpa, ante apænegacäimpa, ante eñēminitawo. Mäninö ante watapæ nänö apænegainö ante mönitö ñöwo iïmai ante apænemönipa. ³³ Mäninö tömengä dodāni inānite nänö angainō bai ñöwo tömēnāni mömoidi beyæ iinque cædinque Wængongui Itota ingante, Nāni ömæmöe, angä ñāni ömæmongacäimpa. Tömengä ñöwo iinque cæcampa, ante Ämotamini nāni Angainta tänota gao wæintaa Wængongui

beyæ iīmaī ante yewæmongatimpa. ‘Botō Wēmi inōmi imipa. Nōwoönæ bitō Mæmpobo babopa.’
³⁴ Ayæ mäninō, Tömengä Wengä do wæningä iñongante Wængonguī angä nāni ömæmöninque baö nñömädämaī incæcäimpa, ante pönëninque Itaiya wodi iīmaī ante Wængonguī beyæ ante yewæmongacäimpa. ‘Awënë Dabii wodi ingante apænedinque botō, Tæiyæ waëmō botō cædō bai cædinque cōwë ædæmō aate cæcæboimpa, ante nō botō angainō bai cædinque mīnitō imīnite pönō adobai cæcæboimpa,’ ante Wængonguī angampa, ante yewæmongacäimpa. ³⁵ Ayæ mäninō ante wataa adobai Wængonguī ingante apænete bai Dabii wodi yewæmongacäimpa. ‘Bitō imite nē Cæcä iñömō bitō cædō ante cōwë cædongä inte wængä adinque bitō ædō cæte tömengä ingante ænāmaī inte ee abi baö nñömäaquiringä,’ ante yewæmongacäimpa.”

³⁶ “Awënë Dabii wodi guiquënë Wængonguī nānō änönō ante eñëninque adoyedë quëwënāni beyæ waa cædingä inte edæ nāñe wæninque tömengä mæmæidi weca æiyongä tömengä baö ini nñömænte bagatimpa. ³⁷ Wæætë Wængonguī, Nāni ömæmōe, angä eñente nē ömæmongaingä iñömō tömengä baö nñömädämaī ingatimpa. ³⁸ Iñinque onguīñæmīni botō tönīñamīni eñëedāni. Itota pönō cæcä beyænque mōnitō mīnitō imīnite apænedinque, Wënæ wënæ mōnō cædō ante adinque Wængonguī pönō nīmpo cæcä ate quëwëmompa, ante apænemōni eñëmīnīpa. Mōitee wodi nānō wææ angainō ante eñente beyænque mōnō iñömō dicæ nō cæte quëwëmō imongaa.

39 Wæætē māningā onguiñængā iñömō Itota iñömō tömengā nō pōni nānō entawēnō ante pōnongā ænte entawēmō beyænque mōnō nē pōnēmō tōmāmō wæætē Wængongui ayongā edæ nō cæte quēwēmō inōmō imōmpa. 40 İinque Wængongui beyæ nē apænegaināni iimaï ante nāni apænegainō ante pōnēninque mīnitō iñömō, Mōnitō imōnite wīi bacæimpa, ante nāmā wææ aquēnē quēwēedāni. İimaï ante edæ ämotamīni ante bai yewæmongadānimpa.

41 ‘Mīnitō nē badete towēmīni inte cōwā aquēnē quēwēedāni.

Botō cæbo adinque mīnitō ancai guiñente wæcæmīnimpa.

Mīnitō ayæ mīimīni quēwēñōmīni edæ botō mā pōni cæcæboimpa, ante pōnēmīniyaa.

Wængongui mänōmaï cæcæcäimpa, ante edonque pōni apænedāni bai

mīnitō wæætē, Babæ ancædō, ante wæcædōmīnimpa.’

Ante nāni yewæmongainō ante adinque edæ badete todāmaï iedāni,” ante Pabodo apænecantapa.

42 Mänōmainō ante iinque apænedinque Pabodo tōnō Bedēnabee tōmēnāni odōmōincōnē ongonde oncodo tao goyōnate Antioquiya iñömō quēwēnāni iñömō, Wacā guēmanguionæ bayonte minatō ñōwoönæ mīna apænedō bai godōmenque apænemīna eñencæmōnimpa, änānitapa. 43 Ayæ godongāmæ nāni ponte ongōnincabo tao goyōnāni oodeoidi pancadāniya ayæ oodeoidi bai nē bagaināni adobai Wængongui ingante guiñente quēwēnāni nanguï ināni iñömō Pabodo tōnō

Bedēnabee inate edæ tee empote godäni. Adinque iñāna wæætē tōmēnāni inānite apænedinque, Wængongui waadete nānō pōnō cædōnō ante pōnēninque mīnitō cōwē ñimpo cædāmaï tæi ongōninque edæ waa quēwēedāni, ante nanguï apænedatapa.

⁴⁴ Ayæ adoque Wængongui itædē go ate tōmēnāni nāni guēmanguïönæ bayonte māniñōmō quēwēnāni wodo tōmānāni Wængongui Awēnē nānō änō ēñencæte ante godongāmæ pōnānitapa.

⁴⁵ Nanguï ināni mănōmaï pōnāni ate wædinque oodeoidi guiquēnē pīinte badinque, Babæ ante ānewengampa, ante Pabodo ingante godō pīinte tedewēnānitapa. ⁴⁶ Mănōmaï tedewēñōnānite Pabodo tōnō Bedēnabee wæætē guiñēnedāmaï inte apænedatapa.

—Mīnitō oodeoidi imīni inte edæ tāno ēñencæmīnimpa, ante cædinque mōnatō Wængongui nānō änō ante edæ mā apænedinque mīnitō imīnite tāno apænequēnēmōna intamōnapa. Mīnitō iñæmpa mīni cōwē wænāmaï quēwenguinō ante apæneyōmōna mīni apænte pangā wæquinque edæ Baa ämīnīpa. Ante wæmōna inte mōnatō ñōwo emō cæte godinque edæ oodeoidi ināmaï ināni weca edæ apænecæ gomōna tamēñedāni. ⁴⁷ Mōnitō Awēnē iīmaï ante mōnatō imōnate angacāimpa.

“Quēwencæmīnimpa, ante botō cægainō ante bitō inguipoga tōmāmæ māo apænedinque Oodeoidi ināmaï ināni beyæ tica ēnente baï cæcæbiimpa, ante cædinque botō bitō imite da godōmo apænecæ gocæbiimpa.”

Ante nē apænegaingä inte Wængongui mönatō imönate angä eñente apænemönapa.

⁴⁸ Mänömainō ante apæneda eñëninque oodeoidi ināmaï ināni iñömö, Awënë nänö apænedö waa eñëmönipa, ante watapæ apænedänitapa. Ayæ mönō Awënë doyedë apænedinque, Mänimpodänique wede pönëninque cōwë wädämaï quëwenguinäni incädänimpa, ante tömengä nänö nē angainänique ñöwo pönënanitapa. ⁴⁹ İninque mönō Awënë tömengä nänö apænedö ante mao apæneyönäni mäniömæ tömāo quëwënäni eñënanitapa.

⁵⁰ Oodeoidi guiquënë, Pabodo tönö Bedënabee inate mönō wido cæcæimpa, ante cædinque iimaï cädänitapa. Onquiyænäni nāni nē waa adäni inte Wængongui ingante guñente quëwënäni iñönänite tömënäni tönö onguinænäni mäniñömö quëwënäni awënëidi bai inte ñænænäni iñönänite oodeoidi, Badogaa, ante nanguï änäni eñënanitapa. Oodeoidi nanguï änäni eñente cædinque mäninäni wæætë Pabodo tönö Bedënabee inate togænte päninque, Mönitö ömæ quëwënämaï, ante wido cädäni godatapa. ⁵¹ Mänömaï cädäni godinque tömëna iñömö, Mänimæ näwate awædö, ante bai cædinque piwacæ piwacæ cædinque Icönio iñömö gocæte ante wadæ godatapa. ⁵² Itota ingante nē tee empote quëwënäni guiquënë watapæ todäni badinque Wængongui Tæiyæ Waëmö Önöwoca ingante ænte ewocadinque edæ waa quëwengadänimpa.

14

Pabodo tönö Bedënabee Icönio iñömö godapa

1 Māniī godinque Icōnio nāni quēwēñōmō pōninque Pabodo tōnō Bedēnabee cōwē nāna cæi bai cædinque oodeoidi odōmōincōnē go guidatapa. Go guiite apæneyōna, Nō apæneda, ante pōnēninque oodeoidi tōnō oodeoidi ināmaī ināni tōnō nanguī ināni nāni wede pōnenguinque ēñēnānitapa. ² Wæætē oodeoidi incæ pancadāniya nē Baa ānāni inte babæ wapiticæ apænedinque, Iñāna nē wēnæ wēnæ apæneda inate wīi ēñengæimpa. Ante tedewēnāni ēñente wædinque wadāni oodeoidi ināmaī ināni wæætē piinte badinque mōnō tōniñada inate ante wīwa adānitapa. ³ Incæte iñāna wantæpiyæ māniñōmō quēwēninque guiñēnedāmaī inte mōnō Awēnē beyæ apænedatapa. Apæneyōna mōnō Awēnē incæ, Pabodo tōnō Bedēnabee iñōmō botō pōnō waadete cægainō ante nē nō apæneda inōnapa, ante wadāni pōnencædānimpa, ante cædinque tōmēna tōnō godongāmæ cæcā ate tōmēna, Ate pōnencædānimpa, ante mā cædinque bamōnengæ cædatapa.

⁴ Mānōmaī cæda incæte māniñōmō quēwēnāni pancadāniya, Oodeoidi bai pōnēmōnīpa, āñōnānite wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa. ⁵ Iñinque oodeoidi tōnō oodeoidi ināmaī ināni tōnō tōmēnāni awēnēidi tōnō godongāmæ pōnēninque, Pabodo tōnō Bedēnabee inate mōnō piinte cædinque dicaca tacamō wæncædaimpa. ⁶ Ante Ao ante cæyōnāni Pabodo tōnō Bedēnabee iñōmō, Mānōmaī ante cædānīpa, ante ēñente wædinque wodii wīnōnatapa. Wodii wīnonte godinque Dicaōniabæ pōninque

tömëna Ditada näni quëwëñömö Dedebe näni quëwëñömö wayömö wayömö godinque, ⁷ mönö Awënë ingantedö ante watapæ mäo godömenque apæneda ëñënönänimpa.

Ditada iñömö Pabodo ingante tacadänipa

⁸ Mäniñömö Ditada iñömö edæ wacä cabæwaingä tömengä önöwa tipæwaa wënæ wënæ ëwacä ëñagaingä inte dao dao godämaingä pægaingä inte tæ contate a ongongantapa. ⁹ A ongöñongä Pabodo ponte apænecä ëñëe congantapa. Pabodo wæämö adinque önöwënenque pönëninque, Ìngä nänö waa bawaquinque në pönengä ingampa, ante do pönente wædinque, ¹⁰ tömengä ingante ogæ tedete,

—Ængæ gantidinke adiyæ gongæmi ämopa.

Angä ëñëninque në cabæwaingä incæ quingæ ængæ gantidinke dao dao gocantapa. ¹¹ Mäniñömö ongönäni guiquënë Pabodo mänömaï cæcä ate wædinque dicaöniaidi tömënäni tededö yedæ äninque,

—Ìñäna iñömö wængonguina incæ waoda bai bate mönö weca wæænte ongöna abaimpa.

¹² Ante pönente wædinque Bedënabee ingantedö ante apænedinke, Mönö wængongui Deoto ingänö angüënë, ante Deoto pönö pemöninque, Ìngä wæätë në apænecä ingampa, ante pönëninque Pabodo ingante, Mönö wængongui Edëme ingänö angüënë, ante pemönänitapa. ¹³ Ayæ tömënäni quëwëñömö yæcado tömënäni wængongui Deoto oncö mænonte ongönimpa. Deoto qui, ante në godongä iñömö edæ, Pabodo tönö Bedënabee në wængonguina inapa, ante wapiticæ pönëninque,

Mönö wængonguina qui, ante tömänäni tönö godoncæ cæcantapa. Mänömainö ante cædinque tömengä näni que cædi ongai ænte pöningue wagadaidi onguĩñænäni inänite yabædemö ænte ponte wænoncæ cæcantapa. ¹⁴ Mänömai cæcä ate wædinque në ponte apænedä Bedënabee tönö Pabodo iñömö, Wiwa cæminipa, ante bai cædinque nämä weocoo wänä ñæningue pogodo mämö nangui ongönäni weca tæcæguedé næ gongæningue,

¹⁵ —Iñänäni, quimæ quëwëminii. Minitö waomini iminipa, mönatö minitö bai adobai waomöna imöna apa quëwëminii. Mönatö iñæmpa watapæ möna eñënö ante apænecæte ante pönimöna inte minitö iminite iimaï ante ämönapa. Iincoo mini waa adincoo incæ edæ, Önoncooque impa, ante adinque minitö mänincooque wido cædinque Wængongui në Quëwengä gämænö pöedäni. Tömengä iñömö öönæ inguipoga gäwapæntibæ në badongaingä inte öönædë quëwënäni tömänäni inguipoga quëwënäni tömänäni gäwapäa quëwënäni tömänäni inänite në badongaingä Wængongui inongä ingampa. ¹⁶ Tömengä wëenëñedë tömämæ quëwënäni nämä pönëningue näni goquïnonque ee acä gogadänimpa. ¹⁷ Incæte tömënäni inänite wii æmæwo emö cæte gogacäimpa. Wæætë edæ, Wængongui æbänö ingää, ante eñencädänimpa, ante cædinque tömengä ñimpo cädämaï cöwë odömongacäimpa. Edæ minitö iminite pönö waadete cædinque Wængongui cöönæ angä inguipoga wææ inique incadepo incadepo cængui eyepæ pönongä cæningue minitö watapæ todinque quëwëminipa.

18 Mänömainō ante Pabodo tönō Bedēnabee wææ cæcæte ante apæneda ēñēnāni incæte godongāmæ ongönāni guiquēnē, Minatō wængonguimīna qui, ante cōwē pōnoncæmōnimpa, ante wawique pōnēninque cædānitapa. Wodo edæ pōnōñōnānite iñāna godōmenque wææ āna ēñēninque ñimpo cæte wīi pōnōnānitapa.

19 Ayæ ate oodeoidi Antioquiya iñōmō quēwēninque Icōnio iñōmō quēwēninque pō Ditada iñōmō pōninque māniñōmō godongāmæ ongönāni inānite, İina onguĩñæna inate mōnō wīi ēñengæimpa, ante ānāni. Ēñēninque godongāmæ Ao āninque Pabodo ingante dicaca tacadāni wæyongā, Æmæwo wængampa, ante pōnēninque tōmēnāni nāni quēwēñōmō yabæ inō wēä māo wido cædānitapa. 20 Incæte Itota ingante tee empote quēwēnāni godongāmæ ponte æænīmæ gongænte ayōnāni Pabodo yabæque æmæwo wænte bai ōñōningā inte ængæ gantidinque adodō tōmēnāni quēwēñōmō pongantapa. Ayæ iimō ate tōmengā Bedēnabee tönō wæætē Dedebe nāni quēwēñōmō adodō gocæte ante wadæ godatapa.

21 Godinque Dedebe iñōmō pōninque Codito ingantedō ante watapæ apæneda ēñēninque tōmēnāni nanguĩ ināni Itota miñæ quēwēnāni bagadānimpa. İinque tōmēna māniñōmō idæwaa apænete wadæ godinque Ditada iñōmō adodō pō godinque Icōnio iñōmō adodō pō godinque Antioquiya nāni quēwēñōmō wæætē pōnatapa. 22 Mänōmaĩ wayōmō wayōmō godinque Itota ingante nē tee empote quēwēnāni inānite bee tēninque Pabodo tönō Bedēnabee nanguĩ

apænedā ēñēninque iināni godōmenque tæi piñænte entawēnāni badānitapa. Ayæ tōmēnāni inānite, Mīni pōnēnō ante ñimpo cædāmaī inte godōmenque wede pōnēninque tæi ongoncæminimpa, ante ædæmō apænedā ēñēnānitapa. Ayæ waadete apænedinque, Mōnō nangui nantate wædinque Wængongui Awēnē Odeye nempo guicæimpa, ante apænedatapa. ²³ Ayæ wayōmō wayōmō tōmāo godinque Itota ingante godongāmæ nāni pōnencabo weca go guiite ongōninque Pabodo tōnō Bedēnabee iñōmō iīmaī cædatapa. Nē nō cædāni inānite adinque tōmēna, Itota Codito ingante mīni godongāmæ pōnencabo iñōminite iināninque edæ nē aadāni bacædānimpa, ante āna ate māniñānique nē Picænāni nāni ānōnāni badānitapa. Ayæ cænāmaī inte Wængongui ingante apænete ate tōmēnāni inānite iñāna, Minitō mōnō Awēnē ingante wede pōnēmīnitawoo. Tōmengā mīni nē pōnēnongā incæ mīnitō imīnite wææ aacæcāimpa, ante apænedatapa.

Tidiabæ Antioquiya iñōmō ocæ emcænte godapa

²⁴ Pabodo tōnō Bedēnabee ayæ Pitidiabæ wodo tebæ godinque Pampidiabæ pōnatapa. ²⁵ Māniñōmō ponte Pedegue nāni quēwēñōmō mōnō Awēnē nānō angainō ante apænedinque Ataya nāni quēwēñōmō wææ pōnatapa. ²⁶ Māniñōmō pōninque tōmēna imæmāa Antioquiya iñōmō adodō tacæte ante ñænæ wipodē guiddatapa. Doyedē iñōmō tōmēna nāna māniñōmō quēwente tao goyedē wadāni nē pōnēnāni inte tōmēna inate, Wængongui pōnō waadete godongāmæ cæcā ate mīnatō eyepæ

cæcæmīnaimpa, ante da godongaināni inōnānimpā. Nōwo iñōmō tōmēnāni nāni ānīnō do iinque eyepæ cædīna inte tōmēna adoyōmō nāni da godiñōmō ocæ ēmænte pōnatapa. ²⁷ Māniñōmō pōninque tōmēnā Itota ingante godongāmæ nāni pōnencabo inānite āñete pōnāni ate tōmēnāni inānite apænedinque Wængonguī tōmēna tōnō nānō cædīnō ante adodō adodō tōmānō ante apænedatapa. Oodeoidi ināmaī ināni wede pōnēninque guicædānimpā, ante Wængonguī odemō wi ænete bai cæcā ate do pōnente badānimpā, ante apæneda ēñēnānitapa. ²⁸ Ayæ māniñōmō Itota ingate nē tee empote quēwēnāni tōnō wantæpiyæ quēwengadaimpā.

15

Eedotadēē iñōmō pōninque wæætēdō wæætē ānāni

¹ Māniñēdē onguīñænāni Oodeabæ quēwēnāni pancadāniya Antioquiya iñōmō wææ pōninque nē pōnēnāni inānite iīmaī ante odōmonte wææ angadānimpā. Minitō bagāamīni inte Mōitee wodi nānō wææ angainō bai wīi cæmīni adinque Wængonguī dicæ ængampa quēwenguīmīni. ² Ante wææ ānewēnāni ēñente wædinque Pabodo tōnō Bedēnabee iñōmō, Quīmæ ānewēmīni, ante nāēmæ wææ ānatapa. Iinque Antioquiya iñōmō quēwēnāni guiquēnē Pabodo tōnō Bedēnabee tōnō wadāni nē pōnēnāni inānite, Minitō Eedotadēē godinque Itota nānō da godongaināni tōnō nē aadāni Picænāni inānite bee tēninque, Oodeabæ quēwēnāni nāni wææ ānōnō ante æbānō cæquīi, ante ēñencæte ante æedāni.

³ Äninqe Itota Codito ingante godongämæ nāni pönencabo incæ Pabodoidi inänite da godönāni wadæ godänitapa. Ayæ godinque Pēnitiabæ wodo tebæ godinque mänimæ quēwēnāni inänite apænedinque godömenque Tämadiabæ adobaï wodo tebæ gote apænedinque, Wængonguï pönö cæcä ate oodeoidi inämaï ināni incæ mönō Awēnē gämænō do pönānīpa, ante Pabodoidi apænedāni. Eñēninque mönō tōniñadāni mänimæ quēwēnāni incæ watapæ todänitapa.

⁴ Pabodoidi Eedotadēē iñömö pönāni adinque Codito ingante nāni godongämæ pönencabo tönö Itota nänö da godongaināni tönö nē pönēnāni inänite nē aadāni nē Picænāni tönö godongämæ ponte ongöninque Pabodoidi inänite, Waa pömīni amönīpa. Ante äñönänite Pabodo tönö Bedēnabee iñömö, Wængonguï iïmaï mönatö tönö godongämæ cæcampa, ante tōmānō ante adodö adodö apænedā eñēnānitapa. ⁵ Māniñedē Paditeoidi incæ pancadāniya nē pönēnāni badīnāni inte ængæ gantidinque iïmaï ante apænedānitapa.

—Iñæmpa oodeoidi inämaï ināni inänite, Cōwē eö togænguēnēmīni iimīnīpa, ante mönō wææ angæimpa. Ayæ Möitee wodi, iïmaï cæedāni, ante nänö angainō ante eñenguēnēmīni iimīnīpa, ante mönō cōwē angæimpa.

⁶ Änāni ate Itota nänö da godongaināni tönö nē pönēnāni inänite nē aadāni Picænāni tönö godongämæ pöninque, Oodeoidi inämaï ināni inänite mönō æbānō anguïi, ante tedecönānitapa. ⁷ Māninö ante wæætedö wææte apænedāni adinque Pegodo guiquēnē ængæ gantidinque

godongämæ ongönäni inänite iimaï ante apænecantapa.

—Botö mēmōidi, mīnitō iimainō ante do ēñēmīnīpa. Wængonguī do inōñedē, Oodeoidi ināmaï ināni incæ Codito ingantedō ante watapæ ēñēninque edæ nē pōnēnāni bacædānimpa, ante cædinque mōnō imonte apænte æninque botō imote angā gote māninō ante apænebo ēñēnānitapa. ⁸ Da godongā gote apæneyōmo Wængonguī, Waocā æbānō mīmōno pōnengā ingāā, ante nē ēñēnongā inte edæ tōmengā Tæiyæ Waēmō Önōwoca ingante oodeoidi ināmaï ināni inänite da pōnongā ænte ewocadānīpa. Īninque mōnō imonte pōnō cæcā baï tōmēnāni inänite adobaï cædinque tōmengā edæ, Oodeoidi ināmaï ināni inänite botō Ao ante do æmopa, ante odōmongā abaimpa. ⁹ Tōmēnāni wede nāni pōnēnō beyænque Wængonguī tōmēnāni mīmō ñā mēnongadinque, Oodeoidi ināmaï ināni incæ mīnitō baï adobaï ināni apa ānewēmīnīi, angampa. ¹⁰ Mōnō iñōmō mōnō mæmæidi tōnō teēmē mongænte baï wædinque edæ, Mōitee wodi nānō wææ angainō ante mōnō ædō cæte ēñente cæquīi, ante godongämæ wægāmōimpa. Ñōwo guiquēnē Oodeoidi ināmaï ināni incæ tæcæ pōnēñōnānite mīnitō iñōmō teēmē cōnōnancapænte baï cædinque tōmēnāni inänite, Cædāni, ante wææ āmīnīpa tōō. Mānōmaï cædinque mīnitō, Wængonguī ōnonque cæcampa, ante baï cæmīnīpa tōō. ¹¹ Īñæmpa mōnō Awēnē Itota pōnō waadete ængā beyænque tōmēnāni wænāmaï inte quēwēnāni baï mōnō adobaï māninō beyænque wænāmaï inte quēwēmōmpa, ante pōnēmōnīpa. Mānōmainō ante Pegodo iinque

apænecä eññänitapa.

¹² Ayæ Bedënabee tönö Pabodo wæætë tömënäni inänite apæneda eññëningue godongämæ ongönäni tömänäni edæ tededämaï inte eññë cönänitapa. Tömëna iñömö, Wængongui mönatö tönö godongämæ cædinque edæ, Mīnatö mä cämīna adinque Oodeoidi inämaï inäni incæ pönencædänimpa, ante cædinque bamönengæ wæætë wæætë cæcantapa, ante adodö adodö ante apænedatapa. ¹³ Ìnque apæneda ate Tantiago wæætë tömangä apænecantapa.

—Botö biwiidi, botö ñöwo apænebo eññedäni.

¹⁴ Wængongui täno waadete pönö cædinque oodeoidi inämaï inäni pancadäniya inänite apænte æningue, Botö quimīni bacæminimpa, ante cæcantapa, ante Timönö do apænecä eññentamompa.

¹⁵ Ayæ Wængongui beyæ nē apænegainäni incæ, Ìincayæ ate Wængongui mänömaï cæcæcäimpa, ante pönëningue adoyömö ante iimainö ante do yewæmongadänimpa.

¹⁶ “Awënë Dabii nempo nē quëwengainäni näwæ godäni adinque

botö iñömö oncö wodintai wæætë tæi mænonte bai cædinque,

ìincayæ ate adodö pöninque pönö cæbo ate

näwæ gogainäni iñömö Awënë nempo adodö pöninque quëwencædänimpa.

¹⁷ Mänömaï cæbo ate edæ wadäni tömämæ quëwëningue

oodeoidi inämaï inäni incæ botö emöwo ante nē ewocadäni inte

näwä Awënë ingante ante diqui diqui minte acædänimpa,

18 ante mönö Awënë iñömö edæ
mäninö ante nē cægaingä inongä inte,
do cæcä näni eñengainö ante apæncampa.”

19 Ante yewæmongatimpa, ante Tantiago
godömenque apæncantapa. “Botö Wængonguï
nänö apænegainö ante pönente wædinque,
ïimai cæcæimpa, ante pönemopa. Oodeoidi
inämai inäni, Idæwaa wapiticæ pönente awädö,
ante wædinque ocæ emænte näwä Wængonguï
gämænö pöñönänite mönö edæ ee cædinque
tömänäni taadö ganta cædedämai ingæimpa.

20 Önonque, Tömänäni acædänimpa, ante ïimai ante
yewæmongæimpa, Wadäni, Wængonguïdi quï,
ante cænguï näni cönöni cænämai incæminimpa.
Ayæ nänöogængä inämai iñongante godö mönämai
incæminimpa. Ööingä ñe wëmencate wæningä ate
cænämai incæminimpa. Baö wepæ owemöingä
i adinque cænämai incæminimpa, ante mönö
yewæmongæimpa, ämopa. 21 Edæ doyedë pöni
oodeoidi näni quëwëñömö näni quëwëñömö tömää
iñömö mäo Möitee wodi nänö wææ angainö ante
apænedäni eñengadänimpa. Ayæ ñowo ganca
adobainö ante guëmanguïönæ iñö guëmanguïönæ
iñö mönö odömöincönë go guïite apænedäni eñente
mänömainö ante eñente cæquënenäni inänipa.
Mäninonque ante mönö yewæmongæimpa,
ämopa,” ante Tantiago iinque apæncantapa.

*Oodeoidi inämai inäni acædänimpa, ante
yewæmönänipa*

22 Mänömainö ante apæncä eñëninque Itota
nänö da godongainäni tönö nē aadäni Picænäni
tönö Itota Codito ingante godongämæ näni

pōnencabo tōmancabo tōnō godongāmæ pōnēninque, Mōnō cabo incæ mēnaa inate apænte æninque tōmēna inate, Mīnatō Pabodo tōnō Bedēnabee miñæ Antioquiya goeda, amō gocædaimpa. Ante Ao āninque tōmēnāni, Mōnō pōnencabo iñōmonte Codaa Badatabato mōnō ānongā tōnō Tidato iñōmō nē āna inapa, ante adinque tōmēna inate apænte ænānitapa. ²³ Ayæ, Cadota ante ænte gocædānimpa, ante iīmaī ante yewæmongadānimpa.

Mōnitō pancamōniya Itota nānō da godongaīmōni iñōmōni pancamōniya nē pōnēnāni inānite nē aamōni Picæmōni imōnipa. Mānōmaī imōni inte mōnitō mīnitō tōniñamōni imōnipa. Mīnitō oodeoidi ināmaī imīni inte Antioquiya iñōmō Tidiabæ iñōmō Tiditiabæ iñōmō quēwēninque mīni pōnencabo mīni pōnencabo iñōmīnite mōnitō, Waa quēwencæmīnimpa, amōnipa.

²⁴ Iīmaī ante tededāni eñentamōnipa. Mōnitō, Goedāni, ānāmaī iñōmōni wadāni mōni cabo incæ pancadāniya wadæ gote mīnitō weca pōninque mīnitō imīnite, Eō togæedāni, ante wææ ānāni. Eñēninque mīnitō tōmēnāni nāni wææ ānīnō beyænque teēmē mongænte bai, Æbānō cæquī, ante wæmīnipa, ante tededāni eñēmōnipa. ²⁵ Mānōmainō ante tededāni eñente wædinque mōnitō godongāmæ pōnēninque onguīñæna mēnaa inate apænte æninque tōmēna inate iīmaī antamōnipa. Mīnatō Bedēnabee tōnō Pabodo mōnō nē waadeda tōnō godongāmæ godinque oodeoidi ināmaī ināni weca goeda, ante cætamōnipa. ²⁶ Bedēnabee tōnō Pabodo iñōmō mōnō Awēnē Itota Codito

ēmōwo beyænque cædinque nāna nāmā wodo wænguinque cædatapa. ²⁷ Īninque, Īi cadota mōni yewæmōnō nāwangā impa, ante adodō ante apænecædaimpa, ante cædinque mōnitō Codaa tōnō Tidato ĩnate da godōmōni godinque mīnitō weca pōna aedāni. ²⁸ Edæ, mōnitō Wængonguī Tæiyæ Waēmō Ōnōwoca tōnō godongāmæ pōnēninque, Mīnitō godōmenque teēmē mongænāmaī incæmīnimpā, antamōnipā. Īninque, Mīnitō ĩmaī cædinque idæwaa, ante pōnēmōnipā.

²⁹ Wadāni, Wængonguīdi quī, ante cænguī nāni cōnōnincoo ante cænāmaī gomō aedāni. Wepæ owemōingā adinque ōōingā ñē wēmencate wæningā adinque cænāmaī ĩedāni. Ayæ nānōogængā ĩnāmaī ĩñongante godō mōnāmaī ĩedāni. Mīnitō māninque ante ee ate cædāmaī ĩmīni ĩninque waa quēwēmaīmīnipā. Māninque ante yewæmōmōnipā.

³⁰ Ante yewæmonte pædæ pōnōnāni ænte wadæ godinque Antioquiya ĩñōmō wæidinque nē pōnēnāni ĩnānite añete godongāmæ pōnāni ate Eedotadēē quēwente pōnāni tōmēnāni nāni yewæmōninta pædæ pōnōnāni ænte adānitapa. ³¹ Eedotadēē quēwēnāni, Mīnitō godōmenque teēmē mongænāmaī incæmīnimpā, ante nāni yewæmonte ānīnō adinque oodeoidi ĩnāmaī ĩnāni ĩñōmō wampo pōninque todānitapa. ³² Codaa tōnō Tidato ĩñōmō Wængonguī beyæ nē apæneda inte adobaī, Tæī piñænte entawencæmīnimpā, ante cædinque ædæmō apæneda ēñēninque tōmēnāni nāni pōnencabo mīmōnē gancæ batawente

wede pōnēnānitapa. ³³ Īninqe tæōnæ quēwēna ate māniñōmō quēwēnāni nāni pōnencabo wæætē tōmēna inate waa apænedinque, Ñowo gānē pōnēninque waa goeda, ante tōmēna inate nē da pōnōnāni weca wæætē adodō da godōnāni godatapa. ³⁴ Tidato guiquēnē, Īñōmō ongoncæboimpa, ante ayæ ongongantapa. ³⁵ Pabodo tōnō Bedēnabee guiquēnē Antioquiya iñōmō ayæ quēwēninque wadāni nanguī ināni tōnō godongāmæ odōmōninque Wængonguī nānō ānō ante watapæ apæneda ēñengadānimpa.

Pabodo ingante wæætē da godōnāni gocampa

³⁶ Īncayæ ate Bedēnabee ingante Pabodo,
—Wēēnēñedē Wængonguī nānō ānō ante mōna gote apænediñōmō wæætē adoyōmō gote mōnatō tōniñadāni weca gote ēñadinque, Æbānō quēwēnāni, ante acæmōnaimpa.

³⁷ Āñongā Bedēnabee Ao angantapa. Ayæ tōmengā, Wāō Mādoco nāni ānongā ingante mōnatō tōnō godongāmæ gocæcāimpa, ante cæcantapa. ³⁸ Pabodo guiquēnē, Īñæmpa wēēnēñedē Pampidiabæ iñōmō pōñōmōnate ñingā Mādoco iñōmō mōnatō tōnō godōmenque cædāmaī inte edæ wadæ gocantapa, āninque, Ñowo wīī ænte gocæimpa, ante Baa angantapa. ³⁹ Īninqe tōmēna wæætedō wæætē āninque tōmēna wadō wadō gote panguimæ godatapa. Bedēnabee guiquēnē Mādoco ingante ænte ñænæ gāwapāa gote wipodē ñænæmpodē guite wogaa godinque wāā tēiwænē Tipidebæ tao gocantapa. ⁴⁰ Pabodo guiquēnē Tidato ingante apænte ænte gocæ cæyongante

tömənäni näni pönencabo iñömö tömēna inate apænedinque, Wængongui mīnatō beyæ pönō waadete cæcæcäimpa, änäni eñēninque wadæ godatapa. ⁴¹ Ayæ Tidiabæ tömāo godinque Tiditiabæ tömāo godinque Pabodo iñömö Codito ingante näni godongämæ pönencabo inänite apænecä eñēninque tömənäni wede pönēninque tæi piñænte batawengadänimpa.

16

Pabodo tönö Tidato miñcæ Timoteo gocampa

¹ Mänii godinque Pabodo Dedebe iñömö ponganque go Ditada iñömö pongantapa. Itota ingante tee empote nē gocä Timoteo mäniiñömö quēwengacäimpa. Tömengä wäänä oodea inōna incæ nē ædæmō cæte pönēnä inönäimpa. Timoteo mæmpo wæætē guidiego inongäimpa. ² Timoteo iñömö Itota ingante pönente quēwengä adinque nē pönənäni Ditada iñömö quēwēnāni incæ Icōnio iñömö quēwēnāni incæ, Timoteo nē waa quēwēnongä ingampa, ante adoyömö apænedänitapa. ³ İninque Pabodo, Botō tönö Timoteo guēa gocæcäimpa, angantapa. Wæætē, Oodeoidi mänimæ quēwēnāni tömänäni, Timoteo mæmpo guidiego ingampa, ante do eñēnāni inte piināni wæcæ wæ. Äninque Pabodo angä yæcadogæ eö togænāni ate Timoteo ingante ænte gocantapa. ⁴ Godinque Pabodoidi wayömö näni quēwēñömö wayömö näni quēwēñömö godinque iimaī ante apænedänitapa. Minitō oodeoidi ināmaī imini inte æbänö eñente cæte quēwenguimīni, ante Eedotadēe iñömö nē aadāni Picænāni tönö

Itota nänö da godongainäni tönö godongämæ pönëninque do änänipa. Ante apænedinque Pabodoidi wæætë tömënäni nani äninö ante adodö ante apænedäni ëñënanitapa. ⁵ Mänömaï apænedäni ëñente wædinque Codito ingante nani godongämæ pönencabo iñömö wayömö nani cabo wayömö nani cabo tömänäni wede pönëninque edæ tæi piñante badinque iimö iñö godömenque iimö iñö godömenque nanguï yebænte bagadänimpa.

Mäatedöniabæ quëwengä ingante Pabodo wüimonte acä

⁶ Pabodoidi Atiabæ gocæ cæyönänite Wængonguï Tæiyæ Waëmö Önöwoca iïmaï ante apænecantapa. Minitö botö änö ante mänimæ apænecæ godämaï incæminimpa, ante wææ angä ëñente wædinque tömënäni wæætë Gadatiabæ incæ pancabaa Pidiquiabæ tømäo cægöninque godänitapa. ⁷ Mänimæ cægönaque go Mïitiyabæ ganca pöninque Bitüniabæ gocæ cæyönänite Itota Tæiyæ Waëmö Önöwoca incæ, Godämaï, Baa angä wædinque tömënäni mäniñömö ñimpo cæte godömenque godämaï inänitapa. ⁸ Mänömaï beyæ tömënäni Mïitiyabæ wodo pänta go Todoa iñömö wæi godänitapa.

⁹ Mäniñömö wæi gote ongöninque woyowotæ ba ate Pabodo wüimonte bai ayongä Mäatedöniabæ onguïñængä a ongöninque tömengä ingante iïmaï ante apænecantapa. “Mäatedöniabæ pöninque bitö mönitö imönite pönö cæquimi ämönipa,” ante Pabodo ingante angä ëñengantapa. ¹⁰ İninque Pabodo, Mänömaï wüimonte bai atabopa, ante apænecä ëñente wædinque

mōnitō wæætē, Mīnitō Māatedōniabæ gote māo apænemīni ēñcædānīmpa, ante Wængonguī incæ cæbaingampa. Ante pōnente wædinque botō Odocabo tōnō wadāni Pabodo tōnō nē godongāmæ cædāni tōnō wæætē, Mōnō māniñmō gote Codito ingantedō ante watapæ apænecæīmpa, ante pōnēninque gocæte ante cætamōnīpa.

Pabodo tōnō Tidato Pidipoto iñmō ponte cædapa

¹¹ Mānōmainō ante pōnēmōni inte mōnitō Todoa iñmō gāwapæ wedeca quēwēninque ñænæ wipodē guiite wogaa tao godinque wāā tēiwænē Tāmotadate tōingā gote mōninque iimō ate tao Nēapodi pontamōnīpa. ¹² Māniñmō pō ti wææninque taadonque godinque mōnitō Pidipoto odōmānoidi nāni ponte quēwēñmō adoyōmō pōninque tæōnæ quēwentamōnīpa. Māatedōniabæ incæ pancabaa quēwēnāni nāni yæcado quēwēñmō Pidipoto impa. ¹³ Mōnitō māniñmō ponte quēwēninque guēmanguīōnæ iinque bayonte tōmēnāni nāni quēwēñmō yabædemō tao godinque, Önō wedeca Wængonguī ingante godongāmæ apænebainānīpa, ante önōwēnenque pōnēninque māniñmō gotamōnīpa. Māniñmō ponte ayōmōni onquiyænāni do godongāmæ ponte a ongōnāni adinque mōnitō tæ contadinque tōmēnāni inānite apænetamōnīpa. ¹⁴ Māniñmō nē ēñēnāni tōnō adodanque tōmēnā emōwo Didia iñmō Tiatida quēwēñōnā inte weocoo awēnēidi nāni opatawæ ēmoncoo godonte ænte quēwēñōnāīmpa. Tōmēnā Wængonguī ingante nē waa ate pōnēnā inonāīmpa. Iinque Pabodo

apæneçä äamonca ongonte ëñëñönante mönö Awënë tömënä mïmö wi ænete bai çæçä ate tömënä wede pönënantapa. ¹⁵ Ìninqe tömënä näni owocabo pönëninque godongämæ æpænë guidäni ate tömënä ïñömö mönitö ïmönite apænedantapa.

—Botö ïmote ante adinqe mïnitö, Mönö Awënë ingante Didia ædæmö çæte pönengä ingampa, ante pönëmïnitawoo. Mänömainö ante pönëmïni inte mïnitö botö oncönë ponte owoedäni, ämopa.

Ante ancaa apænedä ëñente wædinque mönitö Ao ante gote owotamönipa.

¹⁶ Mänïñedë wacä onquiyængä obe badä ïnogä inte wadäni nempo quëwëninque tömënäni beyænque në çæte quëwengä ïnogäimpa. Tömengä ïñömö në çæwënegä inte wadäni ïnänite, Ìncayæ ate æbänö baquïi, ante yewænte tedecä ïnogäimpa. Tedecä ëñëninque në ëñënäni wæætë tömënäni näni godonte æinta bacoo pædæ pönö pædæ pönö çädäni incæte tömengä awënëidi wæætë ö æ ö æ çädönänimpa. Ìninqe mänïñömö quëwëninque mönitö ayæ ate Wængonguï ingante näni apæneiñömö adodö gocæ çæyömönite mäningä onquiyængä mämö bee tengantapa. ¹⁷ Mänömai bee tëninque tömengä mönitö Pabodo tönö möni gocabo ïñömönite tee empo tee empo pöninqe yedæ angantapa.

—Ïnäni Wængonguï Æibæ pönï Quëwengä ingante në çädäni inte mïnitö ïmönite apænedinque, Æçänö ængä beyænque quëwenguïi, ante apænedänipa.

¹⁸ Äninqe tæönæ ïñonte tömengä tömënäni ïnänite tee empote godinque Yæ yæ änewengä

ēñente wædinque Pabodo, Ancaa ēñente awædö, ante dadi emænte wænæ ingante äninque,

—Bitö ïmite botö Itota Codito emöwo apænedinque, Tao gobäwe, ämopa.

Ante tæcæ apæneyongä wænæ incæ baquecä ingante emö cæte tao gocantapa.

¹⁹ Pabodo mänömaï angä ate tao go ate wædinque onquiyængä awënëidi guiquënë, Æ tömengä yewængä beyæ mönö æincädö incæ dæ gotimpa. Ñöwo æbänö cæte nanguï ænguïmöö. Ante piïnte wædinque tömënäni, Mönö tömëna ïnate odömäno awënëidi weca ænte gocæimpa, ante Pabodo tönö Tidato ïnate bæi ongonte wëä mäo tömënäni näni godonte æiñömö ænte godänitapa. ²⁰ Ayæ odömäno awënëna tömënäni quëwëñömö në apænte äna iñönote në piïnte cædäni mänina awënëna weca Pabododa ïnate ænte mämö gö cædinque,

—Ïina iñömö edæ oodeoda ïnäna inte mönitö quëwëñömö ponte wænæ wænæ apænedä ēñëninque tömänäni ænguï badinque Yæ yæ änänipa. ²¹ Mönö odömänocabo mönö wii cæquënëno ante odömönte apænedinque tömëna iñömö, Mäninonque cædäni, ante ancaa änewënapa.

²² Ante tæcæ apæneyönäni godongämæ ongönäni iñacabo cædinque Pabodo tönö Tidato ïnate piïnte cædänitapa. Ayæ odömäno awënëna iñömö, Tömëna weocoo gä tadongate tæi tæi päedäni. ²³ Äna ēñente tæi tæi pänäni wæyönate awënëna godömenque äna ēñente cædinque tömëna ïnate bæi ongonte mäo tee mönedinque tee möneincö në aacä ingante, Ïina ïnate bitö ædæmö

wææ ae, änatapa. ²⁴ İninque mänömaï änäni eñente wædinque nē wææ wänongä wæætē Pabodo tönö Tidato İnate guimongacönē manguicä guuidatapa. Ayæ godömenque tömēna önöwa awæmpaa goti guidöwate tæï tee mönecä ongöñöna wadæ faocantapa.

²⁵ Ayaönænēña bayö Pabodo tönö Tidato mänömaï goti guidöwate wægöningue Wængonguï ingante apænedinque ämotamini äncöñönote wadäni nē tee mönete ongönäni eñēē cönänitapa.

²⁶ İñontobæ goinque nanguï ocæ ocæ pöningue tee möneincö tæñöninca incæ wancæ wancæ cæyö odemö tömänemö wi æmænete gotapa. Ayæ tömänäni İnänite näni tæï pönï yaëmengö näni ñäni ñænimē incæ ñimæncæ ñimæncæ wææntapa.

²⁷ Tee möneincö nē aacä guiquenē İñontobæ ñäni ömæmonte ayongä, Odemö dobæ wi æmænete gotimpa, ante wædinque tömengä, Æ tee mönete ongöninäni dobæ tao wodii winönänipa, ante pönente wædinque, Botö awenēidi piinte pänäni wænguï wæ, ante pönëningue nämä wænonte wæncæte ante yaëmē o togænte ængä. ²⁸ Ate wædinque Pabodo İñontobæ ogæ tededinque,

—Nämä wænæ wænæ cædämaï. Ee ae. Tömämöni ayæ ongömöni apa quëwëë.

²⁹ Angä eñëningue nē wææ wänongä İñömö edæ, Tica wodönoï ænte pödäni, angä ænte pönäni æningue tömengä pogodo pöningue ancai guïñente wædinque do do wäate wædinque Pabodo tönö Tidato önöwa İnö wæængantapa. ³⁰ Ayæ ængæ gantidinke edæ tömēna İnate oncodo ænte mäocä tayönote,

—Mīnatö nē ämīna inte apænemīna ēñēmoeda.
Botö æbänö cæte quēwenguimoo, ante wæcä.

³¹ Ēñēninque tōmēna wæætē,

—Awēnē Itota ingante edæ wede pōnēmi
ate tōmengä ængä beyænque quēwencæbiimpa.
Mīni owocabo tōmāmīni adobai wede pōnente
quēwencæmīnimpa, ānatapa.

³² Äninque tōmēna nē wææ wānongä ingante
godōmenque Wængonguī Awēnē nänö apænegainö
ante apænedinque tōmengä oncönē näni owocabo
tōmānāni inānite apæneda ēñēnānitapa. ³³ Ayæ
woyowotæ incæ tōmēna inate æninque nē wææ
wānongä iñömö tōmēna inate tæi tæi pānāni nāna
æbāate wædiñömö ñä mēnongacantapa. Ayæ
tōmengä näni wencabo do æpænē guidānitapa.
³⁴ Ayæ tōmengä oncönē ænte mængä ææ guiiyōna
tōmēna inate cænguī godongä cænatapa. Ayæ
tōmengä näni wencabo nē Wængonguī ingante
pōnēnāni badināni inte watapæ todānitapa.

³⁵ Baänæ ate odömāno awēnēna guiquēnē
poditiyaidi inānite nē wææ wānongä weca da
godōninque, Pabodo tönö Tidato inate ñimpo cæbi
gocædaimpa, ämīni ēñengäeda, angä ēñēninque
godānitapa. ³⁶ Ponte odömāno awēnēna emōwo ante
apænedāni ēñēninque nē wææ wānongä wæætē
Pabodo ingante apænedinque,

—Poditiyaidi ñōwo ponte apænedinque, Pa-
bodo tönö Tidato inate ñimpo cæbi gocædaimpa,
ante odömāno awēnēna ānapa, ante apænedānipa.
Īninque mīnatö ñōwo taote godinque piyænē cæte
ee goeda.

³⁷ Angä eñëninque Pabodo wæætë poditiyaidi inänite apænedinque,

—Mönatö odömänomöna imöna incæte nē apænte äna weca apænedämaï iñömönote tömëna äna tömänäni ayönäni edæ mönatö imönote tæi tæi päninque tee mönedänitapa töö. Tee mönedäni wæyömöna ñöwo wæætë mönatö imönote awëmö wido cæcæte ante cædänipa töö. Mönatö iñæmpa edæ Baa ämönapa. Awënëna incæ iñömö pöninque mönatö imönote ænte mäoda gocæmönaimpa.

³⁸ Mänömainö ante apænecä eñente wædinque poditiyaidi tömënäni awënëna weca adodö godinque Pabodo nänö apænedö ante adodö ante apænedänitapa. Ayæ, Pabodo tönö Tidato odömänoda inapa, ante apænedäni eñëninque odömäno awënëna guiquënë guiñente wædatapa.

³⁹ Ayæ guiñente wædinque awënëna incæ Pabodo tönö Tidato weca ponte waadete apænedinque, Mönatö oda cædinö ante minatö odömänomina imina inte piinte änämaï ieda, ante äninque Pabodo tönö Tidato inate ænte mäoda taoda adinque tömëna inate, Ñöwo mönitö quëwëñömö emö cæte wadæ goeda, ämönapa.

⁴⁰ Äna eñente taodinque onquiyænä Didia oncönë go guiidinque Pabodo tönö Tidato iñömö, Nē pönënäni wampo pönëninque tæi ongoncædänimpa, ante cædinque ædæmö apænedinque wadæ gogadaimpa.

17

Tetadönica iñömö quëwënäni Yæ yæ änänipa

¹ Mänii godinque Pabodo tönö Tidato Ampipodi näni quëwëñömö wodo tebæ godaque

go Apodōnia nāni quēwēñōmō wodo tebæ godaque go Tetadōnica nāni quēwēñōmō pōnatapa. Māniñōmō oodeoidi Wængonguī apænecā nāni ēñente yewæmongainta ate odōmōincō nāni mænongaincō mæ ongō.

² Adinque Pabodo cōwē nānō cæi bai cædinque guēmanguïōnæ bayō guēmanguïōnæ bayō mēōnaa go adoōnæque iñonte tōmēnāni odōmōincōnē go guiddinque edæ Wængonguī angā ēñente nāni yewæmongaintaa ate adinque tōmēnāni inānite, iīmaī impa quēwēmīni, ante nō apænecantapa.

³ Tōmēnāni inānite edonque apænedinque Pabodo, Wængonguī beyæ nē apænegaināni iīmaī ante do yewæmongadānimpa, angantapa. Mōnō Codito iīncayæ ate pōninque cōwē caate wæquēnengā ingampa. Ayæ adocā wænte ate cōwē ñāni òmæmonte quēwenguēnengā ingampa, ante yewæmongadānimpa, ante Pabodo apænecantapa. Ayæ godōmenque apænedinque,

—Itota botō nē ānongā incæ adocā mōnō Codito inongā ingampa, ante apænecantapa.

⁴ Mānōmaī apænecā ēñēninque oodeoidi pancadāniya, Nō impa, ante pōnēninque Pabodo tōnō Tidato miñæ godānitapa. Ayæ guidiegoidi nanguī ināni Wængonguī ingante nē guīñēnāni inte adobaī pōnēninque tōmēna miñæ godānitapa. Ayæ awēnēidi bai ināni onquiyænāni incæ nanguī ināni adobaī pōnēninque tōmēna miñæ godānitapa.

⁵ Mānōmaī pōnēnānipa, ante wædinque oodeoidi guiquēnē pīinte wædinque iīmaī cædānitapa. Tōmēnāni nāni godonte æiñōmō gote ayōnāni nē wiwa cædāni ongōnāni adinque tōmēnāni inānite

änäni Ao ante godongämæ pöninge oodeoidi
 tönö iñacabo cædinque Yæ yæ ante pīinānitapa.
 Mänömaï yedæ änäni eñente wædinque mänīñömö
 quëwënäni tömänäni godongämæ piinte badinque
 Yæ yæ änānitapa. Oodeoidi iñömö, Mönö Yatönö
 oncönë guiddinque Pabodo tönö Tidato inate da
 tadöninge nē piinte cædāni inānite da godömö
 æncædānimpā, ante cædinque diqui diqui mincæte
 ante tee gāwade guiddānitapa. ⁶ Wäänë guiddinque
 tömēna inate adāmaï ināni inte oodeoidi wæætē
 oncö nē éacā Yatönö ingante yao ongöninge
 wadāni nē pönēnāni inānite yao ongonte wēä tadö
 mao tömēnāni näni quëwēñömö awēnēidi weca
 ænte godānitapa. Ayæ, ogæ tededinque,

—İina onguīñæna iñömö tömāmæ quëwënäni
 inānite wapiticæ nē apænedīna inte ñowo wæætē
 iñömö pōna tamēñedāni. ⁷ Ayæ Yatönö guiquēnē,
 Botö oncönë pōeda, ante manguicā guiddatapa.
 İināni tömänāni edæ odömāno tæiyæ awēnē Tetædo
 nānō äninö ante Baa äninque wacā Itota näni
 änogä ingantedö ante, Tömengä nē Awēnē Odeye
 ingampa, ante änewēnānipa cæminii.

⁸ Ante pīināni eñente wædinque godongämæ
 ongönāni tönö awēnēidi adobaï pīininque, Quinö
 cæquīi, ante wædinque Yæ yæ änānitapa. ⁹ İinque
 Yatönöidi inānite äninque awēnēidi, Minitö ñowo
 mänimpota pönömīni ænte mǎñömöni mīnitö wēnæ
 wēnæ cædāmaï imīni adinque mönitö iincayæ
 ate wæætē adodö pönömöni æmaimīnipa, ante
 tömēnāni godonte æinta änäni pædæ godönāni
 æninque ñimpo cædāni abæ tawænte gogadānimpā.

Bedeä iñömö quëwënäni eñente pönēnānipa

10 Ayæ tæcæ wēmō bayonte nē pōnēnāni wæætē Pabodo tōnō Tidato inate, Bedea iñōmō goeda, ante da godōnāni godatapa. Māniñōmō gote pōninque tōmēna oodeoidi odōmōincōnē go guiidatapa. ¹¹ Māniī Tetadōnica iñōmō quēwēnāni nē piinte cædāni iñōnānite bedeaidei guiquēnē piināmaī ināni inte mōnō Awēnē nānō apænedō ante do ēñēnānitapa. Ayæ ēñēninque, Wængonguī angā ēñente nāni yewæmongainō bai Pabodo nō apænecantawo, ante pōnente wædinque bedeaidei iñōmō, Wængonguī æbānō angā ēñente yewæmongadāni, ante ēñencæte ante iimō iñō iimō iñō māninta æninque cōwā adānitapa. ¹² Mānōmaī cædinque oodeoidi tæiyæñāni wede pōnēnāni badānitapa. Ayæ guidiegoidi awēnēidi bai ināni onquiyæñāni incæ nanguī ināni pōnēñōnāni guidiegoidi onguīñæñāni adobaī tæiyæñāni nē wede pōnēnāni badānitapa.

¹³ Incæte wadāni Tetadōnica iñōmō godinque oodeoidi inānite apænedinque, Pabodo ñōwo Bedea godinque māniñōmō quēwēnāni inānite apænecā ēñēnānipa, ante tededāni. Eñēninque oodeoidi wæætē Bedea iñōmō pōninque, Pabodo wiwa apænecā apa ēñencæ quēwēmīnii, āninque wapiticæ tededāni ēñēninque godongāmæ ongōnāni guiquēnē ænguī badānitapa. ¹⁴ Mānōmaī ænguī badāni adinque nē nāni pōnencabo iñōmō Pabodo ingante æpæ yæwedeca do ænte māodāni godinque tōmengā wipodē ñænæmpodē go guiidinque godōmenque wogaa goyongante Tidato tōnō Tīmoteo wæætē Bedea iñōmō ayæ ongōnatapa. ¹⁵ Pabodo tōnō godongāmæ godāni iñōmō Atēna ganca māodāni gocā ate tōmengā

wæætē, Mīnitō adodō Bedea iñōmō godinque Tidato tōnō Timoteo inate apænedinque tōmēna eyepæ inte ate botō weca quingæ ämīni pōnae, angā eñēninque tōmēnāni adodō Bedea iñōmō godinque Pabodo nānō äñinō bai iñāna inate apænedānitapa.

Atēna iñōmō Pabodo apæneçä eñēnānipa

¹⁶ Mänōmainō ante äningā inte Pabodo tōmēna nāna ponguīnō ante ee ongongantapa. Ee ongōninque ayongā māññōmō quēwēnāni, Wængonguīdi inānipa, ante badonte nāni cō cægainca bacoo mæ ongō ate wædinque Pabodo wæwēwocate quēwengantapa. ¹⁷ Mänōmaï beyæ oodeoidi odömōincōnē go guīdinque oodeoidi inānite apænedinque ayæ guidiegoidi incæ Wængonguī ingante nē guīñēnāni inānite apænedinque Pabodo, Mänōmaï impa. Apænebo eñēmaimīnipa, ante apæneçantapa. Ayæ tōmēnāni nāni godonte æiñōmō adobai iimō iñō iimō iñō godinque māññōmō ponte ongōnāni inānite adobai nō apæneçä eñēnānitapa. ¹⁸ Mänōmaï cæyongā wadāni Epicodeoidi, Mönō tote quēwengæimpa, ante nē änewēnāni nāni cabo tōnō wadāni Etoicoidi, Waa imō incæ caate wæmō incæ mönō piyænē cæte quēwengæimpa, ante nē quēwēnāni nāni cabo tōnō tōmānāni adoyōmō ponte bee tēninque Pabodo ingante wæætedō wæætē änānitapa.

Pabodo iñōmō Itota emōwo ante apæneçä beyæ ayæ Itota nānō ñāni ömæmongainō ante apæneçä beyæ Epicodeoidi nāni cabo tōnō Etoicoidi nāni cabo tōnō pancadāniya guiquēnē,

—İngä iñömö önonque ante tedewëngä inte æbämë ante tedewengä.

Ante wæyönäni adodäni incæ pancadäniya guiquënë,

—Tömengä wabänö, Wabæca wængonguïdi inänite pönencæminimpa, ante cæcä ïmaingampa, ante wädänitapa.

¹⁹ İninque Pabodo ingante bæi ongonte töö æmænte ænte godinque tömënäni Adeopagoidi näni änönäni näni godongämæ eñente pönencöñömö mäodäni gocantapa. Go guite ongöñongante,

—Mä bitö odömonte apænedö æbänö ii. Edæ apænebi eñëmönie. ²⁰ Edæ bitö odömonte apænedö ante tæcæ eñëmöni inte mönitö, Æbänö ante apænebii, ante eñencæte ante wæmönipa, änänitapa.

²¹ Edæ atënaidi tönö wadäni Atëna iñömö ñowo ponte quëwënäni tönö tömänäni wadö cädämaï inte önonque, Wadäni æbänö mä apænete pönënänii, ante wædinque mäninonque ante tedete quëwënönänimpa.

²² Pabodo iñömö Adeopagoidi godongämæ näni eñente pönenconcabo tæcæguedë ængæ gantidinque tömënäni inänite apænedinque,

“Atënaidi, eñëedäni. Wængonguïdi, mini änönäni inänite waa ate bai minitö nanguï pönï cæmini abopa. ²³ Botö minitö quëwëñömö tömäo cægonte ayömo, Wængonguïdi inänipa, ante mini waa adoncacoo nanguï ongö atabopa. Ayæ mini waa adonca adocaque iñömö mini pönö yewæmönimpaa iïmaï ante yewæmonte ongö atabopa. ‘Wacä wængonguï æcämë ingää, ante mönö eñënämaï nē inongä beyæ

mönö waa adonca impa, 'ante mänimpaa yewæmöi ongö atabopa. Mänimpaa yewæmöi ongö adimo inte botö mini, Æcämë ingää, ante eññënamai inte mini waa adongä ingante ante ñowo, Æcänö ingää, ante ñowo apænebo eññëdäni."

24 Ante apænedinque Pabodo godömenque, "Wængongui inguipoga në badongaingä inongä inte tömää iñömö ongoncoo në badongaingä inongä inte tömengä inguipoga tömämæ Awënë inongä ingampa. Tömengä adocä iñömö öönæde Awënë ingampa. İninqe Tæiyæ Awënë inongä inte tömengä waomö önompoca mænönincönë ædö cæte guite quëwenguingää. 25 Ayæ waomö iñömönte tömengä mönö quëwenguimämo pönongä æmompä. Ayæ mönö guëmanguimämo adocä pönongä guëmämompä. Ayæ tömengä adocä nänö pönönönque tömänö æninqe quëwëmompä. Mänömai në pönönongä inte tömengä mönö waocabo iñömönte, Pönömi æmoe, ante ædö cæte anguingää. İninqe tömengä beyæ ante mönö waomö önompoca ædö cæte cæquimöö."

26 Ante apænedinque Pabodo godömenque apænecantapa. "Wængongui waocä adocanque ingante badöninque, Tömengä nänö pæinäni nangui inäni yebæninque näni cabo näni cabo tömancabodäni bacædänimpa, angacäimpa. Ayæ edæ, Adocanque pæinäni inönäni inte mänincabodäni iñömö nänëneto nänënë godinque adocaboque wabæca wacabo wabæca godinque inguipoga tömäo go go cædinque wayömö wayömö quëwencædänimpa, ante cægacäimpa. Mänömainö ante badöninque tömengä tömancabodäni inänite

ante pōnēnīque, Æyōmōnō quēwenguīnānīi,
 ante cædinque, Īināni ĩimæca mānimpoga
 quēwencædānīmpa, ānīnque, Wadāni wabæca
 mānimpoga quēwencædānīmpa, ante doyedē
 angacāīmpa. ²⁷ Edæ tōmāmæ quēwēnāni botō
 ĩmote ante dīqui dīqui mīncædānīmpa. Ayæ botō
 ĩmote ante pædæ æmpo cædinque wabānō bee
 tengūīnāni, ante cædinque Wængonguī mānōmaī
 badōnīnque angacāīmpa. Incæte Wængonguī
 mōnō tōmāmō weca ongōnīnque wīi gobæque
 quēwengampa. ²⁸ Wængonguī tōmāo quēwengā
 ĩñongante mōnō waomō ĩnōmō ĩnte wayōmō
 wayōmō gomō incæte tōmengā nempo edæ cōwē
 quēwēmōmpa. Mīni cabo incæ āmotamīni ante
 baī nē tededāni pancadāniya, ‘Wængonguī pæīmō
 adomō ĩmōmpa,’ ante do nāni ānō baī edæ mānōmaī
 ĩmpa,” ante Pabodo apæñecantapa.

²⁹ Ayæ, “Mānōmaī beyæ mōnō Wængonguī
 pæīmō ĩnōmō ĩnte edæ ĩmaīnō ante wīi
 pōnenguēnēmō ĩmōmpa. Mōnō, Waocā nanguī
 pōnēnīnque dīcaa yewæmōnīnque waa pōnī nānō
 badōīnca baī Wængonguī adobaī ĩngampa, ante
 ædō cæte ānewenguīi. Oodo tōnō padata waocā
 nānō badōī baī Wængonguī ĩngampa, ante mōnō
 wīi mānōmaīnō ante pōnenguēnēmō ĩmōmpa.
³⁰ Incæte wēēnēñedē mānīnō nāni ēñēnāmaī
 ĩngainō ante adīnque Wængonguī pōnō waadete
 ata cæpogacāīmpa. Ñōwo guīquēnē tōmāmæ
 quēwēnāni ĩnānite, Mīnitō ēñēnāmaī cædō ante,
 Ancaa wæwente awædō, ante ñīmpo cæedāni.
³¹ Ante Wængonguī nē apænte anguingā ĩnongā
 ĩnte ĩmaī angampa. Īiōnæ ĩnque bayonte botō

inguipoga tömämæ quëwënäni inänite apænte ancæboimpa, ante mänionæ æönædö i, ante do angacäimpa. Ayæ, Waocä adocanque tönö botö godongämæ cæyömo tömengä nöingä ante apænte ancæcäimpa, ante Wængonguï mäningä onguïñængä ingante do apænte ængacäimpa. Ayæ tömänäni, Wængonguï nänö angainö bai cöwë bacäimpa, ante pönencædänimpa, ante cædinque Wængonguï mäningä Onguïñængä dobæ wængä ate, Näni ömæmöe, angä ininque mäningä iñömö edæ do ñäni ömæmonte quëwengampa.”

³² Ante Pabodo mäninö Itota nänö ñäni ömæmongainö ante apæ necä ëñëninque pancadäniya, Babæ ancædö, ante badete todänitapa. Wadäni guiquënë,

—Iincayæ ate mäninö ante adodö apænebi ëñëmönie, änänitapa.

³³ Mänömainö ante cædäni adinque Pabodo iñömö tömënäni inänite ëmö cæte godinque tao gogacäimpa. ³⁴ Incæte pancadäniya tömengä miñæ godinque në pönënäni badänitapa. Adeopagoidi näni ëñente pönë concabo iñönänite adocanque Diönitio adobai në pönengä bacantapa. Ayæ onquiyængä tömengä ëmöwo Daämadi tönö wadäni adobai në pönënäni bagadänimpa.

18

Coodinto iñömö pöninge Pabodo apænecampa

¹ Atëna iñömö ongonte apænecä ëñëninque mänömai cædäni ate Pabodo wadæ godinque Coodinto näni quëwëñömö pongantapa. ² Doyedë iñömö odömänoidi tæiyæ awënë Codaodio

oodeoidi inänite piinte äninque, Mönitö quëwëñömö Odömä iñömö ñowo quëwënämaï inte tömämini wadæ goedäni, angä ëñente wædinque tömänäni näwæ wadæ godönänimpa. Adocanque tömengä ëmöwo Aquidæ Pontobæ ëñagaingä inte Itadiabæ gote mäniñedë quëwëngäimpa. Tömengä adocä oodeocä inongä inte awënë nänö änö ante ëñente wadæ godinque tömengä nänöogængä Pidotida tönö ñowo Coodinto iñömö wadæ ponte quëwënonäimpa. Ìninque Pabodo ñowo Aquidæ ingante tæcæ adinque tömäna weca ëñacæ pongantapa. ³ Tömäna weca ponte ayongä tömäna tömengä nänö tadömönö bai adobai æmontai cadopa tadömonte godonte ænte quëwëna adinque Pabodo tömäna weca ee owodinque tömäna tönö godongämæ tadömönänitapa. ⁴ Mänömaï cæte quëwëninque Pabodo guëmanguïönæ iñö guëmanguïönæ iñö oodeoidi odömöincönë go guidinque, Oodeoidi incæ oodeoidi inämaï inäni incæ ëñente pönencädänimpa, ante cædinque, Ìimaï impa ante apænebo ëñëmaïminipa, ante nanguï apænecantapa.

⁵ Ayæ Tidato tönö Tïmoteo Mäatedöniabæ quëwente wadæ pöninque Coodinto iñömö näna wææ pöñedë Pabodo mäniñedë æmontaicö nänö badöninö ñimpo cædinque wæætë, Wængonguï nänö apænedö ante ëñencädänimpa, ante nanguï cæinente wædinque nanguï apænedinque mäninque cæte quëwëngantapa. Mänömaï cædinque tömengä, Codito mönö në ängängä incæ Itota adocä inongä ingampa, ante botö në agaïmo inte apænebo ëñëmaïminipa, ante oodeoidi inänite

apænecantapa. ⁶ Mänömaï apæneyongante oodeoidi wæætedö wææte godö wënæ wënæ ante pïinäni wædinque Pabodo wææte, Wïi ëñëinë wædö, ante bai cædinque nämä weocoo wancæ wancæ cæcantapa. Ayæ tømënäni inänite,

—Wængonguï weca mïni goquënëno ante apænebo ëñëninque mïnitö pönö wææ äninque tømëmïni wænguinque wentamö mongæminipa. Botö wææte mïnitö iminite edonque pönï apænedïmo inte mïni cædö wentamö mongænämaï imopa töö. Ìninque botö Wængonguï taadö mïnitö iminite idæwaa odömöninque edæ oodeoidi inämaï inäni weca ñowo wadæ gobo tamëñedäni.

⁷ Äninque Pabodo wadæ tao godinque oodeoidi odömöincö gäänë wacä oncönë go guï go guï cædinque cöwë apænecantapa. Mänincö në éacä Titio Yoto näni änongä inñömö Wængonguï ingante në waa ate pönengä inongäimpa. ⁸ Oodeoidi odömöincönë në aacä Codipo guiquënë mönö Awënë ingante në pönengä bayongä tømengä oncönë në owodäni tømänäni pönënanitapa. Ayæ coodintoidi nanguï inäni pö ëñëë pö ëñëë cædinque adobai wede pönëninque æpænë guïgadänimpa. ⁹ Mäniñedë woyowotæ inñö Pabodo wïimonte bai ayongante mönö Awënë tømengä ingante apænecantapa. “Bitö guïñenedämaï inte apænebi ëñencædänimpa. Pæ wëenedämaï incæbiimpa. ¹⁰ Coodinto inñömö botö quïnäni nanguï inäni inänipa, ante cædinque botö inñömö edæ bitö tönö godongämæ cöwë cæcæboimpa. Ìninque wadäni bitö imite mämö pïininque wënæ

wënæ cædämaï incædänimpa.” 11 Ante mönō Awënë tömengä ingante apænecä eñëninque Pabodo adoque wadepo go tæcæ iñonte Coodinto iñömō ongōninque Wængonguï nänō apænedō ante tömënäni inänite odōmonte apænecä eñënonänimpa.

12 Mänïñedē odömänoidi änäni ate Acayabæ awënë Gadiōno inongäimpa. Tömengä awënë nänō inöñedē oodeoidi godongämæ pönëninque Ao äninque Pabodo ingante quingæ mämō bæi ongonte æninque awënë Gadiōno nänō cōwē apænte änöñömō ænte mäodäni gocantapa.

13 Awënë weca pöninque Pabodo ingantedō ante pïinte äninque,

—İngä iñömō, Mönō wadō bai cædinque Wængonguï ingante waa ate apænecäimpa, ante odömōninque mōnitō awënëidi näni wææ änönō ante wido cæcampa. Mänōmaï wapiticæ cædinque ancaa änewengä eñëninque tömänäni adobai wapiticæ cædänipa cæbii.

14 Änäni ate Pabodo tæcæ apænecæ cæyongante Gadiōno oodeoidi inänite iïmaï ante wææ apænecantapa.

—Oodeoidi eñëedäni. Mïnitō botō weca ponte apænedinque, Odömāno awënë nänō wææ änō bai iingä eñënämaï cæcampa, ämïni bai, Waocä ingante ædæmō wiwa cæcampa, ante ämïni bai botō mïni änō do eñëninque apænte ancædōmoimpa.

15 Mïnitō iñæmpa, Tömengä tededonque ante oda cæcampa, ämïnipa. Mïnitō emōwo ante oda cæcampa, ämïni. Mïnitō wææ angainō ante oda cæcampa, ante pïimïnipa. Mänïnonque ante oda cæcampa, ante ancaa tedewëmïni wædinque botō wæætē tömengä

ingante apænte änāmaï incæboimpa. Tömëmînique tōmengä ingante apænte äedäni.

¹⁶ Ante pîinte äinique awënë tōmënäni inänite, Botō apænte äñömō ongönāmaï gobæwedäni.

¹⁷ Ante wido cæcä tao godinque tōmänäni oodeoidi odömöincönë nē aacä Totënë ingante wæætë bæi ongonte tæi tæi pänäni incæte nē apænte anguënengä incæ Gadiōno iñömō önonque adāmaï inte bai ee acä pangadänimpa.

Pabodo Antioquiya ponte gocampa

¹⁸ İninque tæönæ quëwente ate Pabodo Cood-into iñömō nāni pönencabo inänite, Gobopa, äinique wadæ godinque Tidiabæ gocæte ante Tencodea ganca pongantapa. Tōmengä do apænedinque, Botō mänimpoga ocaguï tocadāmaï inte Wængonguï beyænque cædinque botō tōmëmo äninō ante cōwë cæcæboimpa, ante doyedë änongäimpa. Nöwo iñömō tōmengä nänō äninō bai iinique cædingä inte Tencodea iñömō pöninque ocaguï ëö toacantapa. Ayæ ëö tocacä ate tōmengä Piditida tönö Aquidæ nāna gæncaya tönö godongämæ ñænæ wipodë go guidinque tōmënäni Tidiabæ gocæte ante wogaa godänitapa. ¹⁹ Mänömaï godinque Epeto iñömō go ti wæænänitapa. Tömëna nāna gæncaya mänïñömō ti wææninique tæ contayöna Pabodo iñömō oodeoidi nāni odömöincönë go guidinque oodeoidi inänite, İmaï impa apænebo ëñencæmînimpa, ante apænecä. ²⁰ Eñëninque tōmënäni, Bitō mönitō weca wantæpiyæ quëwenguïmi, äñönäni tōmengä Baa äinique, ²¹ wæætë, Gobopa, angantapa. Ayæ, “Nöwo Eedotadëe iñömō ææmæ bequinque goquënëmo imo incæte Wængonguï Ao angä ate

botō mīnitō weca ayæ ate wæætē ocæ ēmænte poncæboimpa. Nōwo gobo tamēñedāni.”

Äninqe Epeto iñömō ñænæ wipodē go guī tæ contadinque Pabodo wogaa gocantapa. ²² Godinque Tetadea pō ti wææninque Eedotadēē iñömō Itota Codito ingante godongāmæ nāni pōnencabo weca ēñacæte ante æicantapa. Ayæ ate Antioquiya wæicantapa. ²³ Ayæ ate māniñömō tæönæ quēwēninque wadæ godinque Gadatiabæ adodō godinque Pidiquiabæ tōmāo wayōmō wayōmō cægonte godinque Itota miñæ nē tee empote quēwēnāni tōmānāni inānite māo apænedinque, Mōnō ñimpo cædāmaī inte tæi piñænte cæcæimpa, ante apænecā ēñēninque tōmēnāni tæi piñænte entawēninque quēwengadānimpa.

Epeto iñömō Apodo apænecā ēñēnānipa

²⁴ Māniñedē wacā oodeo tōmengā ēmōwo Apodo iñömō Equitobæ Adecantodia nāni quēwēñömō ēñate pægaingā inte ñōwo Epeto nāni quēwēñömō pongantapa. Tōmengā iñömō nanguī adinque nē ēñēnongā inte Wængonguī angā ēñente nāni yewæmongainō ante do ēñēninque waa pōni apænecā inongäimpa. ²⁵ Mōnō Awēnē taadō ante apæneyōnāni do ēñēningā inte māniñō ante ædæmō ewocadinque tōmengā, Eñencædānimpa, ante nanguī apænecantapa. Ayæ Itota nānō cægainō ante nō ante odōmonte apænecā incæte Apodo iñömō Wäō æpænē nānō guidongaiñonque ante māningancaque ēñēningā inte māningancaque ante tōingā odōmongā ēñēnōnānimpa. ²⁶ Tōmengā ñōwo oodeidi odōmōincōnē go guī go guī

cædinque guiñenedämaï inte apæ necantapa. Pidotida tönö Aquidæ näna gæncaya guiquënë tömengä mänömaï apæ necä tæcæ ëñëninque edæ Apodo ingante, Mönatö weca pöe, äna pöñongante, Wængonguï taadö iïmaï inompa, ante töngä apæneda tæcæ mä ëñengantapa.

²⁷ Mänömaï cæda ate Apodo wæætë Acayabæ gocæte ante cæyongante tömënäni näni pönencabo tömengä ingante, Waa goe, änänitapa. Ayæ, Acayabæ iñömö Itota ingante nê tee empote quëwënäni acædänimpa, ante iïmaï ante cadota ante yewæmönänitapa. Minitö, Apodo pongä adinque tömengä ingante waa cæedäni, ante yewæmöninque tömengä ingante pædæ pönönäni ænte godinque mäo Acayabæ quëwënäni inänite pædæ godongä adänitapa. Tömënäni Wængonguï waadete pönö cæcä ate nê pönënäni iñönänite Apodo nê waa pönï apænedongä inte mäniñömö ponte apænedinque tömënäni tönö godongämæ cægacäimpa. ²⁸ Edæ tömänäni ayönäni Apodo oodeoidi inänite nanguï wæætedö wæætë apænedinque gomonga apæ necä wædänitapa. Tömengä, Mönö Codito æbänö cæquiringä, ante Wængonguï angä ëñente näni yewæmongainta adinque mönö ëñengäimpa, angantapa. Ayæ, Itota mäninö näni yewæmongainö bai nê cædongä inte näwangä mönö Codito inongä ingampa, ante nö apæ necä ëñëninque tömënäni ædö cæte wadö ante apænequänäni.

19

Epeto iñömö Pabodo ponte apæ necampa

1 Apodo ayæ Coodinto iñömö ee ongoñongä Pabodo nänö cægönimæ tæcæguedë änanquidi owëñaque pö Epeto iñömö wæængantapa. Ponte ayongä Itota ingante në tee empote quëwënäni pancadäniya a ongönäni. 2 Adinque tömengä tömënäni inänite,

—Minitö pönente bayömini Wængongui tömengä Tæiyæ Waëmö Önöwoca ingante da pönongä æmïnitawo.

Äñongä tömënäni wæætë,

—Iñæmpa mäningä Tæiyæ Waëmö Önöwoca ingantedö ante apænedänipa ëñenguimöni.

3 Ante apænedäni ëñëninque Pabodo wæætë,

—Iñinque æcänö ëmöwo ante æpænë guimïnitawo.

Äñongante,

—Wäö wodi nänö æpænë guidongainö ante guitamönipa.

4 Mänömainö ante apænedäni ëñëninque Pabodo wæætë,

—Wäö wodi nänö guidongainö ante guiigaimini inte mïnitö, Idæwaa wënæ wënæ cæte awædö, ante Wængongui Awënë gämænö ocæ ëmænte pongaimini iminipa. Incæte Wäö wodi, Iñcayæ ate në Ponguingä ingante pönencæminimpa, äninque tömënäni inänite æpænë guidongacäimpa. Mäningä iñömö Wäö nänö, Në Ponguingä, änogä iñömö Itota inongä ingampa.

5 Ante apæneçä ëñente wæyönäni Pabodo wæætë mönö Awënë Itota ëmöwo apænedinque æpænë guidongä guidänitapa. 6 Ayæ tömengä gampocä ongoñönäni Wængongui Tæiyæ Waëmö

Önōwoca wææ tōmēnāni baonga guicantapa. Guicā ate tōmēnāni wadāni nāni tede bai mā tededinque Wængongui beyæ apænedānitapa. ⁷ Mānīnāni onguiñænāni æpænē nē guidēnāni iñōmō önompo tipæmpoga go mengāa inōnānimpa.

⁸ Pabodo apāicā mengāa go adocanque pāmonque adoyōmō quēwēninque oodeoidi odōmōincōnē go guī go guī cædinque guiñēnedāmaī apænedinque, Wængongui Awēnē Odeye do pongāimpa, ante apænebo ēñēedani, ante nōingā ante apænecā ēñēnānitapa. ⁹ Apænecā ēñēñōnāni pancadāniya guiquēnē, Wīi pōnēinente awædō, ante Baa āninque Wængongui Awēnē taadō ante wīwa tedewēnānitapa. Mānōmaī tedewēnāni ēñente wædinque Pabodo iñōmō emō cæte godinque Itota ingante nē tee empote quēwēnāni inānite ænte wadæ gocantapa. Ayæ iimō iñō iimō iñō Tidānō nānō apæneincōnē go guī go guī cæte apænedinque Pabodo māniñōmō pō guīdāni tōnō guēadō guēa apænedānitapa. ¹⁰ Ayæ mēnepoga wadepo ganca Pabodo mānōmaī cæyongā oodeoidi incæ guidiegoidi incæ Atiabæ quēwēnāni tōmānāni mōnō Awēnē nānō apænedō ante ēñēnānitapa.

¹¹ Ayæ Pabodo tōnō godongāmæ cædinque Wængongui tæi piñænongā inte nanguī cæcantapa.

¹² Īninque tōmēnāni Pabodo weocoo wadæ cæcadoquincoo incæ padēincoo incæ æninque wēnæ wēnæ ināni inānite ænte māmō wo caayōnāni waa badānitapa. Ayæ mānōmaī cæyōnāni wēnæidi nē wīwa ewocadāni tōmēnāni nāni nē ewēnēnīnāni tao godānitapa.

¹³ Māniñedē oodeoidi Itota ingante pōnēnāmaī

ināni incæ pancadāniya wayōmō wayōmō godinque wēnæidi nē wīwa ēwocadāni inānite nē wido cædāni inōnānimpa. Tōmēnāni nāmā mā pōnēwēninque, Nōwo Awēnē Itota ēmōwo apænedinque mōnō wēnæ ingante wido cæcæimpa, ante cædinque wēnæidi inānite iīmaī ānōnānimpa. Pabodo nānō nē apænedongā Itota ēmōwo apænedinque botō, Wēnæbi tao gobāwe āmopa, ānewēnōnānimpa.

14 Māniñedē oodeoidi beyæ, Wængonguī quī, ante nē godongā ñænængā adocanque Etequeba iñongā tōmengā wēnāni tiæte ganca inānitapa. Iīnāni iñōmō Itota ingante pōnēnāmaī ināni incæte adobaī cæcæ cædānitapa. 15 Tæcæ cæcæ cæyōnānite wēnæ nē wīwa ēwocadongā incæ tōmēnāni inānite nāēmæ tededinque, “Itota ingante do abopa. Ayæ Pabodo æcānō ingāā, ante do ēñēmopa. Wæætē mīnitō guiquēnē æmīnidō imīni.”

16 Añongā wēnæ wīwa inongā ingante nē ēwēnengā inte wiyaēmæ tōmēnāni inānite to māo yao ongōninque bæ tacantapa. Mānōmaī cædinque tōmēnāni weocoo gā tadongadinque tæi tæi pangā ate tōmēnāni weocoo ōmaadāni inte wepæ taate wædinque oncodo tao wodii wīnōnānitapa.

17 Mānōmaī batimpa, ante tedeyōnāni Epeto iñōmō quēwēnāni oodeoidi incæ guidiegoidi incæ tōmānāni ēñēninque ancaī guīñente wædānitapa. Iīninque mōnō Awēnē Itota ēmōwo wīi ōnonque ante tededāni inte tōmengā ēmōwo æwocæte baī cædinque, Tæi piñængā inte ēmongampa, ante wædānitapa.

18 Ayæ nanguī ināni ñōwo wede pōnente

badinque adoyömō pōninque tōmänāni ēñēñōnāni tōmēnāni nāni wēnæ wēnæ cædinō ante tōmänō ante edonque apænedinque, Idæwaa wēnæ wēnæ cæte awædō, ante wido cædānitapa. ¹⁹ Ayæ idō inte nē yewænināni incæ pancadāniya adobaī pōnente badinque tōmēnāni nāni, Æbānō cæte yewænguī, ante yewæmōninta incæ adoyömō ænte pōninque tōmänāni āñōnāni nē tānānitapa. Mānintacoo æpodō itædē cædinque padata nāni æinta beyæ godonte ænānii, ante cōwā ayōnāni tincoenta mīido ganca mānimpota nāni godonte æninta incæ nē tānāni agadānimpa. ²⁰ Mānōmaī nē pōnēnāni badinque waa cædāni īninque mōnō Awēnē nānō ānō ante godōmenque wayōmō wayōmō māo gode ānāni ēñēninque tōmengā ingante nāni pōnencabo incæ yebæninque tæī pīñænāni bagadānimpa.

²¹ Mānōmaī cædāni ate Pabodo önōwēnenque pōnēninque, Māatedōniabæ ēñacæ godinque botō Acayabæ ēñacæ godinque Eedotadēē gocæboimpa, ante pōnēninque, ayæ, Māniñōmō gote ate Odōmā nāni quēwēñōmō cōwē goquēnēmo īmopa, angantapa. ²² Āninque tōmengā beyæ nē cædāni iñōnānite mēnaa īnate Timoteo tōnō Edaato īnate apænedinque, Māatedōniabæ gote ongōñōmīna botō Atiabæ wantæ quēwente pōmoeda, ante da godongā godatapa.

Epetoidi nanguī Yæ yæ ānānīpa

²³ Māniñedē Epeto iñōmō quēwēnāni iñōmō, Itota Taadō mōnō wido cæcæimpa, ante nanguī Yæ yæ ānānitapa. ²⁴ Tōmēnāni, Mōnitō wængonguīnā Diānā īnampa, ante onquiyænā ēmōnō baī badōninque mānīnca weca ædæ wæænte nē apænedāni

inōnānīpa. Tōmēnāni quēwēñōmō adocanque Deēmetedio nāni ānongā iñōmō padata aca podonte nē badongā inongāīpa. Tōmengā iñōmō padatagæ ænīnque aca podonte badōnīnque, Mīni wængonguīnā Diānā inante mīni tæiyæ waēmō apæneincō bai īpa, ante guīyanconque badonte quēwēnongāīpa. Mānōmaī badōñongā tōmengā tōnō godongāmæ cædāni wæætē wadāni inānite godonte ænīnque mānīncoo beyæ tōmēnāni godonte æinta nanguī ænīnque quēwēnōnānīpa.
²⁵ Inīnque tōmengā tōnō nē cædāni inānite ayæ wadāni adobāi cædāni inānite añete pōnāni ate Deēmetedio iñōmō tōmēnāni inānite apænecantapa.

“Iñānāni, do ēñēmīnīpa. Mōnō badonte godōnīnque wadāni nāni pōnōnīnta nanguī æmōmpa. ²⁶ Ayæ nanguī ināni Epeto inōmō quēwēnāni incæ Atiabæ wodo tōmāmæ quēwēnāni incæ iingā Pabodo guīquēnē wapiticæ apænecā ēñēnīnque edæ oda cædinque tōmengā mīñæ godānīpa, ante do ēñēmīnīpa. Tōmengā iñōmō, Ōnompoca badōnīnca wīi wængonguīdī inānīpa, ante tedecā apa quēwēmīnīi. ²⁷ Mānōmaī tedecā beyæ mōnō badōnō ante wadāni nanguī ināni pīinte anguīnāni awædō. Ayæ Diānā ñænænā wængonguīnā iñōnante tōmengā ingante mōnō apæneincō incæ, Ōnonconque īpa, anguīnāni awædō. Ayæ godōmenque, Mōnō wængonguīnā Diānā waa pōnī wængonguīnā ināmpa, ante Atiabæ tōmāo quēwēnāni tōnō inguīpoga tōmāo quēwēnāni nāni waa adōnā iñōnante wabānō wapiticæ tededinque godō pīinguīnāni badānīpa, ante awædō.”

28 Ante Deëmetedio mänömainö ante apænecä eñëninque tömënäni ænguï badinque ogæ tededinque, “Epetoidi wængonguinä Diänä ñænänä inampa,” ante wæætë wæætë ancaa änänitapa.

29 Mänömaï padata në badönäni Yæ yæ änäni eñente wædinque mäniñömö quëwënäni tömänäni, Quiëmë bai cädänipa, ante acæte ante wadö pö wadö pö pogodo pönänitapa. Ponte ayönäni Mäatedöniabæ quëwente Pabodo tönö godongämæ në pönina Gayo tönö Aditadoco a ongöna adinque tömënäni tömëna inate bæi ongonte quingæ mäo tömënäni näni aincönë ñænæncönë go guidänitapa. 30 Pabodo guiquënë mänömaï cädäni ate wædinque, Godongämæ ongönäni weca go guidinqe apænecæboimpa, ante cæyongante Itota ingante në tee empote quëwënäni wæætë, Wænompa, ante, Go guidämaï incæbiimpa, ante wææ cädänitapa. 31 Ayæ mänimæ awënëidi pancadäniya Pabodo æmigoidi inäni inte adobai mämö tömengä ingante gode äninque, Bitö ædö cæte mäniñömö go guiquimii, ante wææ änänitapa.

32 Ìñonte godongämæ ongönäni guiquënë, Quinante pömoï, ante wodo tömänäni eñënamäi inänitapa. Pancadäniya, Ìimaï cæcæimpa, äñönänite wädäni guiquënë, Wadö bai cæcæimpa, ante wæætedö wæætë ante ogæ tededinque nanguï pöni Yæ yæ änänitapa. 33 Yæ yæ äñönäni oodeoidi guiquënë Adecantodo ingante yæcado gö cädäni ongongä adinque godongämæ ongönäni pancadäniya tömengä ingante, Ìimaï cæcæimpa, änänitapa. Tömengä guiquënë tömënäni inänite

wææ apænecaete ante, Apocænë iedäni, ante bai cædinque pipo pipo cæcantapa. ³⁴ Oodeo inongä inte mänömaï cæcampa, ante wædinque tömengä ingante eñenämaï inte tömänäni adoyömö ogæ tedinque, “Epetoidi wængonguinä Diänä ñænänä inampa,” ante mäa ooda ganca adodö adodö adodö ante nanguï änänitapa.

³⁵ Ayæ ate tömënäni awënë Tequedetadio incæ ancaä tömënäni inänite angä eñente apocænë cæyönäni tömengä, “Epetoidi eñemini. Tömäo quëwënäni mänömainö ante do eñenänipa. Mönö Epeto iñömö quëwencabo mönö wængonguinä Diänä apæneincö nē aamö imompa. Ayæ tömengä awinca bai yewæmoinca öönädē mönö wæængainca adobai nē wææ cæmō imompa, ante adinque tömämæ quëwënäni do eñenänipa cæminii. ³⁶ Mäninö ante näwangä pönï impa, ante adinque, Babæ impa, ante ædö cæte anguinänii. Ìniquë minitö eñenämaï mini Yæ yæ anewenö ñimpo cædinque piyænë cæquënemini iminipa. ³⁷ Ìina mini bæi ongonte ænte pönönina iñömö mönö wængonguinä Diänä apæneincönë guidämaï ina inte wënæ wënæ cædämaï inapa. Ayæ mönö wængonguinä Diänä inantedö ante wïi wënæ wënæ ante piina apa quëwënänii.”

³⁸ “Deëmetedio padatagæ näni badoncabo incæ wacä ingante, Wiwa cæbitapa, piinte wædänitawo. Edæ nē apænte näni äincö cöwë wi ænete ongompa. Mänincönë nē apænte änäni cöwë ongönänipa. Ìniquë Deëmetedioidi nē näni piinongä ingante mäniñömö ænte gote änäni eñenique nē apænte änäni wæætë tömengä ingante do

apænte anguënänäni inänipa. ³⁹ Ayæ apænte änäni, Iïönæ tōmāmīni godongāmæ pōedāni, nāni änïönæ bayonte mīnitō godōmenque pīinte äinēmīni inte mānïönæ ponte ämīni eñente apænte änäni ate mīnitō piyænē cæquënēmīni imīnipa. ⁴⁰ Edæ ñōwoönæ mīni Yæ yæ änewëninō ante awënēidi pōninque, Quinante mänōmaï cæmīnii, ante äñönāni wæætē, Quiēmē beyæ cætimpā, ante mōnō angæimpā. Tōmēnāni wæætē mōnō imonte äninque, Mīnitō awënē ingante wido cæcæte ante cæmīnipa, ante pīināni wæcæ wæ.” ⁴¹ Äninque godongāmæ ponte ongönāni inänite tōmengä angä gogadänimpā.

20

Mäatedöniabæ godinque Pabodo Guidetiabæ go-campa

¹ Mänii Yæ yæ ante näni änewënō iinque cädāni ate Itota ingante nē tee empote quëwënāni inänite wæætē äñete pōñönānite Pabodo, Mīnitō gancæ pōnente godōmenque cæcæmīnimpā, ante godō ædæmō apænecantapā. Ayæ, Ñōwo gobopā, ante Mäatedöniabæ gocantapā. ² Godinque tōmengä mänïñömō quëwënāni inänite, Mīnitō gancæ pōnente godōmenque cæcæmīnimpā, ante godō ædæmō apænecä eñēnānitapā. Mänōmaï nanguï apænedinque tōmengä mänimæ tōmāo cægōninque wayōmō māo wayōmō māo apænecä eñēnāni ate Guidetiabæ gote pongantapā. ³ Mänïñömō pōninque mēa go adoque apäicä quëwengantapā.

Ayæ, Tidiabæ goquïmo, ante tæcæ ñænæ wipodē guicæ cæyongante wadāni, Oodeoidi

bitō ïmite wænoncæte ante cædānīpa ataque. Ante wææ änāni wædinque tōmengä, Botō wæætē adodō godinque Mäatedōniabæ wodo tebæ gocæboimpa, äninque taadonque gocantapa. ⁴ Goyongä tōmengä tönō godongämæ godāni ïñömō, adocanque Bedea quëwëningä inte Pidido wengä Topatede, ayæ wææ Tetadōnica quëwëñina Aditadoco tönō Tegonto mënaa, ayæ wææ Dedebe quëwëningä Gayo tönō Timoteo mënaa, ayæ wææ Atiabæ quëwëñina Tiquico tönō Todopīmo mënaa, mänimpodāni ïnānitapa. ⁵ Tömënāni tāno godinque Todoa nāni quëwëñömō pōninque mōnitō wipodē ponguimōni ante ee ongönānitapa. ⁶ Mōnitō guiquënë oodeoidi päö yedæ æmpoqui ömæmō ï nāni cænguïönæ ïinque baganca Pidipo ïñömō quëwëninque wipodē ñænæmpodē go guiidinque wogaa godinque önompo æmæmpoque ëönæ gote ate tōmënāni weca Todoa pōninque önompo æmæmpoque go mëönaa quëwentamōnipa.

Todoa ïñömō Pabodo ponte apænecampa

⁷ Tömënāni nāni guëmanguïönæ go ate mōnitō, Ñöwo gäwadecæ bayö Wængonguï itæde impa, ante päö godongämæ cæncæte ante æmongapaa æi wænömënæcapaa æi guiidinque tæ contatamōnipa. Pabodo ïñömō baänæ ate gocæ cædingä inte æi guii tæ contadinque wantæpiyæ ayaönænëña pōñi ayæ apænecä ëñentamōnipa. ⁸ Wænömënæcapaa mōni godongämæ ëñengoncönë gongapæncade bacoö ti wodōnote më ongönimpa. ⁹ Adocanque edëningä tōmengä ëmōwo Eotico ayamōnecäa tæ contate ongongantapa. ïinque Pabodo wantæpiyæ apæneyongä edëningä ïñömō

möwocodë nanguï möinente ayæ wangæ monte wænömënæcapaa ongöningue yæipodë tæ go wæængantapa. Go wæænte do wængä adinque tömengä ingante yao ongonte mänänitapa. ¹⁰ Näñe wænte öñöñongä Pabodo yæipodë wææningue, Quëwencæcäimpa, ante cædinque wïni ænte pæ mangantapa. Ayæ në pönëmöni möni caipæ imönite apænedinque,

—Mïi quëwengä ingampa. Guiñente wædämaï iedäni, angantapa.

¹¹ Äningue Pabodo wæætë adodö æmongapaa æidinque päö ænte pä ænte mönitö tönö godongämæ cæningue wantæpiyæ godömenque apæncöñongä edæ ñäö batimpa. Näö ba ate Pabodo ñimpo cæte wadæ gocantapa. ¹² Ayæ, Edëningä mïingä quëwengampa, ante ænte wadæ godinque tömëñäni wampo pönëningue nanguï togadänimpa.

Ömaaque godinque Pabodo Müideto ganca pongampa

¹³ Pabodo guiquënë taadonque gocæ cædinque mönitö imönite apæncantapa. Mïnitö wipodë ñænæmpodë go guiidinque mäodämæ wipodenque godämæ goyömïni, botö ömaaque näñe tebæ pömoedäni. Atönö iñömö pö wäi wocænte owoyömïni botö iñömö ömaaque pö adopodë guiibo ate gocæimpa, angä Ao ante mönitö täno go gui tæ contadinque öme tagamönimpa. ¹⁴ Mänömaï godinque Atönö iñömö pö wäi wocænte owoyömöni tömengä ömaaque pö bee tëningue ñænæ wipodë adopodë pö guiite tæ contacä ate mönitö godongämæ

wogaa godinque Miitidēne nāni quēwēñōmō pontamōnipa. ¹⁵ Māniñōmō wāi wocænte monte ate ñāō ba wogaa godinque mōnitō Quiyo ganca pōninque waōnæ ate wodo pænta godinque wæætē Tāmo iñōmō pōmōnique go Todoguidio iñōmō pōmōnique go iñabæ guingā ate Miideto pontamōnipa. ¹⁶ Edæ, Ææmæ Pentecotee nāni ānōmæ botō bequinque Eedotadēē eyepæ poncæte ante quingæ goquēnēmo imopa, ante do āningā inte Pabodo ñōwo, Atiabæ wantæpiyæ ongōninque ædō cæte Eedotadēē eyepæ pōmaimoo. Ante pōnente wædinque, Epeto iñōmō ti wæænāmaī yaatænque gocæboimpa. Āñongā mōnitō tōmengā tōnō Epeto wodo tebæ godinque Miideto iñōmō pontamōnipa.

Epeto iñōmō nē Picænāni inānite Pabodo apæñecampa

¹⁷ Mānii wipo ñænæmpo Miideto iñōmō wogaa pō wāi wocæ ate ti wææninque Pabodo wadāni inānite da godōninque, Minitō Epeto iñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni inānite nē aadāni Picænāni inānite āñete pōedāni. ¹⁸ Angā āñete pōñōnānite tōmengā, “Botō Atiabæ mā ponte quēwēninque botō goganca æbānō mīnitō weca waa cæte quēwēnōmoī, ante do ēñēmīnipa. ¹⁹ Edæ oodeoidi, Wænoncæ, ānāni ēñēninque nanguī guiñente wæbo incæte botō, Ōnōmoque baī imopa, ante pōnēninque Wængonguī beyænque nanguī cædinque Ca ca wædinque ee cætabopa. ²⁰ Īninque botō, Minitō beyænque quīnō waa inguūi, ante pōnēninque pæ wēenedāmaī inte do apænebo

ēñēmīnitapa. Ayæ edæ tōmānāni ayōnāni odōmonte apænedinque botō wacōnē māo wacōnē māo go guiidinque apænebo ēñēmīnitapa. ²¹ Ayæ pancamīniya oodeoidi iñōmīnite pancamīniya guidiegoidi iñōmīnite botō tōmāmīni imīnite apænedinque iīmaī ante apænetabopa. Mīnitō, Idæwaa wēnæ wēnæ cæte awædō, ante pōnente wædinque Wængonguī gāmænō pōninque mōnō Awēnē Itota Codito ingante pōnencæmīnīmpa, ante āmo ēñēmīnitapa. Mānōmaī tōmāā cætabopa, ante do ēñēmīnīpa.”

²² “Nōwo guiquēnē Wængonguī Ōnōwoca angā ēñēninque Eedotadēē gocæboīmpa. Māniñōmō pōñōmote quiēmē bai bacæīmpa, ante pōnente wædīmo incæte ee gocæboīmpa. ²³ Ōnonque botō ñōwo wayōmō wayōmō nāni quēwēñōmō pōñōmote wadāni Wængonguī Tæiyæ Waēmō Ōnōwoca tōnō apænecā ēñēnāni inte do botō imote iīmaī ante wææ ānānīpa. Bitō tee mōnete nanguī caate wæquinque Eedotadēē gobīpa, ānāni ēñēninque māninque ante ēñēmōpa. ²⁴ Incæte, Wængonguī waadete pōnō cædinque nānō cægainō ante watapæ apænedinque bitō, Nō pōnī impa, ante apænebi ēñencædānīmpa, ante mōnō Awēnē Itota doyedē botō imote angacāīmpa. Iīnque tōmengā nānō anganca iīnque cæcæte ante cæyōmote wænōnāni wæmo incæte botō, Godōmenque inguīpoga quēwenguēnēmo intabopa, ante wædāmaī incæboīmpa. Ayæ pogodo gote bai botō goquīnō tōmānō gocæte ante nanguī cæcæboīmpa, āmōpa,” ante Pabodo apænecantapa.

²⁵ Ante apænedinque tōmengā ayæ godōmenque

apænecantapa. “Botō, Mönō Awënē Odeye do pongäimpa, ante apænedinque wayömō māo wayömō māo apænebo eñëminitapa. Idæwaa apænebo eñënimini inte minitō ñōwo æmæwo botō awinca aminipa. ²⁶ Mänōmaï beyæ botō ñōwoönæ apænedinque minitō iminite iïmaï ämopa. Botō, Quëwencæminimpa, ante cædinque ancaa apænebo incæte pancadäniya tömënäni nāni wii eñënō beyænque wentamō mongænte nāni wænguinque goyönäni botō wæætē mäninō beyæ wentamō mongænāmaï imopa. ²⁷ Wængonguï, iïmaï cæbo bacæimpa, ante nänō änō ante botō iñömō edæ pæ wëenedāmaï inte minitō iminite tömänō edonque pönï apænebo eñëminitapa.”

²⁸ “Minitō iñömō edæ nāmā wææ aadinque waa cæte quëwëedäni. Wængonguï Önōwoca minitō iminite äninque, iïnäni cæningäidi bai inänipa, ante nänō nē angainäni iñönänite minitō wæætē nē aamini inömini inte tömënäni inänite ædæmō wææ aadäni. Mönō Awënē Codito ingante nāni godongämæ pönencabo inänite æncæte ante tömengä nāmā wepæ godonte ængä ate Wængonguï quinäni bagadänimpa cæminii. Minitō tömënäni inänite nē aamini inte waa aadäni. ²⁹ Edæ botō do eñëmopa. Babæidi gäwæï ecate ade cænäni aminipa. Edæ botō emō cæte gobo ate waodäni incæ babæidi cädäni mini abai adobai wënæ wënæ cædinque mini pönencabo iñöminite ata cæpodāmaï incädänimpa. Tömënäni babæ wapiticæ änäni eñëninque mini cabo incæ pancadäniya eñënāmaï badinque wadæ godäni wæcæminimpa. ³⁰ Ayæ tömëmini mini pönencabo incæ pancadäniya, Mönitō

mīñæ poncæminimpa, ante cædinqe babæ wapiticæ odömoncædänimpa cæminii. ³¹ Edæ wææ cæedāni. Botö, Mänömaï bacæimpa, ante wadepo mēnepoga go adodepoque iñonte itædē incæ woyowotæ incæ ñimpo cædāmaï inte Ca ca wædinqe mīnitö tömämīni imīnite apænebo eññömīnimpa. Mänömainö ante pönēedāni,” ante Pabodo apænecä eññänitapa.

³² Äninqe tömengä, “Iñänāni, botö mīnitö imīnite Wængonguï nempo ñöwo emö cæte gobo tamēñedāni. Tömengä waadete nänö pönö cædinö ante möni apænedö ante eññente ewocamīni iñömīnite tömengä mīnitö imīnite godongämæ cæcä ate tæi piñænte bacæminimpa. Ayæ Wængonguï quimōni tömämōni tönö mīnitö adocabomīni bayömīnite tömengä eyepæ da pönongä ate mīnitö mönitö tönö godongämæ æncæminimpa. ³³ Botö iñömö æbänö quëwëmoï aedāni. Edæ wacä qui tigitamö incæ oodo incæ weocoo incæ, Botö qui bacæimpa, ante cöwë æinēnāmaï inömoimpa. ³⁴ Edæ tömëmo önompoca botö cædinö beyænque quiëmë ænguënëmo ante eyepæ æninqe quëwënömoimpa. Ayæ botö tönö godongämæ cædāni nāni ænguënënö ante adinqe adobaï botö tömëmo önompoca cædinö beyænque æninqe tömēnāni inānite da godö da godö cæbo æninqe quëwënönānimpa. Mänömaï botö cædinö ante do eññemīnīpa. ³⁵ Mönö Awënë Itota incæ iïmaï ante apænegacäimpa. ‘Mäincoo æninqe mönö wædænque tomompa. Wæætë wacä ingante pædæ godöninque mönö nanguï toquinque impa.’ Ante Itota nänö apænegainö ante pönëninque

botō, Mänōmaī mōnō ōnompoca nanguī cædinque æninque wadāni nē ænguēnēnāni inānite mōnō pædæ godongæimpa, ante mīnitō imīnite cōwē odōmonte apænebo ēñēmīnitapa.”

³⁶ Mänōmainō ante iinque apænedinque Pabodo tōmēnāni tōnō da guicapodinque Wængonguī ingante apænecantapa. ³⁷ Ayæ tōmēnāni Ca ca wædinque, Waa goe, ancæte ante godongāmæ goto pōninque tōmengā ingante yaagō yaagō cædānitapa. ³⁸ Tōmengā nānō, Botō imote æmæwo amīnīpa, nānō ānīnō beyæ godōmenque nanguī wædānitapa. Ayæ tōmengā ingante ñænæ wipo ganca ænte māodāni gogacāimpa.

21

Pabodo Eedotadēē gocampa

¹ Mōnitō tōniñadāni tōnō godongāmæ wægōninque Pabodo tōnō mōni goquincabo iñōmō, Wipo ñænæmpo do wogaa gocæ cæpa, ante adinque edæ, Ñōwo gomōnīpa, ante tōmēnāni inānite emō cæte godinque mānimpodē go guītamōnīpa. Guiīdinque mōnitō tōingā wogaa godinque Coto nāni quēwēñōmō ponte tōmæwæ æite monte ate iimō ate Ododata gomōnique go Patada nāni quēwēñōmō pontamōnīpa. ² Patada iñōmō pō ti wæænte ayōmōni, Wipo ñænæmpo Pēnitia goquimpo impopa, ante adinque mānimpodē go guiīdinque wogaa gotamōnīpa. ³ Wogaa godinque dipæmæ inō gomō ayōmōni wāā tēiwænē Tipidebæ a ongō adinque tæcæpæ inō wodo tebæ wogaa gomōnique go Tidiabæ pontamōnīpa. Ayæ ñænæmpo mōni goimpo Tido

iñömö mäincoo öwäaquï impa, ante eñëninque mönitö mänïñömö adobaï ti wææntamönipa.

⁴ Ti wææninque mönitö tömënäni quëwëñömö ponte ayömöni Itota ingante në tee empote quëwënäni a ongönäni adinque mönitö önompo æmæmpoque go meönaa iñonte tömënäni tönö godongämæ quëwentamönipa. Tömënäni guiquënë, Wængonguï Tæiyæ Waëmö Önöwoca apænecä eñëninäni inte Pabodo ingante, Bitö wæquinque Eedotadëe iñömö gocæ cæbipa, ante wææ änänitapa. ⁵ Mänömaï ante wææ änäni eñëmöni incæte mönitö, Mänimpoönæque quëwenguënëmöni intamönipa, ante adinque wadæ gotamönipa. Ìninque tömënäni näni quëwëñömö yabæ inö tömënäni näni wencabo tömänäni ænte mäodäni godinque mönitö ëmönaiya pöninque godongämæ da guicapodinque Wængonguï ingante apænetamönipa. ⁶ Apænete ate mönitö, Gomönipa, äninque go ñænæ wipodë adopodë guiidinque wogaa gocæ cæyömönite tömënäni wæætë, Waa goedäni, äninque ocæ ëmænte tömënäni oncö godänitapa.

⁷ Mönitö iñömö Tido iñömö wadæ tao wogaa godinque Todëmaida iñömö pö tömæwæ æidinque mänïñömö näni pönencabo inänite adinque mönitö, Pömönipa, äninque tömënäni tönö adoönæque quëwentamönipa. ⁸ Ìimö ate wadæ godinque Tetadea näni quëwëñömö pöninque Pedipe oncönë pö guite quëwentamönipa. Wëenëñedë Itota nänö në ëmiñænäni, Mönö pönencabo beyæ ante në cædäni tiæte ganca inäni incædänimpa, ante näni Tiæte änönäni iñönäni adocä Pedipe

tömēnāni nāni pōnencabo beyæ ante nē cæcā inongā inte Codito waa pōni nānō pōnō cægainō ante nē apæ necā inongāimpa. ⁹ Tōmengā wēnāni baquedānique mengāa go mengāa iñōnānite Wængonguī Önōwoca pōnō cæcā ate tömēnāni Wængonguī beyæ nē apæ nedāni inōnānimpa. ¹⁰ Mōnitō Pedipe weca tæōnæ quēwēmōni ate wacā onguīñægā tōmengā emōwo Agabo Wængonguī beyæ nē apæ nedongā inte Oodeabæ quēwente wææ pongantapa. ¹¹ Mōnitō weca pōninque tōmengā Pabodo pacadeyænta æninqe nāmā önompo goti wimpote wæi önōwa goti wēwadinque iīmaī ante apæ necantapa.

—Wængonguī Tæiyæ Waēmō Önōwoca botō imote æbānō ante apæ necāā, ante apænebo eñnedāni. Oodeoidi Eedotadēē nē quēwēnāni iñōmō iī pacadeyænta nē eadingā ingante mǎnōmaī goti wīninqe oodeoidi ināmaī ināni nempo pædæ godōnāni æncædānimpa, ante do apæ necā eñnemopa, ante Agabo apæ necantapa.

¹² Mǎnōmaī apæ necā eñëninque mōnitō Tetadea quēwēnāni tōnō Pabodo ingante wææ wææ apæ nedinque, Eedotadēē godāmaī imāwe. ¹³ Ante wææ añōmōnite Pabodo wæætē,

—Mīnitō iñæmpa Ca ca wæmīni eñente wædinque wætawente awædō. Edæ Eedotadēē goyōmote bæi ongonte goti wīnāni incæte wænōnāni wæmo incæte botō iñōmō ñimpo cædāmaī inte mōnō Awënë Itota emōwo beyænque cōwē gocæboimpa.

¹⁴ Ante mǎnōmaī apæ necā eñëninque mōnitō ancaa wææ añōmōnite Pabodo, Cōwē gocæboimpa, ante ñimpo cædāmaī inte angā wædinque mōnitō

wæætē edæ, Wængongui nänö änö bai bacæimpa, ante adinque mönitö ee ate pæ wëenetamönipa.

¹⁵ İninque mänimpoönæ mäniñömö quëwëninque, Ñowo mönö Eedotadëë gocæimpa, ante cædinque Pabodo tönö godongämæ ee gotamönipa.

¹⁶ Goyömöni Tetadea iñömö quëwënäni inte Itota ingante nē tee empote quëwënäni pancadäniya mönitö tönö godongämæ godinque, Näatöo oncönē owocæminimpa, ante mäninganca ænte mämönäni pö guiitamönipa. Tömengä iñömö wää tēiwænē Tipidebæ nē quëwëningä inte dobæyedē Itota nänö nē emiñængä badingä inte quëwëningäimpa.

Tantiago weca Pabodo ëñacæ gocampa

¹⁷ Tömengä oncönē pö gui mömönique go Eedotadëë pöñömöni mäniñömö quëwente nē pönänäni iñömö, Waa pömini amönipa, ante todänitapa. ¹⁸ Ayæ iimö ate Pabodo tönö godongämæ möni poncabo Santiago weca ëñacæ gotamönipa. Tömengä weca pöñömönite nē pönänäni inänite nē aadäni nē Picänäni tömänäni adoyömö pönänitapa. ¹⁹ Adinque Pabodo, Waa quëwëmini, äninque godömenque iimaï ante apænecantapa. Mëmöidi ëñëedäni, äninque, Botö oodeoidi inämaï inäni weca gote cæyömote Wængongui iimaï godongämæ waa cæcantapa, ante Wængongui nänö cædinö ante tömengä adodö adodö ante apænecä ëñëänitapa. ²⁰ Eñëninque nē aadäni Picänäni guiquënē, Wængongui, Bitö waa pönï cæbitapa, ante godongämæ watapæ apænedänitapa. Ayæ Pabodo ingante wæætē apænedinque,

—Biwī ēñēmi. Oodeoidi æpodö müido ganca ināni ñowo do pönente badāni abitapa. Tömēnāni iñömö Wængongui nānō wææ angainö ante tömänāni ēñente cōwē cædāni abitawo. ²¹ Ayæ edæ bitö Pabodobi wēnæ wēnæ cædāmaï iñömite wadāni bitö imitedö ante babæ wapiticæ godö oodeoidi inānite iïmaï ante tedewēnāni ēñēnānipa. Tömēnāni, Pabodo wayömö wayömö godinque oodeoidi wabæca quēwēnāni inānite bee tente odömöninque iïmaï ante apænecampa, ante tedewēnānipa. Pabodo, Minitö wēnāni inānite eö togænāmaï iedāni, äninque, Dodāni nāni angainö mīni ēñēnō ante ñimpo cædāni, ante änewengampa, ante tedewēnānipa. Ayæ godömenque äninque, Mōitee wodi nānō wææ angainö ante wido cædāni, ante Pabodo änewengampa töö. Ante tömänāni bitö imitedö ante babæ ante tedewēnānipa. Iñæmpa bitö mänömaïnō ante änāmaï iñömite tömänāni oodeoidi inānite babæ ante apænedāni ēñēnānipa cæbii. ²² İninque, Pabodo do pongäimpa, ante oodeoidi do ēñenguināni inānipa, ante pönente wædinque mönitö ñowo, Æbānō cæte wææ cæquïi, ante wæmönipa. ²³ İninque, Pabodo nö cæcä iñongante wadāni babæ wapiticæ tededānipa, ante oodeoidi ēñencædānimpa, ante wææ cædinque bitö iïmaï cæcæbiimpa ämönipa.

“Pabodo ēñēmi, änānitapa. Mönitö weca onguiñænāni mengäa go mengäa ināni ñowo ongöninque, Wængongui beyænque ante cōwē cæcæmönimpa, ante nē änināni inte tömänāni nāni äninö bai iinque cæquināni inānipa. ²⁴ Tömēnāni, Mönitö äninö ante do iinque cædimöni inte wentamö mongænāmaï imöni acædānimpa, ante

cædinque, Wængonguï quï, ante godoncæ cædänipa. Ìninqe bitö iñömö mäninäni inänite ænte godinque tömënäni tönö godongämæ, Wængonguï quï, ante godöe. Ayæ bitö eyepæ pædæ godömi æninqe tömënäni näni godonguëncoco godonte æninqe, Wængonguï quï, ante godöninque tömënäni ocaguï tömanguï ocäa pöni ëö tocate incædänimpa. Bitö mänömaï tömënäni tönö iñacabo cædinque Möitee wodi nänö angainö bai cæbi adinque oodeoidi wæætë, Æ, Pabodo nö cæcä iñongante wadäni iñömö babæ wapiticæ tededänipa, ante ëñencædänimpa,” ante nê Picænäni änänitapa.

²⁵ “Ayæ oodeoidi inämaï inäni guiquënë nê pönänäni badinque æbänö cæquënënenäni inänipa, ante pönente wædinque mönitö do godongämæ pönëninque tömënäni inänite iïmaï ante yewæmontamönipa. Wadäni, Wængonguïidi quï, ante cænguï näni cönöncoco ante mïnitö cænämaï gomö aedäni. Wepæ owemöingä adinque cæningä ñë wïmencate wæningä adinque cænämaï iedäni. Ayæ nänöogængä inämaï iñongante mïnitö godö guëa mönämaï iedäni, ante do yewæmontamönipa,” ante nê aadäni Picænäni Pabodo ingante apænegadänimpa.

Wængonguï oncönë Pabodo ingante bæi ongönänipa

²⁶ Ìimö ate ñäö bayonte nê aadäni Picænäni näni äninö bai ëñente cædinque Pabodo mengäa go mengäa inäni inänite ænte mäocä gote cæyönäni tömengä nänö tæiyæ waëmö baquinque ante tömënäni tönö Möitee wodi nänö wææ angainö ante ëñente cæcantapa. Mänömaï

cædingä inte tömengä Wængongui oncö ñænæncö yabæcönë go guiddinque mänïñömö cædäni inänite apænedinque, Mönitö adoque Wængongui itæde go ate Möitee wodi nänö angainö ïinque cæmöni ate ïinäni ïñömö, Wængongui qui, ante baö pædæ pönönäni æninque tancæminimpa, ante Pabodo tömënäni beyæ ante apænecantapa.

²⁷ Ayæ önompo æmæmpoque go mëönaa nänö änimpoönæ wodo ïinque ba ate oodeoidi Atiabæ quëwente në pöninäni guiquënë Wængongui oncö ñænæncö yabæcönë ponte ayönäni Pabodo a ongongä. Adinque mänïñömö önonque ongönäni inänite, Mönö piinte cæcæimpa, ante änäni ëñëninque ïinäni wæætë ængui badänitapa. Ayæ Pabodo ingante bæi ongonte, ²⁸ aa pedinque tömengä ingante në piinte änäni ïñömö, “Idægoidi cöwä aedäni” ante, “Ïingä ingampa cæminii. Pö godongämæ cædäni. Tömengä inguipoga tömäo godinque tömämæ quëwënäni inänite mäo apænedinque ïimainö ante tedewengampa. Idægoidi wënæ wënæ cædäni inänipa, ante cöwë änewengampa. Wængongui oncö ñænæncö incæ önonconque impa, angampa. Ayæ Wængongui nänö wææ angainö ante mönö ëñënämaï ingæimpa, ante tömengä änewengampa töö. Ayæ ïñömö oncö tæiyæ waëmö oncö ïñonte tömengä wæætë guidiegoidi inänite ænte mämö ïincönë guiddinque otænë öñö bai cæcantapa cæminii,” ante piinänitapa.

²⁹ Do edæ wacä Todopimo ïñömö Epeto ïñömö quëwëningä inte Eedotadëe pöninque Pabodo tönö cægöna inönäimpa. Mänömaï guëa cægöna adinque oodeoidi, Æ, ïingä oodeocä inämaï ïñongante Pabodo do Wængongui oncö ñænæncö

yabæcönë ænte mämongä wäänë guiibaingampa, ante wawique pönëninque mäninö ante wapiticæ apænedänitapa.

³⁰ Mänömaï ante änewënäni ëñëninque Eedotadëë quëwënäni tömäo iñömö Yæ yæ äninque pogodo pönänitapa. Ponte Wængonguï oncö ñænæncö yabæcönë mäo pö guidinque Pabodo ingante bæi ongonte æninque oncodo wëä mantao godinque odemö do tee mönedänitapa. ³¹ Ayæ godömenque, Wængongæimpa, ante tæcæ cæyönäni adocanque mæi odömäno tontadoidi awënë cömantante ingante apænecantapa. Eedotadëë tömäo Yæ yæ äninque pogodo pönänipa cæbii. ³² Ante mæi angä ëñente wædinque awënë cömantante iñömö tontado capitäoidi tontadoidi inänite, Pöedäni, äninque në Yæ änäni weca pogodo wææ do pönänitapa. Ìninque awënë cömantante tönö tontadoidi do wæænte pönänipa, ante adinque wadäni wæætë Pabodo ingante në tæi tæi päninäni inte ñöwo ñimpo cædinque ee adänitapa. ³³ Pabodo weca pöninque awënë cömantante angä ëñëninque tontadoidi wæætë Pabodo ingante bæi ongöninque yaëmengö mëmëña goti winänitapa.

Awënë cömantante iñömö, Æcänö ingäi, ante ayæ, Quinö wënæ wënæ cæcäi. ³⁴ Äñongante pancadäniya, Ìimaï cæcantapa, äñönäni wadäni wæætë, Wïi iimaï wadö cæcantapa, äninque wææ wææ äñönänite tontadoidi awënë cömantante iñömö, Nöingä ante æbänö cæte ëñenguïmoo, ante wædinque tontadoidi inänite angä ëñëninque Pabodo ingante tömënäni wææ cæte iñömö ænte mæicæte ante cædänitapa. ³⁵ Ænte godinque tëwaimpa ganca tæcæ pöñongante godongämæ

ongönāni godömenque ænguï badinque wīwa cæcæ cædāni wædinque tontadoidi wæætē Pabodo ingante wææ cædinque önönancapæ ængö cædinque adimongā næænte mæidāni tēwaimpaa æicantapa. ³⁶ Ayæ tōmānāni edæ tee empote pönāni iñömö Yæ yæ āninque, “Cöwē wido cæcæimpa,” ante ancaa ānānitapa.

Pabodo nāmā wææ apænecampa

³⁷ Wææ cætiñömö tæcæ mangui guicæte ante cæyönāni Pabodo iñömö tontadoidi awënë cōmantante ingante apænedinque,

—Bitö Ao āmi eñente ate botö adodeque bitö imite apænecæboimpa.

Äñongante,

—Iñæmpa bitö guidiego tededö tedebe imitawo. ³⁸ Bitö iñæmpa equitobi inömi inte edæ doyedē, Wido cæcæimpa, ante cædinque nē, Wænongæimpa, ante nāni ānincabo iñönānite coatodo miido ganca ināni inānite önömæca ænte mäobi godānitapa. Botö ayömo bitö adobi imitapa tōö.

³⁹ Äñongante Pabodo wæætē,

—Iñæmpa botö waobo eñagaïmo inte oodeobo inömo imopa. Botö wīi önöñömonque eñagaïmo imopa. Tiditiabæ Tadoto nāni nanguï quēwēñömö eñagaïmo imopa cæbii. Ao āmi ate botö iināni inānite apænebo eñēmainānipa.

⁴⁰ Äñongante Ao angā ate tēwaimpaa adiyæ gongæninque godongāmæ ongönāni inānite Pabodo, Apocænē iedāni, ante bai cædinque compo compo cæcä. Adinque tededāmaï ongönāni ate

tömengä ebedeoidi näni tededö tededinque iimaï ante apænecä eññänitapa.

22

¹ “Botö tönĩñamĩni imĩni eññeedäni. Botö wæmpomĩni imĩni botö nämä wææ apænebo eññeedäni.”

² Ante Pabodo ebedeo tededö apænecä eññenique tömөнäni, Æ mönö tededö apænecampa, ante wædinque godömenque eamonca nõwæ ongöñönäni tömengä iimaï ante apænecantapa.

³ “Botö iñömö oodeobo ingaïmo imopa. Tidityabæ Tadoto iñömö eñgaimö inte botö Eedotadëe ponte pægaboï aedäni. Iñömö pædinque Gämadedo nē odömongä weca adimo inte botö mönö mæmæidi näni wææ angainö ante ædæmö eññenique adodö ante eññente cæte pægaboimpa. Minitö, Wængonguï beyæ ante mönö cöwē cæcæimpa, ante ñwoönæ cæminipa. Minitö cæminipa bai botö adobai Wængonguï beyæ ante cæcæte ante cöwē nanguï cædinque quëwengaboimpa. ⁴ İninue, Itota öönädë godö Taadö bai ingampa, ante nē pönөнäni inänite botö, Pämö wæncædänimpa, ante togænte pangaboimpa. Onguïñænäni incæ onquiyænäni incæ tömänäni inänite bæi ongöninque botö wadäni nempo pædæ godömo æninque tömөнäni wæætë nē pönөнäni inänite mao tee mönedäni wægädänimpa.”

⁵ “Mänömaï cædinque botö, Godömenque Daämaco iñömö godinque botö, Taadö, ante nē pönөнäni inänite bæi ongonte goti winte adodö Eedotadëe iñömö ænte mämö pædæ godömo æninque awөнëidi wæætë tömөнäni inänite

pänäni wæcædänimpa, ante cætabopa. Mänömaï cæcæte ante cæbo adinque, Wængonguï quï, ante nê godongä ñænængä pöni inongä tönö nê aadäni näni Picæncabo tönö Ao äninque, Mönitö tönïñadäni Daämaco iñömö quëwënäni acædänimpa, ante cadota ante yewæmönäni ænte gotabopa. Ìninque, Botö æbänö cæboo, ante nê agäinäni inte awënëidi incæ edæ, Pabodo näwangä angampa, ante ñöwo nê apænequënänäni inänipa,” ante Pabodo angantapa.

Botö wëenë pönëwengainö ante ñimpo cædinque wadö ante pönëmpa, ante Pabodo apænecampa (Näni Cægainö 9.1-19, 26.12-18)

⁶ Äninque Pabodo, Ìimaï cægaboimpa, ante godömenque apænecantapa, “Botö taadö godinque tæcæbæcä iñonte Daämaco obo ponte ayömote öönädë iñontobæ ñäö botö weca pö godongämæ guinæ gongæ ate wædinque, ⁷ botö guidömëmæ tæ go wææntabopa. Ayæ ëñëñömote, ‘Taodo, Taodo. Botö imote quïnante togænte pämiï.’ ⁸ Äñongante, ‘Awënë, æbidö inömi imii.’ Ante wæyömote tömengä, ‘Itota Näatadeta quëwënimo inte mänimodö bitö nê togænte pänömo imopa,’ ante apænecantapa. ⁹ Mänömaï apæneyongä botö tönö godongämæ godäni guiquënë ñäö gongænque adinque botö imote nê apænecä nänö tededö ante ëñënamäi inänitapa. ¹⁰ Botö iñömö, ‘Awënë, quïnö cæquënëmo imoo, ante ämi ëñëmoe.’ Äñömote mönitö Awënë wæætë, ‘Bitö ængæ gantidinque Daämaco iñömö goe. Botö, Taodo Ìimaï cæcæcäimpa, ante wacä ingante Daämaco iñömö nê quëwengä ingante do apænebo ëñengampa cæbii. Bitö Daämaco iñömö

gote ongöñömi tömengä wæætë bitö ïmite apænecä ëñente cæcæbiimpa, angantapa. ¹¹ Ayæ ñäö gongæ adinque botö bee wodömonte bai bayömete botö tönö godongämæ godinäni wæætë töö æmænte Daämaco ïñömö mäodäni gotabopa,” ante Pabodo apænecantapa.

¹² Mänömainö ante apænedinque Pabodo godömenque apænecantapa. “Mäniñömö gote ongöñömo wacä tömengä ëmöwo Änäniya botö weca pongantapa. Tömengä ïñömö Wængongui ingante guiñente wædongä inte dodäni näni wææ angainö ante cöwë ëñente cæcä ïnongäimpa. ïnque oodeoidi mäniñömö quëwënäni tömänäni tömengä ingante waa adönänimpa. ¹³ Tömengä ïñömö botö weca pö næ gongæninque, ‘Taodo, bitö botö biwi ïmi, ñöwo waa bamonte ae.’ Tæcæ äñongante botö æmö adinque tömengä ingante waa atabopa. ¹⁴ Tömengä ayæ apænedinque, ‘Mönö mæmæidi Wængongui incæ, Botö æbänö cæquimo imoo, ante botö pönente angainö ante bitö ëñencæbiimpa, ante cædinque bitö ïmite apænte ængampa. Ayæ, Mönö nö cædongä ingante tömëmi acæbiimpa. Adocä apænecä ëñencæbiimpa, ante cædinque Wængongui bitö ïmite do apænte ængampa. ¹⁵ ïnque në adïmi inte në ëñëmi inte bitö ïñömö edæ bitö adinö ante bitö ëñëninö ante, Näwangä impa, ante tömämæ quëwënäni ïnänite mäo apænebi ëñencædänimpa. ¹⁶ Nöwo ïñömö quïnante a ongömii. Ængæ gantidinque Itota ëmöwo apænedinque, Wënæ wënæ botö cædö pönö ñä mënongabi quëwëmoë, äninque æpænë guiie.’ Ante Änäniya angä ëñëninque botö æpænë guiitabopa,” ante

Pabodo apænecantapa.

Oodeoidi weca gotabopa, ante Pabodo apænecampa

¹⁷ “Ayæ ate adodö Eedotadëe pontabopa. Ayæ Wængongui oncö ñænæncö yabæcönë go guidine Wængongui ingante apænedinque botö ate bai cæwënente ayömö, ¹⁸ mönö Awënë botö imote iimaï ante apænecantapa. ‘Bitö botö imote ante nö apænebi incæte iinäni ëñënamaï inäni inte Baa anguinäni inänipa cæbii. Ñowo Eedotadëe quingæ wodii tao gobæwe.’ ¹⁹ Äñongante botö, ‘Awënë ëñëmi, antabopa. Oodeoidi odömöincönë wacönë wacönë go guidine botö bitö imite në pönënäni inänite mäo tee mönedinque tæi tæi pänimo imopa. Mänömaï impa, ante iinäni do ëñënäni. ²⁰ Ayæ, Itota incæ näwä Awënë inongä ingampa, ante në apæneca iñongante Etebä wodi ingante wænönäni wæñongä botö edæ Ao äninque në wænönäni weocoo aate a ongotabopa, ante tömënäni do againäni inte botö imote waa aquinäni inänipa.’ ²¹ Ante wææ apænebo incæte Wængongui Awënë wæætë, ‘Ñowo goe, ämopa, angantapa. Gobæ oodeoidi inämaï inäni weca bitö imite da godömo gocæbiimpa,’ ante da godongä gotabopa,” ante Pabodo apænecantapa.

Pabodo tontadoidi awënë cömantante weca on-gongampa

²² Pabodo, Oodeoidi inämaï inäni weca angä gotabopa, ante nänö apænedi ganca godongämæ ongönäni ëñëe gönänitapa. Wæætë mänine apæneca ëñente wædinque tömänäni yedæ äninque, “Oodeoidi inämaï inäni weca godingä iñömö edæ

quëwënämaï inguënengä awædö. Tömengä ingante mönö wo ëwengæimpa.” ²³ Äninqe tömënäni godömenque ænguï badinque Yæ yæ äninque nämä weocoo yabæcooqwe gäni tadongadinque wancæ wancæ cædinque onguipo guidimö ö æninque wo ææntodö wo ææntodö ancaa cædänitapa. ²⁴ Mänömaï ænguï bate wënæ wënæ cædäni adinque tontadoidi awënë cömantante angä ëñëninque Pabodo ingante wææ cæte iñömö manguidäni guicantapa. Ayæ, Quinö wënæ wënæ cæcäi ante piinte änänii, ante ëñencæte ante tontadoidi inänite apænedinque, Minitö cöwë cædinö bai cædinque tæi tæi pämini caate wædinque Pabodo tömää tömengä cædinö edonque pöni apænecä ëñencæboimpa, angantapa. ²⁵ Ëñëninque tömengä ingante pancæte ante æmontaimenca tæcæ goti wïninque ñö cæyönäni Pabodo iñömö tontado awënë capitäo mäniñömö ongongä ingante apænedinque,

—Iñæmpa apænte änämaï iñönäni botö odömäno onguïñæmo iñömote quimæ päwëminii. Mänömainö cædinque minitö awënëidi näni wææ angainö ante dicæ ëñente cæminiyaa.

²⁶ Äñongä capitäo wæætë awënë cömantante weca godinque,

—Iingä iñömö odömäno onguïñængä inongä ingä ataque. Ñöwo æbänö cæquimii. ²⁷ Angä ëñente wædinque cömantante iñömö Pabodo weca pöninque tömengä ingante,

—Bitö näwangä odömäno onguïñæmi iimitawo.

Äñongante Pabodo,

—Ao, bitö ä bai botö mänimodö imopa, angantapa.

²⁸ Pabodo apæ necä eñëninque cömantante wæætë,

—Botö guiquënë odömäno inämaï eñagaïmo inte mäninö bacæte ante cædinque nanguï godömo æninque odömänoidi wæætë botö imote, Odömänobi imipa, ante yewæmönäni bagaboimpa.

Apæ necä eñëninque Pabodo wæætë,

—Botö guiquënë odömänobo eñagaïmo inte edæ odömänobo inömo imopa, ante apæ necantapa.

²⁹ Mänömaï apæneyongä në pancæ cædinäni guiquënë do tömengä ingante emö cæte wadæ godänitapa. Ayæ cömantante iñömö, Pabodo odömäno onguïñængä iñongante botö ämo yaëmengonca goti winänipa töö, ante guïñente wædinque, Botö awënëidi pïinäni wæcæ wæ, ante wægacäimpa.

Oodeoidi näni Apænte Äincabo weca Pabodo ongongä

³⁰ Iimö ate cömantante iñömö, Quïnö Pabodo wænæ wænæ cæcäi ante oodeoidi pïinte änänii, ante eñencæte ante Pabodo ingante añecä ta pongantapa. Ayæ, Wængonguï qui, ante në godönäni ñænænäni tönö oodeoidi tömënäni näni në Apænte Äincabo inänite añete godongämæ ponte ongöñönäni Pabodo ingante ænte mäwæ tömënäni weca gö cæcä gongængantapa.

23

¹ Pabodo iñömö oodeoidi näni në Apænte Äincabo inänite gomö adinque,

—Botö mēmōidi ēñēedāni. Botö mīmō entawente nāmā apænte cædinqwe Wængonguī beyæ botö cæquēnēnō ante wēēnēñedē iinqwe cædinqwe cōwē ñōwo ganca adobaī cædinqwe quēwēmopa.

² Ante mănōmaī apænecā ēñente wædinqwe, Wængonguī quī, ante nē godongā ñænængā pōnī iñongā Ānāniya guiquēnē Pabodo gäänē ongōnāni inānite apænedinqwe, Ōnōneca tæi tæi tadeedāni, angantapa. ³ Āñongā Pabodo wæætē,

—Bitö iñæmpa botö imote apænte ancæte ante Mōitee wodi nānō wææ angainō ante cæbitawo. Incæte adode nānō wææ angainō ante ēñēnāmaī inte bitö edæ, Tæi tadeedāni, ante pōnō āmi awædō. Bitö weocoo waëmoncoo ēñabi incæte mīmō wentamō entawēninqwe cæyōmite Wængonguī bitö imite nāēmæ tæi tadeccæcäimpa tōö.

⁴ Ante apænecā ēñēninqwe Pabodo gäänē ongōnāni wæætē,

—Bitö iñæmpa, Wængonguī quī, ante nē godongā ñænængā pōnī iñongante quīmæ tedewēmii.

⁵ Āñönānite Pabodo wæætē,

—Botö tōniñadāni ēñēedāni. Botö, “Waodāni awēnē iñongante tōmengā ingante wēnæ wēnæ tededāmaī incæbiimpa,” ante do wææ yewæmongatimpa, ante do ēñēmopa. Iñinqwe botö, Iñömō ongongā, Wængonguī quī, ante nē godongā ñænængā pōnī iñongā ingampa, ante ēñēnāmaī inte botö mănōmainō ante apænetabopa.

⁶ Ante apænedinqwe Pabodo, Iñāni pancadāniya Tadoteoidi iñönānite pancadāniya Paditeoidi

inānīpa, ante adīnque tōmēnāni nāni nē Apænte
Äincabo inānite aa pedīnque,

—Botō mēmōidi ēñēdāni. Botō Paditeo wēmo
nē ēñagāimo inte botō mæmpo Paditeo nānō ingāi
baī botō adobaī Paditeobo inōmo imopa. Mānimodō
inōmo inte botō, Mōnō ñāni ōmæmonte watapæ
quēwengæimpa, ante pōnēmopa. Inīnque māñine
botō pōnēnō beyænque botō imote apænte ānīnque
mīnitō pancæ cæmīni awædō, angantapa.

⁷ Pabodo mānōmāinō ante apænecā ēñente
wædinque Paditeoidi tōnō Tadoteoidi dodāni nāni
pōnengāinō ante wæætedō wæætē ānewēnīnque
Paditeoidi nānēnē Tadoteoidi nānēnē nāni cabo
nāni cabo badānitapa. ⁸ İmaī impa. Tadoteoidi
guiquēnē, Mēwoga waomō ēwocamō inte mōnō ñāni
ōmæmongæimpa, ante, Babæ ancædō, ante Baa
ānīnque, Ōnōwocaidi tōnō anquedoidi Wængonguī
weca owodānīpa, ante adobaī edæ Baa ānāni
inōnānīpa. Paditeoidi guiquēnē mēnea ante
pōnēnīnque Ao ānāni inōnānīpa. ⁹ Inīnque wadō
wadō tedete ogæ tedeyōnānite Paditeoidi tōmēnāni
nē odōmōnāni pancadāniya ængæ gantīdīnque,

—İngā inōmō mōnitō ayōmōni wēnæ wēnæ
cædāmaī ingampa tōō. Wæætē edæ anquedo
incæ wacā ōnōwoca incæ Wængonguī weca owocā
inongā inte tōmengā ingante apænecā İmaingampa
ānewēmīnīi.

¹⁰ Ante nanguī ogæ tedeyōnāni tōmānāni
godōmenque Yæ yæ ānāni ate wædinque tontadoidi
awēnē cōmantante inōmō, Pabodo ingante
æmæmæ inō tōō godō æmæmæ inō tōō godō
cædinque æi guñæñāni wæmaingampa. Ante

pönente guñente wædinque tontadoidi inänite angä wæænāni ate, Pabodo ingante bæi ongonte ö æninque wææ cæte iñömö ænte mæi tee möneedāni, angä eñente tee mönedānitapa.

11 Iimö ate woyowotæ mönö Awënë iñömö Pabodo weca ponte apænecantapa. “Pabodo, Guñente wædāmaï incæbiimpa. Bitö doyedë Eedotadëe iñömö botö imotedö ante apænedinque, Nāwä Awënë inongä ingampa, ante apænebitawo. Ñowo iñömö do bitö apænedö bai Odömä iñömö godinque adobai apænecæbiimpa,” angantapa.

Pabodo ingante wænongæimpa, ante cædänipa

12 Ñäo bayonte Oodeoidi pancadāniya guiquënë godongämæ pönëninque iimainö ante Ao änānitapa. Cænāmaï bedāmaï inimo inte mönö Pabodo ingante wænongæimpa, ante cædinque, Pabodo müi quëwëñongante mönö cabo incæ æcänö cæna æcänö beda mäningä nänö wænguinque cæcampa.

13 Onguiñænāni nē änāni iñömö coadenta ganca ināni ayæ godömenque nanguï ināni godongämæ pönëninque mänömaï anewëninque cædāni inānitapa.

14 Iināni iñömö, Wængongui qui, ante nē godönāni ñænænāni tönö nē aadāni nāni Picæncabo weca godinque iimaï ante apænedānitapa.

—Mönitö godongämæ Ao äninque, Pabodo ingante wænongæimpa. Edæ müi quëwëñongante æcänö cæna æcänö beda nänö wænguinque, ante ämönipa cæminii. 15 Minitö tönö wadāni

mīni Apænte Äincabo inömīni inte mīnitö iñömö, Pabodo æbänö cæcäi, ante ædæmö eñencæte ante wæte bai apænedinque tontado awënë cömantante ingante babæ ante ämīni eñëninque

tömengä wæætē Pabodo ingante mīnitō weca ænte poncæ cæcæcāimpa, ämönipa. Mänömaī babæ ämini ēñente cædinque cōmantante wæætē Pabodo ingante māwængä tæcæ wææñongante mōnitō guiquēnē taadō wææ wänöninge bæi ongonte edæ wænömōni wæncæcāimpa ämönipa.

16 Äñönāni Pabodo nänöwāa iñömō edæ do ēñengantapa. Ēñēninge tömengä tontadoidi nāni wææ cæte iñömō do go guidinque Pabodo ingante apæncä. 17 Ēñēninge Pabodo wæætē tontadoidi awēnē capitāō ingante apænedingue,

—İngä edēningä ingante mīnitō awēnē cōmantante weca ænte manguibi guicæ. Tömengä cōmantante ingante adodeque apæncæcāimpa.

18 Angä Ao äninge capitāō wæætē mäningä edēningä ingante ænte guidinque cōmantante ingante apæncantapa.

—Pabodo mönō nē tee mönedongä iñömō botō ïmote aa pedingue iīmaī angantapa. İngä edēningä ingante awēnē cōmantante weca ænte mäobi guidinque tömengä awēnē ingante adodeque apæncæcāimpa, angantapa.

19 Ante apæncä ēñēninge cōmantante iñömō edēningä ingante tōō æmænte nänēnē mäocä goyongante,

—Botō ïmote æbänō apæncæte ante pōmii.

20 Äñongante,

—Awēnē ēñēmi. Oodeoidi godongämæ pönēninge iīmaī babæ cæcæte ante cædānipa. Tömēnāni, Pabodo æbänō cæcäi, ante ædæmō ēñencæte ante bai apænedingue bitō ïmite babæ ante apæncæ cædānipa. Bitō iīmō ate Pabodo

ingante tömënäni näni në Apænte Äincabo weca ænte poncæbiimpa, ante cædinque babæ cæcæte ante cædänipa. ²¹ Tömënäni iñömö, Pabodo miingä quëwëñongante æcänö cæna æcänö beda nänö wænguinque, ante në änönäni inte edæ, Wængongæimpa, äninque cædänipa. Adodäni näni cabo incæ coadenta ganca onguïñænäni wænoncæte ante taadö do wææ wänöninge edæ, Wænömö wæncæcäimpa, ante edæ a ongönänipa cæbii. Tömënäni, Bitö æbänö Ao anguimi, ante ëñencæte ante ponte änewëñönäni bitö iñömö wæætë tömënäni näni änö bai cædämaï incæbiimpa ämopa.

²² Ante edëningä apænecä ëñëninge cömantante iñömö, Bitö, Awënë ingante ante mänömaï apænetabopa, ante wacä ingante apænedämaï pæ wëenecæbiimpa. Nöwo edæ goe, angantapa.

Pedique weca Pabodo ingante ænte mäodäni go-campa

²³ Edëningä ingante mänömaï angä gocä ate cömantante wæætë awënëna capitäöna mënaa inate aa pecä pöñönote tömëna inate iïmaï angantapa. Minatö ñöwo tontadoidi önöwa në godäni dotiento ganca inäni tönö cabayo mongænte në godäni tetenta ganca inäni ayæ tapa në næænäni dotiento ganca inäni tönö mänimpodäni inänite iïmaï ancæminaimpa. Minitö ñöwoönæ eyepæ cædinque wantæ wantæ guiñongä wadæ godinque Tetadea ganca goedäni, ante da godömina tao gocædänimpa. ²⁴ Ayæ Pabodo beyæ cabayoidi ämi ænte gocædänimpa. Tömengä ingante wææ aadinque pancabaa awënë gobedönadodo Pedique weca

ämīna ænte mädäni cabayo mongænte adimongä gocæcäimpa. ²⁵ Äninqe awënë cömantante iñömö cadota ante iīmaī ante yewæmongantapa.

²⁶ Pedique eñēmi.

Bitö acæbiimpa, ante botö Codaodio Ditia inömo inte ñowo yewæmömopa. Bitö nē gobedönadodo awënë inömi inte waëmö pönī imipa, ämopa. Waa quëwencæbiimpa, ämopa.

²⁷ Iingä ingante oodeoidi bæi ongonte wænoncæ cæyönänite botö wæætē, Iñæmpa iingä iñömö odömäno onguñængä ingampa, ante do eñente wædimo inte tontadoidi tönö godinque tömengä ingante gä pe æmpote ö ænte wææ aatabopa. ²⁸ Ayæ oodeoidi, Pabodo wënæ wënæ cæcäi, ante quīnante piinte änānii. Ante eñencæte ante cædinque botö tömengä ingante tömēnāni nāni nē Apænte Äincabo weca ænte gotabopa. ²⁹ Ænte gote eñēñömo tömēnāni dodänique nāni angainonque ante, Pabodo eñēnāmaī cæcampa, ante piinte änāni wætabopa. Iñinque botö ayömote tömēnāni, Pabodo nänö wænguinque nänö tee mönequinque wënæ wënæ cæcampa, ante piīninqe önonquedö ante cædänipa, ante awædö. ³⁰ Ñowo iñömö, Iingä onguñængä ingante wænoncæte ante oodeoidi awëmö cædänipa, ante tededäni eñēnimo inte botö tömengä ingante bitö weca do da godömo gocampa. Tömengä ingante nē piinte änīnāni inänite bitö weca adobaī da godömo godänipa. Mäninqe ante yewæmömopa.

Ante cadota ante yewæmöninqe, Awënë gobedönadodo Pedique acæcäimpa, ante tontado

awënë cömantante da godongä ænte godänitapa.

³¹ İninque cömantante nänö äninö eñente cædinque tontadoidi woyowotæ tao godinque Pabodo ingante Antipati ganca adimongä mäodäni gocantapa. ³² İimö ate, Cabayo mongænte nē godäni tönö Pabodo adimongä gocæcäimpa, äninque tömēnāni nempo emö cæte godinque önöwa nē godänique tömēnāni näni cæte quēwencönē ocæ emænte godänitapa. ³³ Cabayo mongænte nē godäni wæætē Pabodo ingante godömenque ænte godinque Tetadea iñömö pöninque awënë gobedönadodo ingante cadota pædæ godöninque Pabodo ingante awënë nempo pædæ godönāni ængantapa. ³⁴ Awënë gobedönadodo iñömö cadota ænte adinque, Bitö æbædö eñagabiimpa. Äñongä Pabodo, Tiditiabæ eñagaboimpa. ³⁵ Ante apæ necä eñēninque gobedönadodo wæætē,

—Bitö imite nē piinte änināni pönāni ate mäniñedē ate botö, Bitö æbänö apænequimi, ante eñencæboimpa.

Äninque wææ wänönāni inänite apænedinque, Minitö Awënë Edode wodi nänö apænte angaincönē Pabodo ingante ænte gote wææ wänöedäni, ante gobedönadodo angä ænte godänitapa.

24

Pedique weca ongöninque Pabodo nämä wææ apæ necä

¹ Önompo æmæmpoque iionæ go ate, Wængongui qui, ante nē godongä ñænængä pönī inongä Änäniya iñömö Eedotadēē quēwēninque wææ

Tetadea gocantapa. Ayæ wacä tömengä emöwo Tedetodo tömënäni näni wææ angainö ante ædæmö adingä inte wadäni beyæ ante nē wææ apæ necä inongä inte nē abogado näni änongä inongäimpa. Tömengä tönö oodeoidi nē aadäni näni Picæncabo pancadäniya adobaï Änäniya tönö godongämæ godänitapa. Godinque pancabaa awënē gobedönadodo weca ponte apænedinque, Pabodo nē wënæ wënæ cædongä ingampa töö, änänitapa. ² Pabodo ingante äñete mämönäni pongä ate nē abogado Tedetodo iñömö gobedönadodo Pedique weca ongöninque apæ necantapa.

—Awënē gobedönadodo eñëmi. Bitö nempo quëwëninque mönitö wantæpiyæ wæætedö wææte cædämaï inte godongämæ piyænē cæte waa quëwëmönipa. Ayæ bitö nē aabi inömi inte, Æbänö cæcæimpa, ante do eñëninque mönitö ömæ iñömö waa cæbi ate mönitö godömenque waa pönï quëwëmönipa. ³ Awënē Pedique, bitö waëmö pönï inömi inte imæca tömäo waa cæbi æninque mönitö bitö imite cöwë waa ate pönëninque waa apænemönipa. ⁴ Incæte, Botö wantæpiyæ apænebo bai bitö wæcædömiimpa, ante pönente wædinque botö, Ao ämi ate wantæ iñö apænebo pönö eñëe, ante abogado Tedetodo angantapa.

⁵ Ayæ, “Mönitö ayömöni iñömö ongongä iñömö nē wënæ wënæ cædongä inte tömäo godinque wapiticæ apæ necä eñëninque oodeoidi ænguï badinque Yæ yæ änäni wæmönipa. Edæ Näatadënöidi wapiticæ näni cæcabo iñönänite iingä iñömö adocä inongä inte nē angä ingampa töö.

⁶ Ayæ Wængonguï oncö ñænæncö incæ önonconque

baī baquinque tōmengā wēnæ wēnæ cæcā adinque mōnitō tōmengā ingante bæi ongontamōnipa. Ayæ mōnitō mæmæidi nāni wææ angainō ante Pabodo æbānō ēñente cæcāi, ante mōnitō apænte ancæte ante cætamōnipa. ⁷ Mānōmaī ante tæcæ cæyōmōni tōmengā mōnitō nempo ongōñongante cōmantante Ditia iñōmō māmō gā pe æmpote ō ængantapa. ⁸ Ayæ mōnitō adocā Pabodo ingantedō ante nē pīinte āmōni iñōmōnite adocā cōmantante Ditia angā ēñēninque bitō weca ponte ongōmōni ae. Bitō Pabodo ingante āmi ēñēninque tōmengā, Æbānō cæboī, ante nāmā wææ apænecæcāimpa. Tōmengā mānōmaī wææ apænecā ēñēninque bitō, Mōnitō æbānō nāwangā āmōnipa, ante do ēñencæbiimpa.”

⁹ Ante Tedetodo mānōmainō ante apæneyongante oodeoidi godongāmæ apænedinque, Tedetodo nāwangā angampa. Pabodo wēnæ wēnæ cæcā ingampa tō, ante adoyōmō ante apænedānitapa. ¹⁰ Gobedōnadodo Pedique guiquēnē Pabodo gāmænō opo cæpoyongante Pabodo wæætē iīmaī apænecantapa.

—Awēnē Pedique ēñēmi. Tæiyæ wadepo iñonte bitō iīmæca nē apænte angāimi inte mōni oodeocabo æbānō cæmōni iīmōni, ante do ēñēmipa, ante adinque botō, Bitō weca ponte nāmā beyæ wææ apænecæboimpa, ante tobopa. ¹¹ Bitō iñōmō ēñencæte ante cæbi iinque iīmāinō ante do ēñenguīmi iīmāimipa. Botō ōnempo tipæmpoga go mēōnaa mānimpoōnæque iñonte Wængonguī weca ædæ wææninque tōmengā ingante waa apænecæte ante Eedotadēē æitabopa. ¹² Māniñōmō æi pōninque botō tōmēnāni ayōnāni quīnō wēnæ wēnæ cæboī ae. Botō Wængonguī oncōnē ñænæncō

yabæcönë go guiibo incæ, oodeoidi odömöincönë go guiibo incæ taadö gobo incæ wadäni tönö guëadö guëa piinte ämo dicæ adäniyaa. Botö ædömë godinque Yæ yæ ämo dicæ ëñënäniyaa. ¹³ Ìninqe tømënäni näni, Pabodo wënæ wënæ cæcampa, ante näni piinte änewënö ante edæ, Nāwangä impa, ante quïnö impa odömonguïnänii. Edæ dæ ampa, ante Pabodo nāmā wææ apæncantapa.

¹⁴ “Incæte mönitö, Quëwenguïnö Taadö impa, ante möni pönönö ante oodeoidi wæætë, Wapiticæ goquïnö impa, ante pïinänipa. Ìninqe, Pabodo mäninönö ante pönengampa, ante iïnäni nö ante apænedänipa. Nāwangä impa, ante bitö ìmite ämopa. Botö mäninönö ante pönëninque mönitö mæmæidi Wængonguï ingante waa ate cædinque quëwëmopa. Ayæ Möitee wodi nänö wææ angainö ante botö Ao äninque Wængonguï beyæ në apænedäni näni yewæmongainö ante adobaï Ao äninque quëwëmopa. ¹⁵ Wængonguï angä ate mönö waocabo edæ nö cæmö incæ wiwa cæmö incæ tømämö wænte ate ñäni ömæmöninque mönö quëwengæimpa, ante iïnäni pönënanipa. Botö tømënäni näni pönönö bai adobaï ante pönente tobopa. ¹⁶ Mänömaï beyæ botö, Wængonguï ayongä incæ waodäni ayönäni incæ botö nāmā apænte botö pönönö tæiyæ waëmö entawencæboimpa, ante cöwë nanguï cæbopa.”

¹⁷ Äninque Pabodo godömenque apæncantapa. “Botö wayömö gote tæiyæ wadepo quëwente ate tømëmo ömæ adodö pöninque, Ömæpodäni wæwënäni quï, ante ænte pöninque botö guidënäni oodeoidi iïnänite wæætë pædæ

godömo ænänitapa. Ayæ, Wængonguï qui, ante baö pædæ godontabopa. ¹⁸ Mänömaï cæyömo ayönäni botö iñömö tæiyæ waëmö bacæte ante Möitee wodi nänö angainö bai do eyepæ cæðimo inte Wængonguï oncö ñænæncö yabæcönë pö guiidinque, botö, Wængonguï qui, ante godömo adänitapa. Wïi nanguï inäni tönö cædinque botö Yæ yæ änämaï inte cæbo adänitapa. ¹⁹ Incæte botö imotedö ante näni pïinte äninö näwangä i bai wadäni guiquënë oodeoidi incæ Atiabæ quëwente pönäni iñömö, tömënäni wæætë bitö weca do ponte anguënänäni inänipa. ²⁰ Botö oodeoidi näni në Apænte Äincabo weca ongöñömote, Pabodo æbänö nö cæðämaï ingää, ante apænte äñönänite bitö weca ñowo ongönäni guiquënë mäninö ante në ëñänäni inänipa. Ìninqwe wadäni dæ änäni adinqwe iinäni wæætë edæ tömënäni näni ëñäninö ante në anguënänäni inänipa. ²¹ Botö awënëidi weca ongöninqwe yedæ äninque, ‘Mönö wænte ate ñäni ömæmongæimpa, ante botö apænedö beyænque mïnitö ñowoönæ botö imote apænte äninque pïimïnipa,’ ante apænetabopa. Ìninqwe iñömö ongönäni wabänö adobai adode botö äninö beyænque pïinte änänipa,” ante Pabodo nämä wææ ante iinqwe apænecantapa.

²² Pabodo mäninganca apænecä ëñëninque Pedique, Taadö ante në quëwänäni æbänö ante pönänäni, ante do ëñëningä inte, Idæwaa, äninque tömënäni inänite,

—Cömantante Ditia pongä ate wæætedö wæætë mïni äninö ante apænte ancæboimpa.

²³ Äninque tontadoidi capitäö ingante

apænedinque, Pabodo ingante tee mōnedāmaī inte wææ wānōedāni. Ayæ tōmengā quiēmē ante ænguēnengā ingā adinque tōmengā æmigoidi ponte pædæ pōnōnāni ængā ĩninqe mīnitō ee amīni æncæcāimpa, angantapa.

²⁴ Tæōnæ go ate Awēnē Pedique tōmengā nānōogængā Dodotida tōnō nāna gæncaya pōnatapa. Tōmengā nānōogængā oodea onquiyængā ĩnongāimpa. Pedique ĩñōmō Pabodo ingante añete māmōnāni pōninque Pabodo wæætē, Codito Itota ingante mōnō wede pōnente quēwengæimpa, ante apænecā ēñēē cōnatapa. ²⁵ Ayæ Pabodo godōmenque apænedinque, Mōnō nō cæte quēwengæimpa, āninque, Mōnō nāmā wææ aate waa cæte quēwengæimpa, angantapa. Ayæ, Wængonguī Awēnē nānō apænte anguīōnæ oo baquinō anguēnē, ante apænecā ēñēninque Pedique wæætē guīñente wædinque, Idæwaa, āninque,

—Ñōwo gobāwe, angantapa. Waōnæ ate botō eyepæ ĩmo inte āmo bitō ĩmite añete māmōnāni ponte apænebi ēñēmaīmopa, angantapa.

²⁶ Mānōmaī āninque tōmengā, Pabodo wabānō, Ñimpo cæbi gocæboimpa, ante cædinque godonte æinta pōnōmaingampa, ante pōnengantapa. ĩninqe tōmengā wantæ wantæ ĩñō Pabodo ingante angā pōñongā guēa tededatapa. ²⁷ Mānōmaī ancaa cæyongā wadepo mēnepoga ba ate Pedique gobedōnadodo awēnē ĩnque bayongante wacā Pontio Peto nāni ānongā pōninque wæætē awēnē gobedōnadodo bacantapa. ĩninqe Pedique ĩnque awēnē bayedē, Botō ĩmaī cæbo ate oodeoidi botō

imote waa acædänimpa, ante pönente cædinqe Pabodo ingante tee möneincönë oncodo tadönämaï ee adinqe wadæ gogacäimpa.

25

Gobedönadodo Peto weca Pabodo ongonte apæncampa

¹ Peto iñömö pancabaa awënë gobedönadodo tæcæ badingä inte mänimæ pöninqe Tetadea näni quëwëñömö meönaa go adoönæque quëwëninque Eedotadëë go æicantapa. ² Eedotadëë iñömö ponte ongöñongante, Wængongui qui, ante nê godönäni ñænænäni tönö oodeoidi awënëidi tömengä weca pöninqe, Pabodo iïmaï wënæ wënæ cæcantapa töö, ante apænedäni ëñengantapa. ³ Tömënäni doyedë adoyömö pönëninque, Gobedönadodo Peto ingante ämö ate tömengä wæætë Pabodo ingante Eedotadëë iñömö da pönongä pöñongante mönö taadö wææ wänonte ö æente wænongæimpa. Ante nê pönëwënäni inte tömënäni ñowo Peto weca pöninqe iïmaï änänitapa. Gobedönadodo Peto ëñëmi, Bitö Ao ante möni ämaï pönö cæquïmi. Bitö Pabodo ingante ämi Eedotadëë iñömö æente mämönäni pongäe, ante ancaa änäni. ⁴ Eñëninque Peto wæætë tömënäni inänite edæ, Pabodo iñæmpa Tetadea iñömö tee mönete ongongantawo. Botö tömëmo edæ oo adoyömö wæi gocæboimpa. ⁵ Äninque,

—Mänömaï beyæ mïnitö mïni cabo iñömïnite nê änäni pancadäniya inänite da godömiini botö

tönō godongāmæ Tetadea wæi gocædānimpa. Pabodo wënæ wënæ cæcä ingä ïninqe tömënāni mänñömō pōninqe ancædānimpa.

⁶ Äninqe tömënāni tönö wodo önompo tipæmpoga ïönæ godömenque quëwëninque Peto wadæ godinque Tetadea wæi gocantapa. Pōninqe tömengä ïmō ate awënëidi apæncæte ante nāni contaimpaa tæ contadinque angä ate Pabodo ingante ænte mämönāni pongä. ⁷ Ate oodeoidi Eedotadëë quëwente ñöwo wææ pōnināni inte pō godongāmæ gongæninque, Pabodo mänömainō wiwa cæcampa, wadō wiwa cæcampa, ïmainō wiwa cæcampa, ante ancaa änewënānitapa. Incæte Petoidi ïänite, Nāwangä ante apænemönipa, ante odömoncæte ante tömënāni quïnō impa ante odömönāni aquināni. ⁸ Pabodo ïñömō nāmā wææ apænedinque,

—Oodeoidi nāni wææ angainō ante Baa änāmaï ïnomo inte botō ëñente cæte quëwënimo ïmopa. Wængonguï oncö ñænæncö waa adinque botō mänincönë yabæcönë guiite wënæ wënæ cædāmaï intabopa. Odömänoidi tæiyæ awënë Tetædo nänö änö ante ëñente cædinque wadō ante cöwë cædāmaï intabopa.

⁹ Äñongante Peto, Oodeoidi tömënāni nāni äninō bai cæbo ate botō ïmote waa acædānimpa, ante babæ cædinque Pabodo ingante,

—Botō Eedotadëë go æibo ate adinque bitō botō weca pōñömi ïinäni pïinte nāni äninō ante apænte ancæboimpa. Bitō Ao ante, Gocæboimpa, ämitawo.

¹⁰ Äñongante Pabodo wæætë,

—Botö iñæmpa odömāno tæiyæ awënë Tetædo nānō Apænte ante Contaimpaa gäänē ñōwo incæ ongōmo ae. Mīnitō iñōmō Tetædo beyæ ante nē apænte ämīni inōmīni inte edæ botō imote nē apænte anguënēmīni imīnitapa tōō. Bitō tōmēmi iñōmō edæ, Pabodo oodeoidi inānite wēnæ wēnæ cædāmaī iningā ingampa, ante edæ do eñēmipa. ¹¹ İninque wēnæ wēnæ cædinque botō tente wænguënēmo imo bai botō edæ Baa änāmaī inte edæ dobæ wæncædōmoimpa. Wæætē edæ, Wēnæ wēnæ cæbipa, ante iñāni oodeoidi nāni ānewēnō guiquēnē ōnonquedō ante i ininque waocä æcāmenque incæ ædō cæte tōmēnāni nempo pædæ godonguēnengā ingää. İninque botō, Odömāno tæiyæ awënë Tetædo ingante āmo botō imote pōnō apænte ancæcäimpa, angantapa.

¹² Pabodo mänōmaī angä eñente wædinque Peto tōmengä tönō godongämæ nē apænte änāni tönō, Æbānō cæquīmōō, ante adoyōmō pōnēnāni ate tōmengä Pabodo ingante,

—Ao ämōnipa. Tæiyæ awënë Tetædo incæ apænte ancæcäimpa, ante do änīmi inte bitō Tetædo weca edæ gocæbiimpa, angacäimpa.

Awënë odeye Agodipa ingante Peto apænecampa

¹³ Tæönæ go ate wacä awënë odeye Agodipa tönō onquiyängä Bedēnite iñōmō gobedōnadodo awënë Peto ingante, Bitō iimæca waa pōmi amōnapa, ante apænecæte ante Tetadea iñōmō pōninque Peto weca eñacæ pōnatapa. ¹⁴ Pōninque tæönæ quēwēna ate awënë Peto guiquēnē awënë

odeye Agodipa ingante, Pabodo ingante iimaï cætamonipa, ante apænedinque,

—Gobedönadodo awënë Pedique wodi nänö nē tee mönete emö cæte godingä iñömö onguĩñængä adocanque ayæ a ongongampa. ¹⁵ İninqe botö Eedotadëe æite quëwëñömote, Wængonguï quï, ante nē godönäni ñænænäni tönö oodeoidi inänite nē aadäni näni Picæncabo guiquënë botö imote äninqe, Mäningä iñömö wiwa cæcä ingä adinque bitö tömengä ingante apænte äninqe ämi wænönäni wæncæcäimpa, änänitapa. ¹⁶ Eñëninque tömënäni inänite botö wæetë iimaï antabopa. Waocä nämä beyæ apænedämaï iñongante mönitö möni odömänocabo iñömö nē pänäni inänite pædæ godönämaï imönipa. Wæetë wadäni, İngä iimaï cæte wënæ wënæ cæcampa, ante pïinte änäni eñente wædinque mönitö mäningä tönö nē pïinäni inänite ämöni godongämæ pönänipa. Ponte awincadö awinca adinque wæatedö wæetë äñönänite mönitö iñömö, Tömënäni näni pïinte äninö ante tömengä æbänö nämä wææ apænecää, ante ædæmö eñente ate nöingä ante apænte ämönipa. Mänömainö ante botö tömënäni inänite apænetabopa, ante awënë Peto apænecantapa.

¹⁷ Ayæ, “Mänömaï ante apænebo eñëninque nē pïinte änäni botö tönö wææ Tetadea iñömö godongämæ pönänitapa. İninqe botö a ongönämaï do möni apænte äimpaa iimö ate go tæ contadinque, Mäningä ingante ænte pöedäni, ämo ænte pönänitapa. ¹⁸ Botö iñömö, Pabodo wadäni inänite wiwa cæcampa, ante pïinguinäni imainänipa, ante pönentabopa. Incæte nē pïinte änäni ængæ

gantite apænedinque edæ botö ante pönëninö bai wii pïinänitapa. ¹⁹ Wæætë edæ wadö ante pïinäni ëñente wætabopa. Wængongui ingante æbänö cæte waa aquii, ante tömënäni Pabodo tönö wæatedö wæætë pïinänitapa. Ayæ tömënäni mæmæidi näni wææ angainö ante tömënäni, Pabodo ëñënamai ingampa töö, ante pïinänitapa. Ayæ adocanque Itota wodi do wængaingä incæte Pabodo, Miingä quëwengampa, ante tedecampa töö, ante pïinänitapa. ²⁰ Ìinque botö, Quiëmë bai anewënäni, Æbänö cæte nö ëñente apænte anguimoo, ante wædinque botö Pabodo ingante iïmai antabopa. Tömënäni näni pïinte äninö ante bitö Ao äinique Eedotadëe gote ongöñömite botö apænte ancæboimpa, antabopa.”

²¹ “Äñömö tömengä wæætë, Botö imote ee wææ wänöñömini, Botö æbänö cætawoo, ante tæiyæ awënë Empedadodo mönö änongå apænte ancæcäimpa, ämopa. Angä ëñëninque botö, Æyedëmë eyepæ i ate Pabodo ingante tæiyæ awënë Tetædo weca da godömo gocæcäimpa, ante pönëninque, Tömengä ingante mäimpoga wææ wänödäni, antabopa,” ante Peto apænecantapa.

²² Mänömai apænecä ëñëninque awënë Agodipa wæætë,

—Ìingä onguiñængä æbänö apænecää, ante tömëmo ëñëinente wætabopa.

Äñongante Peto,

—Ìimö ate tömengä apænecä ëñencæbiimpa, angantapa.

²³ Ìimö ate awënë odeye Agodipa tönö Bedänite iñömö waëmö pöni weocoo wëñate mongæninque

tömēnāni nāni ēñēincōnē ñænāncōnē pōninque, Mōnatō awēnēmōna iñōmōnate waa aedāni, ante bai cædinque wæñee da da pō guiidatapa. Ayæ ton-tadoidi tæiyæ awēnēidi tōnō māniñōmō quēwēnāni awēnēidi ñænānāni tōnō tōmēna miñæ dao dao pōnānitapa. Ayæ Peto angā ēñēninque nē wææ wānōnāni wæætē Pabodo ingante ænte māmōnāni pō guiite ongōñongante, ²⁴ Peto iñōmō,

—Awēnē odeye Agodipa ēñēmi, angantapa. Iñōmō ongōmīni tōmāmīni edæ ēñēedāni. Iingā ingante amīni. Tōmengā ingante āninque Eedotadēē quēwēnāni incæ iñōmō quēwēnāni incæ oodeoidi tōmānāni botō imote yedæ āninque, Iingā nē wēnæ wēnæ cæcā inte godōmenque wīi quēwenguēnengā ingampa cæbii, āninque, Bitō apænte ancæbiimpa, ante wædānipa. ²⁵ Iinque, Adocā Pabodo nānō wænguinque wēnæ wēnæ cæcantawoo, ante botō cōwā ayōmo edæ dæ antapa. Ante wæyōmo tōmengā guiquēnē, Tæiyæ awēnē empedadodo incæ botō imote apænte ancæcāimpa, angā ēñente pōnēninque botō, Ao, tæiyæ awēnē Tetædo weca da godōmo gocæbiimpa, antabopa. ²⁶ Incæte, Iingā nānō cædinō ante tæiyæ awēnē aquinō ante botō ædō cæte yewæmonguimoo, ante wæbopa. Mānōmaī beyæ botō, Mīnitō tōmāmīni apænte āmīni ēñencæboimpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboimpa, ante cædinque botō ñōwo Pabodo ingante ænte māmōmo ponte a ongongā aedāni. ²⁷ Iñæmpa botō, Mōnō nē tee mōnete ongongā wēnæ wēnæ nānō cædinō ante yewæmōnāmaī inte mōnō ædō cæte da godonguīi,

ante awädö, ante Peto apænegacäimpa.

26

Agodipa weca ongonte Pabodo nämä wææ apænegacampa

¹ Awënë odeye Agodipa wæætë Pabodo ingante, —Bitö ñöwo nämä beyænque wææ apænegacäbiimpa, ämopa.

Angä ëñëninge Pabodo compo compo cædinque nämä beyænque ante wææ apænegacæ cæcantapa.

² “Awënë odeye Agodipa, ëñëmi. Oodeoidi nāni pīinte änīnō tōmānō ante nämä beyænque wææ apænedingue botö bitö awënë ïmi weca ongonte apænebopa, ante adingue botö waa edæ tobopa.

³ Mōni oodeocabo dodāni nāni cægai bai mōni cæinō ante bitö iñōmō edæ do ëñëmipa, ante tobopa. Ayæ adobaï, Oodeoidi ñowodāni æbānō ante wæætedö wæætë ante tededānii, ante do ëñëmi inōmi inte bitö botö wææ apænedö ante edonque ëñenguïmi imipa, ante pönëninge botö godömenque tobopa. Ìninge bitö Ao ante ee ongöninge ëñencäbiimpa, ämopa.”

Ïmai quëwengaboimpa, ante Pabodo apænegacampa

⁴ Ante apænedingue, “Botö ñöwo ganca æbānō quëwëmoï, ante oodeoidi tōmānāni do ëñënānipa. Edæ do wëñæmoyedë botö ëñagaimæ quëwente pædinque botö edënimoyedë ñöwo ganca æbānō Eedotadëe iñōmō quëwengaboï, ante do ëñënānipa.

⁵ Mōni oodeocabo incæ pancadāniya Wængonguï ingante wædænque ëñente quëwëñōnāni mōni Paditeocaboque wæætë, Dodāni nāni wææ angainō ante mönō ëñente cæcäimpa, ante ëñente

quëwëmönipa. Botö iñömö Paditeobo inömo inte mäninö ante cöwë Ao ante godömenque nanguï cæte quëwentabopa. İninqe oodeoidi do againāni inönāni inte Ao ante bai, Nāwangā Pabodo ëñente quëwengampa, ante apænecædönānimpa. ⁶ Mönitö mæmæidi inānite apænedinque Wængonguï, Minitö beyæ cöwë pönö waa cæcæboimpa, ante nānö angainö bai cæcä beyænque mönö watapæ bacæimpa, ante botö pönëmopa.”

“Ñöwo iñömö mänine botö pönënö beyænque iināni, Pabodo ingante apænte ancæminimpa, ante ænte mämönāni pöninqe botö minitö weca a ongömo aedāni. ⁷ Wængonguï, Minitö beyæ pönö waa cæcæboimpa, ante nānö angainö ante iinque bacæimpa, ante möni pönënö beyænque möni oodeo pægaincabo önompo tipæmpoga go mencaboga mänimpomöni imöni iñömö woyowotæ itædë, Wængonguï ingampa, ante tömengä beyæ cæte quëwëmönipa. Incæte awënë odeyebi, ëñëmi. Wængonguï, Cöwë cæcæboimpa, ante nānö angainö ante möni pönënö beyænque oodeoidi incæ botö imote, Wiwa cæbipa töö, ante püinānipa. ⁸ Minitö iminite ämo apænemini ëñëmoedāni. Do wænināni iñönānite Wængonguï, Botö pönö cæbo ate ñāni ömæmoncædānimpa, angacäimpa. Minitö iñæmpa, Wængonguï ædö cæte mänömai cæquingää, ante pönente wædinque quinante Baa änewëminii,” ante Pabodo angacäimpa.

Pabodo, Coditoidi inānite togænte pantabopa, angampa

⁹ Äninqe Pabodo godömenque apæncantapa. “Botö wëenëñedë edæ oodeoidi nāni pönëwënö

baī pönengaboimpa. Māniñedē botō Itota wodi Nāatadeta quēwengaingā ěmōwo ante nāni pōnēnō ante pīinte cædinque nanguī wido cæquēnēmo ĩmopa, ante pōnēwentabopa. ¹⁰ ĩninqe botō Eedotadēē ĩñōmō quēwēninqe māñinonque ante cægaboimpa. Māniñedē edæ, Wængonguī quī, ante nē godōnāni ñænænāni ĩnānite antabopa. Āmo Ao ante tōmēnāni nē ānāni inte yewæmonte pædæ pōnōnāni æninqe botō Wængonguī Awēnē quīnāni nanguī ĩnāni ĩnānite bæi ongonte æninqe nē tee mōnebo ingaboimpa. Ayæ tōmēnāni ĩnānite wænoncæ cæyōnāni botō cōwē godō Ao angaboimpa. ¹¹ Botō wayōmō wayōmō godinque oodeoidi odōmōincōnē wantæ wantæ ĩñō go guidinque, Wængonguī Awēnē quīnāni tōmengā ingante godō wēnæ wēnæ ante pīincædānĩmpa, ante cædinque pædāni, ante nanguī āmo pangadānĩmpa. Ayæ tōmēnāni ĩnānite nanguī pīininqe godōmenque ænguī badinque botō tōmēnāni ĩnānite pancæte ante wabæca nāni quēwēñōmō wabæca nāni quēwēñōmō incæ togænte gogaboimpa,” ante Pabodo wææ apænecantapa.

Wadō ante pōnente babopa, ante Pabodo adodō angampa

(Nāni Cægainö 9.1-19, 22.6-16)

¹² Ante apænedinque Pabodo godōmenque, “Mānōmaī wabæca go wabæca go cædōmo inte Daāmaco ĩñōmō gocæte ante cætabopa. Cæyōmō, Pabodo ĩmaī cæcæcāĩmpa, ante Ao āmōnĩpa, ante, Wængonguī quī, ante nē godōnāni ñænænāni nē ānāni ĩnōnāni inte botō beyæ cadota ante

yewæmöninque pædæ pönönäni ænte gotabopa. ¹³ Awënë odeyebi, ëñëmi. Mänömaï gote idömæ goyömo tæcæ bæcä pöni bayonte nænque nänö näwä bai godömenque näwä öönædë inö botonga möni godongämæ gocaboga pö tömäo guinæ gongæ. ¹⁴ Ate wædinque tömämöni guidömëmæ go go wæëñömöni adocanque möni ebedeo tededö tedete öönædë apænecä botö adoboque ëñentabopa. ‘Taodo. Taodo ämo. Botö imote quïnante togænte pämi. Ìñæmpa wagada päintoca bai bitö nämä ìñæ æwate cowate bai bitö caate wæquinque cæbipa,’ angacäimpa.”

¹⁵ “Angä ëñente wædinque botö, ‘Awënë, æbidö inömi imii.’ Ante ëñente wæyömete, ‘Botö Itota inömo inte bitö nê togænte pänimo mänimodö imopa cæbii. ¹⁶ Ñöwo edæ ængæ gantidique adiyæ næ gongæmi ämopa. Botö beyæ nê pönö cæbi ämo edæ bacæbiimpa. Ayæ, Botö imote æbänö abii, ante bitö adinö ante nê apænebi ämo bayömite botö iincayæ ate godömenque odömömo ate bitö aquinö ante bitö nê apænebi ämo bacæbiimpa. Mänömainö ante ämo bacæbiimpa, ante apænecæte ante botö bitö weca ponte a ongömopa. ¹⁷ Ayæ bitö guidënäni oodeoidi incæ wadäni wabæca quëwënäni incæ bitö imite wënæ wënæ cæcæ cæyönäni ate botö bitö imite gä pe æmpote wææ gompobo beyænque bitö wæætë quëwencæbiimpa. Tömënäni weca botö bitö imite da godömo gocæbiimpa. ¹⁸ Tömënäni botö imote wede pönënäni ate botö wënæ wënæ näni cædinö ante godö ñimpo cæbo ate tömënäni do botö tæiyæ waëmö badongainäni tönö adocabodäni bai badömo badinque quëwencædänimpa, ante cæbopa. Mänömainö cæcæte ante botö, Bitö Taodobi

iñömö tömënäni awinca wi æmonte bai cædinque apænebi eñëninque tömënäni wæætë edonque adinque ñäö inö gämænö poncædänimpa, ante cæbopa. Tatäna nempo quëwëñönänite bitö wæætë gä pe æmpote bai cædinque odömonte apænebi eñëninque tömënäni wæætë edæ ocæ emænte pöninque Wængongui nempo quëwencædänimpa, ante bitö imite da godömo gocæbiimpa.’ Ante Awënë Itota botö imote angä eñente gotabopa,” ante Pabodo apænecantapa.

Pabodo, Öönæde apænecä eñente cætabopa, angampa

¹⁹ Mänömai apænedinque Pabodo godömenque, “Awënë odayebi Agodipa, eñëmi. Botö wiimonte bai ayömo öönæde inö në angä nänö angainö ante botö ædö cæte eñënämai cæquimoo. Edæ do cætabopa. ²⁰ Täno Daamacö iñömö quëwënäni inänite apænedinque botö ayæ Eedotadëe iñömö godinque mäniñömö quëwënäni inänite apænedinque Oodeabæ quëwënäni inänite go apæneboque go wayömö oodeo inämai inäni inänite mäo apænedinque iimainö ante apænebo eñënänitapa. Minitö wënæ wënæ mini cædö ante, Ancaa wæwente awædö, ante ñimpo cædinque Wængongui gämænö edæ pödäni. Ayæ pöninque minitö, Mäninö wënæ wënæ botö cædinö edæ æmäwo ñimpo cæbopa, ante edonque acæimpa, ante cædinque waa cæte quëwëedäni, ante ämo eñënänitapa.”

²¹ “Iñinque botö mänömai cæbo beyænque Wængongui oncö ñænæncö boyæ ongöñömote oodeoidi botö imote bæi ongöninque edæ

wænoncæ cædänitapa. ²² Mänömaï wænæ wænæ cædäni incæte Wængongui ñowoönæ ganca botö tönö cöwë godongämæ cæcampa. Ìninqe botö, Wængongui Awënë æbänö cæcää, ante guññenāmaï inte næ gongæninque awënëidi inänite önönänique inänite apænedinque apæneboï aedäni. Möitee wodi tönö wadäni Wængongui beyæ nē apænegainäni tönö, Æbänö baquii, ante apænegadänimpa, ante apænebopa. Mänine tömēnāni näni apænegainēque adodö ante apænedinque botö godömenque apænedāmaï imo inte edæ iimainö ante apænebopa. ²³ Möiteeidi iñömö, Mönö Codito cöwë caate wæquiringä ingampa, ante apænegadänimpa. Ayæ, Wænte ate tömengä tänocä nē ñäni ömæmöningä inongä inte, Acædänimpa, ante cædinque ñäö tica ënente bai tömengä guidēnāni inänite wadäni inänite edæ odömoncæcäimpa, ante yewæmongadänimpa. Botö iñömö, Möiteeidi näni angainö do edæ iinque batimpa, ante apænedinque wadö ante apænedāmaï imopa,” ante Pabodo apænegacäimpa.

Agodipa, bitö Codito ingante pönenguënēmi imipa, angä

²⁴ Pabodo mänömaï nämä beyænque tæcæ wææ apæneyongante awënë Peto do ogæ tededinque,

—Ïñæmpa Pabodo ocai ömæcabi inte tedebe awædö. Nanguï wantæpiyæ dibodo adimi inte idiquibæ pönente babiimpa töö.

²⁵ Ante wææ tedecä eñëninque Pabodo,

—Awënë Peto bitö waa pönï awënë gobedönadodo imi incæte botö wii bitö änö bai imopa. Botö wii idiquibæ pönemo inte töingä

pönëninge näwangä ante apænebopa. ²⁶ Awënë odeye Agodipa guiquënë tömengä mäninö botö apænedö ante tömää eñengä iñongante tömengä ingante edonque apænebo eñengampa. Edæ mäninö botö äninö wii awëmö cætimpa, ante pönëninge botö, Awënë odeye incæ do adingä inte ædö cæte eñenämaï inguingä, ante awædö. ²⁷ Awënë odeyebi Agodipa, ñowo bitö imite apænebo eñëe. Wængongui beyæ näni apænegainö ante bitö pönëmitawo. Do pönëmi imitapa, ante eñëmopa.

²⁸ Äñongante Agodipa wæætë,

—Iñæmpa bitö botö imote wantæ iñö tededinque, Agodipa bitö Codito ingante do pönencæbiimpa, ante cæcæte ante cæbitawo.

²⁹ Äñongä Pabodo wæætë,

—Wantæ iñö apænebo incæ wantæpiyæ apænebo incæ bitö botö bai pönëmi waa tobaïmopa. Edæ bitö tönö godongämæ eñëe cönäni tönö mïnitö tömämïni botö bai entawencæminimpa, ante botö Wængongui ingante apænebopa. Incæte, Botö bai baedäni, äninge botö, Yaëmengoncoo empocæminimpa, ante apænedämaï intabopa.

³⁰ Ante Pabodo mänömaï apænecä eñëninge awënë odeye Agodipa ængæ ganticantapa. Ayæ pancabaa awënë Peto, Bedänite, godongämæ ongönäni adobai tömengä tönö ængæ gantidinque, ³¹ mänincönë tao godinque iïmaï ante tededänitapa.

—Iingä Pabodo wënæ wënæ cædämaï iñongante quïnante wææ wänonguüi. Quïnante apænte wænonguüi. Edæ wënæ wënæ nänö cædinö dæ ampa.

32 Ante tedeyönäni Peto ingante Agodipa apæ necantapa.

—Tetædo incæ botö ïmote apænte ancæcäimpa, ante Pabodo wïi angä bai botö edæ tömengä ingante do ñimpo cæcædömoimpa, angacäimpa.

27

Pabodo ingante Odömä iñömö da godönäni go-campa

¹ Mänömainö ante wædinqe mänimæ awënëidi, Pabodoidi inänite ñöwo Itadiabæ ämö wogaa gocædänimpa, ante godongämæ Ao änänitapa. Mäniñömö tontadoidi iñömö tæiyæ awënë empedadodo beyænque näni wææ wänoncabo inönäni inte Empedadodoidi näni änoncabo inönänimpa. Tömänäni capitäo Codio nempo Pabodo tönö wadäni nē tee mönete ongöninäni inänite pædæ godönäni ö æninqe ænte gocantapa. Ayæ botö Odocabo nē yewæmömo tönö wadäni adobaï Pabodo tönö godongämæ gotamönipa.

² Gäwapæntibæ wedeca gote ayömöni wipo ñænæmpo Adadämitio wäi wocænte näni ænte pönimpo inte ñöwo Atiabæ godinqe wayömö go ti wææ wayömö go ti wææ näni goquimpo adinqe mönitö mänimpodé go guiite gäwapæntibæ wogaa gotamönipa. Ayæ wacä Aditadoco Mäatedöniabæ Tetadönica iñömö quëwëningä inte mönitö tönö pö äampodenque gocantapa. ³ ïimö ate Tidöo näni quëwëñömö pö wäi wocæñömöni Pabodo ingante capitäo Codio waa cædinqe pönö apæ necantapa. Bitö æmigoidi weca quiëmë bitö ænguënönö ante gote ænte pöe, äninqe ee acä tömæwæ gote eñadinque ænte pongantapa. ⁴ Ayæ mänii

Tidöo iñömö eñate wogaa goyömönite möni nē gocæ cædö woboyæ betamonca pæmæ ate wædinque mönitö wää tēiwænē Tipidebæ nāni äniwænē wææ cæteinö wogaa gotamönipa. ⁵ Wää tēiwænē go wodo tebæ gomönique go tæcæpæ pöni wogaa godinque Tiditiabæ wodo tebæ pömönique go Pampidiabæ wodo tebæ pömönique go Ditiabæ godinque Miida nāni quēwēñömö pö wäi wocæntamönipa.

⁶ Mäniñömö wacä wipo ñænæmpo Adecantodia nāni ænte pönimpo adinque capitäo Codio, Itadiabæ goquimpo impa, äninque mönitö imönite angä godongämæ guite wogaa gotamönipa. ⁷ Tæönæ iñonte wæñee godinque mönitö, Æiquedö goquimönii, ante ancaa cæmönique go Gönido nāni quēwēñömö go wodo tebæ gotamönipa. Ayæ woboyæ cöwē mönitö gocæ cædö inö nangui pöni pö ate wæmönique go wää tēiwænē Tadamöne wodo tebæ godinque wawænē Cædeta nāni änöwænē yaatænque gotamönipa. ⁸ Mäniwænē wææ cæteinö yæwedecaque ancaa cædinque wæñee godinque mönitö Datea wëmonca wodöiñömö nāni Waa Wodöiñömö nāni äniñömö pontamönipa. Mäniñömö pömöni ate wipodē nē cædäni iñömö, Wipo ñænæmpo wäi wocæñompo nämä godämaï ingæimpa, ante cædinque teëmenca gæguincamē inte nāni ñä cæcadodinca guitodönāni nāñe ñongæ ate wipo godämaï wäi wocæntapa.

⁹ Mäniñömö wäi wocænte owodinque mönitö, Quingæ pongamö incæ wæñee pömompa, ante wædinque mönitö, Woboyæ nangui pæmæ tedæ baquinque mönitö Wængongui beyæ ante mönö cænämaï eönæ do iinque batimpa, ante

pōnentamōnipa. Īninqe mōnitō, Nōwo mōnō wænguinque wipodē godōmenque gomompa, ante wæyōmōni wipo ñænæmpo nē ænte godāni Īnānite Pabodo nō pōnēninque wææ angantapa.

¹⁰—Īñānāni, botō ayōmo mōnō ēwente wæquinque godōmenque gomompa. Māincoo mīni ænte go-coo wido cæquinque wipo nā tobæ go ate mōnō becadote wænguinque impa cæmīni.

¹¹ Āñongā wipo ñænæmpo nē ēacā tōnō wipo capitāō wadō ante apænedā ēñēninque tontado capitāō Codio ĩñōmō Pabodo nānō ānīnō ante ēñēnāmaī cæcantapa. ¹² Wæætē edæ, ĩñōmō ponte mōnō wodōĩñōmō woboyæ pæmæ tedæ ĩñonte wīi owoīnente wæmompā. Ante wædinque wodo tōmānāni, Pēnite nāni wēmonca wodōĩñōmō nænque tamōnō ĩmætæ ĩnō ongōninque woboyæ ante wææ cæte impa cæmōō. Nōwo wadæ godinque Pēnique nāni wēmonca wodōĩñōmō go ti wæænte quēwēninque woboyæ pæmæ tedæ ĩnque pæmænte go ate mōnō gomonga gocæimpa, ante adoyōmō ānānitapa.

Wīni cai pompa

¹³ Mānōmāinō, Gocæimpa, āñōnāni ñænæ wipo goquinque woboyæ dipæmæ ĩnō betamonca wædænque pæmæ ate wædinque, Mōnō ānīnō baī ñōwo mōnō waa goquinque impa, ante todānitapa. Ayæ wipo ñænæmpo wāi wocæñō teēmenca nāni guitodōninca ñōwo gæguincamenca quingæ ĩñæ æænō ñænæ wipodē cō cædāni ate mōnitō wogaa go Cædeta nāni ānōwænē yæwedecaque gotamōnipa.

¹⁴ Mānīnō tæcæ gocæ cæyōmōni do woboyæ wīni cai Yodocodōno nāni ānō wāā tēiwænē

ayaenēmāa inō māmō pæmæ pōninque, ¹⁵ wipo ñænæmpo māmō ö ænimpa. Mōnitō, Mönō wodöiñömō adodō gocæimpa, ante cædinque woboyæ pönō gāmænō ædō cæte wiya wēnente goquī. Ante wædinque mōnitō ee amōni woboyæ betamonca inō quingæ māmō dadi wēnente da godō mǎo gotamōnipa. ¹⁶ Wǎa tēiwænē guiyāwænē Caoda nāni ānōwænē dipæmæ inō yæwedeca woboyæ wææ cæteinō godinque mōnitō guiyampo mōni wēä wēä ænte pōnimpo ante, Tobænāmaī impacæimpa, ante pæ pagænte ancaa cædinque wēä pōnonte pæ mantamōnipa. ¹⁷ Ayæ nē cædāni guiyæmpo gæguincamenca wēä æænonte ñænæmpodē da wēnānitapa. Guiyæmpo da wēnente ate tōmēnāni, Ñænæmpo awæmpacoo wīi bede wænecæimpa, ante cædinque ñænæ wipo incæ gæguincamenca wīni wīni cæte goto wīnānitapa. Ayæ, Önætamō Tidite nāni ānontamō impa, ante adinque tōmēnāni, Æ quingæ gomō bai mōnō wænguinque Tidite emōnaiboga go nāñe ñongæncædōnimpa. Ante pōnente guiñente wædinque wæñee gocæte ante cædinque weocoo ñænæmpodē pæmænte mǎo nāni gocoo incæ wēä wænonte ñō cædinque ee adāni woboyænque wæñee mǎo gotamōnipa.

¹⁸ Wīni cai iñömō godōmenque woboyæ pæmæninque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætamōnipa. Ininque iimō ate tōmēnāni, Wipo omædē bate wodæi bacæimpa, ante cædinque mǎincoo ñænæmpodē ongōnincoo incæ æpænē edæ wido wido cædāni

gotapa. ¹⁹ Waönæ bayonte tömēnāni, Ñænæ wipo quincoo, ante nāni cæincoo incæ nāmā önompoca pancacooga æpænē wido cædāni gotapa. ²⁰ Ayæ tæönæ iñonte nænque edæ tamönāmaï nēmō tamönāmaï i ate mönō, Ædömē gomompa, ante eñēnāmaï inte edæ wætamönipa. Ayæ woboyæ godömenque māmō pæmæñö æpæ nanguï mængonta mængonta cæ wædinque mönitō, Ñöwo quëwenguināmaï imompa, ante edæ pönēninque wætamönipa.

²¹ Mänināni wantæpiyæ cænāmaï ināni adinque Pabodo tæcæguedē ængæ gantidinque tömāmōni ayömōni tömēnāni inānite iïmaï apæñecantapa.

—Iñānāni, botō ämo eñēninque Cædeta nāni änöwæñē emō cæte pönāmaï inte ee owoquēnēmīni iminitapa. Edæ mänōmaï ee ongömīni bai wipo tobænāmaï iñonte mīnitō māincoo ewēnāmaï inte wædāmaï incædömīnimpa. ²² Ñöwo guiquēnē guiñēnāmaï piyænē cæte quëwëedāni. Ñænæ wipo mönō goimpo incæ tobænte bacæimpa. Nāwangä impa. Incæte waomō iñömō wænāmaï tömāmō mīimō quëwenguimō imompa. ²³ Botō iñömō edæ Wængonguï quimo inömo inte botō, Wængonguï ingampa, ante tömengä beyæ cæbopa. Ñöwoönæ woyowotæ tömengä anquedo botō weca pöninque, ²⁴ botō imote apæñecä eñentabopa. “Pabodo, guiñēnāmaï ie. Tæiyæ awēnē Tetædo weca bitō cōwē gote gongæncæbiimpa. Ayæ bitō beyæ waadete pönō cædinque Wængonguï bitō tönō adopodē godongämæ godāni inānite do angä quëwencædānimpa.” ²⁵ Ante mänōmaï pönō apæñecä eñēnimo inte botō wæætē mīnitō iminite,

Guiññēnāmaī imīni inte pōnencāmīnīmpa, āmopa. Tōmengā nānō apænedō baquīnō anguēnē, ante botō Wængonguī ingante nē wede pōnēmo inte āmopa. ²⁶ Incæte wipo ñænæmpoque wāā tēiwænē wawænē godinque tobænte ba wæcæīmpa, ante Pabodo angantapa.

²⁷ Īnīnque mēa Wængonguī itædē iñonte woboyæ ayæ pæmæ māo godinque mōnitō Adodiaticopæ nāni ānōmāa wadō wadō wogaa gotamōnīpa. Mānīmpoōnæ iīnque go ate woyowotæ ayaōnænēña iñonte wipo ñænæmpodē nē cædāni iñōmō, Onguīpoiya obo pōmōmpa, ante pōnēnānitapa. ²⁸ Tōmēnāni, Ægancadō iī, ante acæte ante cædinque pædæ guidonte adinque todēinta i tei mēetodo īmpa, ante adinque ayæ godōmenque godinque pædæ guidonte adinque tōmēnāni, Ñōwo edæ pōnōmenque bæintitiæte mēetodo īmpa, ante wædānitapa. ²⁹ Dicaboga pōnī edæ gomō tamēñedāni, ante guiññente wædinque, Ñænæ wipo wāī wocængæīmpa, ante teēmenca nāni guitodōnīnca menca go mencaa yæmīñæmpo iñō edæ guitodōnānitapa. Ayæ, Ñāō ba waa tobāīmpa, ante Wængonguī ingante apænedīnque edæ wāī wocænte a owotamōnīpa. ³⁰ Wipo ñænæmpo nē cædāni guiquēnē, Mōnō wodīi wīnongæīmpa, ante awēmō cædinque waca nāni guitodōnīnca yæcadopo iñō guitodoncæte ante cæte baī babæ cædinque, Mōnō awēmō goquīmpo, ante guiyā wipo incæ pædæ wæænōncæ cædānitapa. ³¹ Guiyæmpo tæcæ pædæ wæænōñōnāni Pabodo iñōmō tontado capitāō tōnō tontadoidi iñānite angantapa.

—Īināni wipo ñænæmpo nē cædāni inte ñænæ

wipodē ongönāmaī ināni bai mīnitō ædō cæte nāmā cæte quēwenguīmīni.

³² Angā ēñente wædinque tontadoidi guiquēnē ñænæ wipo nē cædāni nāni awēmō gocæ cædimpo gæguincamē aa wiyænāni ininque guiyæmpo tæi guiite æmæwo gotimpa.

³³ Tæcæ oque pönente iñonte Pabodo iñömō, Tömāmīni cænguī cæedāni, ante nanguī āninque,

—Ñowo mēa Wængonguī itædē iñonte mīnitō ancai guīñente wædinque ee ate cænāmaī quēwēmīni abopa. ³⁴ Ñowo iñömō mīnitō imīnite, Cæedāni, āmopa. Cænte quēwenguēnē cæmīni, āmopa. Mīnitō æcāmenque incæ tömāmīni wænāmaī incæmīnimpa.

³⁵ Äninque tömānāni waa ayönāni Pabodo päö æninque Wængonguī ingante, Waa pönōmi cæmönipa. Ante apænedinque ao mænte cængä.

³⁶ Adinque tömēnāni, Mönō quēwengæimpa, ante gancæ pönente wædinque tömānāni cænānitapa.

³⁷ Wipodē möni adopodē gocabo iñömō dotiento tetenta i tei mānimpomōni intamönipa. ³⁸ Mänōmaī cædinque tömēnāni eyepæ cænāni ate edæ, Wipo teēmē emīñænte önætamō iñömō gobaimpa, ante guīñente wædinque, Wodæi bacæimpa, ante cædinque mönitō cænguī tömēmō incæ æpænē gäwapænē wido cægadānimpa.

Wipo ñæncæmpo incæ goycæ guiipa

³⁹ Mänīi ñäö bayö omæ adinque ñænæ wipo nē cædāni iñömō, Iimæ quīmæmē impa, ante ēñēnāmaī ināni inānitapa. Wæætē cōwā ayönāni, Æpæ wedeca togaa paodāmæ iñömō emönai impa, ante adinque, Eyepæ imō ininque mönō emönai boga wipo nāñe ñongæimpa. ⁴⁰ Ante

cædinque teëmenca nāni guitodönincacoo ëmö cæte gocæte ante gæguincamë aa wiyæninque ñimpo cædāni tadömengadæ ee ongontapa. Ayæ wiyaimpa mempaa tõmënāni wāi wocæñedë yæmiñæmpoya inö nāni goti wīnimpa incæ ñōwo wæætë edæ, Wipo tōō gocæimpa, ante ñi cædinque æpænë wæætë pædæ guidönānitapa. Ayæ, Woboyæ pæmænte mao gocæimpa, ante ñænæ wipo weocoo adocooque yæcadopo pædæ æænonte wo cædāni ate ëmōnaiboga togaa paodāmæ iñōmō tōingā mao gotamōnipa. ⁴¹ Incæte tæcæ goyömōni önætamō iñōmō nāñe ñongæntapa. Wipo yæcado nāñe ñongæ adinque mōnitō, Mönō ædō cæte goquii, ante wæyömōni æpæ nangui mængonta mængonta cæ beyænque yæmiñæmpo nā tobæninque panguimæ panguimæ æmæwo gopotapa.

⁴² Tæcæ tobæñö tontadoidi guiquënë, Në tee mōnete ongōnāni wii tæi tæi pante wodii wīnonguīnāni, ante wææ cædinque tõmënāni inānite wænoncæ cædānitapa. ⁴³ Adinque tontado capitāō iñōmō, Pabodo cōwë quëwencæcāimpa, ante cædinque tõmënāni nāni cæcæ cædinō ante wææ angä ëñente ñimpo cædānitapa. Ayæ mōnitō imōnite, Në ipo cæmīni iñōmō tāno æpænë tæi guiidinque onompoca compo compo go tõmæwæ ömaa goedāni, angä ëñente gotamōnipa. ⁴⁴ Wadāni ipo cædāmaī ināni inānite tõmengä, Minitō guiquënë awæmpaa incæ wipopa tobænimpaa incæ nāñe ñongæninque wiyacæ wiyacæ goedāni, angä ëñente godānitapa. Mänōmaī ëñente cædinque mōnitō edæ tõmāmōni æpæmpo becadote wænāmaī inte ömaa edæ tõmæwæ pongamōnipa.

28

*Wää tēiwæne Mänatabæ Pabodo ponte
quëwengampa*

¹ Æpæmpo becadote wænāmaī inte tōmāmōni
ōmaa taote eññōmōnite, Wää tēiwæne iiwæne
Mänatabæ impa, ante apænedāni eñentamōnipa.

² Māniōmæ quëwēnāni iñōmō wīi wadāni baī
cædinque mōnitō imōnite waadete cædānitapa.
Cōönæ ayæ nanguī cæ ate yoguite wæyōmōnite
tōmēnāni gonga tånōninqe, Pō ootoedāni, ānāni
gonga tōmāmōni bæcoyōmō oototamōnipa.

³ Pabodo iñōmō ōnompoca gæte tēnewæ bacoo
ænte māmō ñō cæyongā gonga ocoi ä wædinque
tæntæ gongapamō manta Pabodo ōnompō æo
pocænte ñinga cædāmaī ee engate owo wæcā.

⁴ Adinque iñōmō quëwēnāni wæætē nāni cabo
nāmāneque tededinque, “Īngā iñōmō waocā
ingante nē wæningā ingā awædō. Tōmengā
æpæmpo becadote wænāmaī iñongante edæ
mōnō nō cæte pānongā incæ tōmengā ingante
ata cæpodāmaī inte angā ate ñōwo quëwenguīnāmaī
incæcāimpa.”

⁵ Ante wapiticæ ante pōnente tedeyōnānite Pa-
bodo iñōmō pongadāmaī ingā inte pipo cæcā
tæntæ ñingacæ gongapamō togodo guiite gonga
gonte wængantapa. ⁶ Adinque tōmēnāni, Tincadō
pæncæ pæncæ mempoquingāā, ante ayæ, Tin-
cadō iñontobæ tæi go wæænte wænguingāā, ante
acæte ante wantæpiyæ cōwā ayōnāni, Ayæ dæ pon-
gadāmaī i inque ingampa, ante adinque tōmēnāni
wæætē edæ, Æ ĩngā wacā wængonguī inongā

inte ponte a ongongampa, ante wapiticæ ante pōnēnānitapa.

⁷ Ayæ māniwænē awēnē Pobidio iñōmō tōmengā quincodē mōni ōmaa pōñōmō eyequei intapa. Tōmengā, Oncōnē pō guiite quēwēedāni, angā pō guiite mōnitō mēōnaa go adoōnæque quēwēñōmōni tōmengā waadete pōnō cæcā ate waa quēwentamōnipa. ⁸ Pobidio mānōmaī waa cæcā quēwēñōmōni, Tōmengā mæmpo wepæ tōnō gōmæ cæte daicawo gawænte mōimoga a oñongampa. Ante apænedāni wædinque Pabodo tōmengā weca guiidique Wængongui ingante apænedinque gampocā ate waa bacantapa. ⁹ Pabodo mānōmaī cæcā adinque māniwænē tōmāo gode ānāni ēñente wædinque nē wēnæ wēnæ ināni inānite Pabodo weca ænte māmō ænte māmō cæyōnāni tōmānāni Wængongui cæcā waa badānitapa. ¹⁰ Māniñōmō quēwēnāni mōnitō imōnite wæætē pōnō waa apænedinque cōwē waa cædānitapa. Ayæ wogaa tæcæ gocæ cæmōni adinque quiēmē mōni ænguēnēnō ante adinque tōmēnāni, Mīnitō ænte goqui, ante eyepæ pōni ænte māmō da wēnāni ænte gotamōnipa.

Odōmā iñōmō Pabodo pongampa

¹¹ Ayæ mōnitō Mānatabæ iñōmō mengāa go adocanque māmonque quēwēninque gocæte ante cædinque, Äancadēnaquepo, Adecantodia iñōmō quēwēnāni nāni pemonte ānimodē go guitamōnipa. Tōmēnāni wængonguina Catodo tōnō Podoco awinca bai ante badōninque tōmēnāni ñænæ wipocado gō cædinque wipo ñænæmpo emōwo, Äancadēnaquepo impopa,

ante pemönönänimpa. Mänimpo Mänatabæ wëmonca wodöiñömö do pöningue pæmæ tedæ wäi wocæ adinque mönitö iñömö mänimpodë go guiidingue wogaa gotamönipa. ¹² Godinque Tidacota iñömö näni wëmonca wodöiñömö pö wäi wocæningue mönitö mëönaa go adoönæque quëwentamönipa. ¹³ Ayæ wadæ godinque Odeguio näni quëwëñömö pontamönipa. Ìimö ate dipæmæ gämænö woboyæ betamonca wædænque pæmæ wædingue mönitö wadæ godinque waönæ ate Poteodi quëwënäni näni wëmonca wodöiñömö æmæwo pö ti wææningue tömæwæ gotamönipa.

¹⁴ Tömæwæ godinque Poteodi näni quëwëñömö ponte ayömöni në pönënäni näni cabo ongönäni atamönipa. Tömënäni, Adoque Wængonguï itædë mönitö tönö ee owoedäni, änäni Ao ante mönitö tömënäni näni änimpoga mäniñömö quëwentamönipa. Ayæ ate Odömä taadonque gotamönipa. ¹⁵ Odömä iñömö quëwente në pönënäni iñömö, Pabodoidi oo pönänipa, ante do ëñënäni inte doönæ tadingue mönitö imönite bee tencæte ante pönänitapa. Pancadäniya iñömö Apio näni godonte æiñömö ganca pöningue mönitö imönite mämö bee tënäni ate godongämæ gotamönipa. Godinque, Cæincö, ante Menconga go Adoconque, näni añömö mäniñömö pöñömöni wadäni mämö bee tënanitapa. Mäninäni inänite adinque Pabodo iñömö, Nöwo iñömö wampo pönëmopa, äningue Wængonguï ingante waa ate pönëningue apænecantapa. ¹⁶ Ayæ odömänoidi näni nanguï quëwëñömö Odömä näni añömö pöñömöni tontado capitäo iñömö

nē tee mönedinäni wadäni inänite tömengä awënë nempo pædæ godöninge Pabodo ingante tee mönedämaï ingantapa. Wæætë wacönë nänënë ænte mäodäni quëwëñongante tontado adocanque tömengä ingante wææ wänönongäimpa.

Odömä iñömö Pabodo quëwengampa

¹⁷ Mäniñömö ponte ate Pabodo mëönaa go adoönæque ate oodeoidi nē änäni inänite añecä godongämæ pönäni ate tömënäni inänite,

—Botö tönïñamini, ëñeedäni. Mönö guidënäni inänite wënæ wënæ cædämaï inte botö dodäni näni angainö ante wido cædämaï iñömote oodeoidi incæ Eedotadëe iñömö botö imote bæi ongöninge æninge odömänoidi nempo pædæ godönäni gotabopa. ¹⁸ Odömänoidi guiquënë botö imote apænte äninge, Æbänö cæcantawo, ante ancaa ante adinque, Pabodo dicæ tömengä nänö wænguinge wënæ wënæ cæcäa, ante adinque botö imote ñimpo cæcæte ante cædänitapa. ¹⁹ Odömänoidi botö imote ñimpo cæcæte ante cæyönäni oodeoidi wæætë ancaa Baa änäni ëñente wædinque botö iñömö edæ, Odömänoidi tæiyæ awënë Tetædo incæ botö imote apænte angüengä ingampa, antabopa. Mänömaï änimo incæte botö awënë Tetædo weca ongöninge, Botö guidënäni wënæ wënæ cædänitapa, ante wæætë piinte änämaï incæboimpa. ²⁰ Mänömaï beyæ minitö iminite apænecæte ante botö, Pöedäni, antabopa. Ñöwo apænebo ëñeedäni. Mönö idægocabo iñömö, Mönö nē ponguingä Codito pönö cæcä beyænque watapæ bacæimpa, ante mönö pönëmompä. Mäninö mönö pönengainö beyænque botö daagömë ñänoncapoïmo a ongömo aedäni.

²¹ Ante apæneyongante tömënäni wæætë Pabodo ingante apænedinque,

—Oodeabæ quëwënäni bitö imite ante yewæmöninque cadota pædæ pönönäni dicæ æmöniyaa. Mönitö töninädäni Oodeabæ quëwente pöninque bitö imitedö ante dicæ wiwa änäniyaa. Bitö wiwa cædinö ante yewæmöninque odömönämaï inönänimpa. ²² Mänömaï i incæte wayömö wayömö tömämæ quëwënäni, Mäninäni Coditoidi inömö wënæ wënæ cædäni inänipa, ante pünte tededäni do ëñëmöni ininque mönitö, Bitö ayömi Coditoidi æbänö cædäni inänii. Æbänö pönëmi, ante ëñencæte ante wæmönipa.

²³ Äninqe tömënäni, Iionæ godongämæ bee tëninque ëñengæimpa, äninqe wadæ godänitapa. Ayæ wæætë mänionæ näni äniönæ inque ba ate ocæ ëmænte pönönäni tæiyænäni bee tëninque Pabodo weca godongämæ pönänitapa. Pönäni adinque Pabodo inömö baänæ contadingä gawadecæ pöni apænedinque, Wængongui Awënë Odeye nempo mönö quëwengæimpa, ante apænecantapa. Ayæ, Möitee wodi tönö Wængongui beyæ në apænëgainäni, Mönö Codito ponte cæcæcäimpa, ante näni angainö bai Itota inömö ñowo ponte tömänö ante do inque cægacäimpa. Näwangä impa, ante botö apænebo ëñëmaimäni, ante Pabodo oodeoidi inänite apænecantapa.

²⁴ Angä ëñëninque pancadäniya, Pabodo näwangä angampa, änänitapa. Pancadäniya guiquënë, Wü pönëinente awædö, änänitapa. ²⁵ Näni cabo incæ mänömaï wæætedö wæætë apænëte wadæ gocæ cæyönänite Pabodo wæætë æmäwo apænecantapa.

—Wængonguī Tæiyæ Waëmö Önöwoca apænecä
 ëñëninque Itaiya wodi doyedë mīnitö mæmæidi
 inänite näwangä ante apænecäimpa.

²⁶ “Itaiya ëñëmi, bitö oodeoidi weca godinque iīmaī
 ante apænebi ëñencädänimpa.

Mīnitö önömoncaque ëñëninque ëñënämaī
 incæmīnimpa.

Awincaque adinque cōwë adāmaī incæmīnimpa,
 ante apænebi ëñencädänimpa.

²⁷ İinäni edæ mīmö ömædënäni inte wīi ëñëinente
 wæwædö,

äninque ædö cæte ëñenguinänii.

Awinca wīi ainente awædö, änäni inte ædö cæte
 aquinänii.

Edæ mīmö ënënäni inte bai tömënäni awinca wi
 æmonte adinque

önömonca wi æmoncate ëñencädönänimpa.

Edæ mīmö nö pönëninque dadi ëmænte botö
 gämænö pönäni bai

botö do godö cæbo waa bacädönänimpa.”

Ante Itaiya wodi mīnitö mæmæidi beyæ ämotamīni
 ante bai yewæmongacäimpa. ²⁸ İninque mīnitö

oodeoidi inömiini inte ëñënämaī imīni adinque
 Wængonguī ñöwo wæætë, Botö pönö æmo

beyænque quëwencæmīnimpa, ante oodeo ināmaī
 inäni inänite do apænecæ cæcampa. Tömënäni

guiquënë ædæmö waa ëñenguinäni inänipa,
 ante apænebo ëñëmaimīnimpa, ante Pabodo

apænecäntapa.

²⁹ Mänömaī apænecä ëñente wædinque oodeoidi
 näni cabo nanguī pönī wæætedö wæætë äninque

wadæ godänitapa. ³⁰ Pabodo inömö oncö ænte
 quëwencæte ante tömënäni näni godonte æinta

pædæ godöningue wacä oncö incæ tömengä oncö bai bayö mänincönë wadepo mënepoga quëwengantapa. Ayæ, Æcänö ëñacæ pöinëna cöwë botö weca waa ponguimini, ante quëwëningue tömengä në pönäni inänite apænecä ëñënönänimpa.
³¹Ayæ në wææ wänönäni cöwë Baa änämaï iñönäni tömengä guiñënämaï apænedingue, Wængongui Awënë Odeye nempo mönö quëwengäimpa, ante apænedingue, Mönö Awënë Itota Codito æbänö cægacäi, ante edonque odömonte apænecä ëñengadänimpa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690